

- 東海稿 東海詔中稿未刻
- 鳳臺小稿 平義憲詩集已刻
- 探勝草 內山栗齋著已刻
- 舟山詩稿 櫻井良幹詩集未刻
- 東溪講外集 僧亮潤著已刻
- 愚亭遺稿 江邨秉詩集未刻
- 落楓稿 村中漸詩集未刻
- 靜思亭集 赤松國鸞著已刻
- 垂葭詩稿 鳥成章著已刻
- 花月吟稿 明和中。浪華書肆纂刻
- 愛日園稿 田子明詩鈔未刻
- 京遊草 同上
- 宮水詩集 度會末雅詩集已刻
- 靜齋文集 齊大禮著已刻
- 新川集 岡田挺之詩集已刻
- 三洲近體稿 林文肅著已刻
- 環空遺偈 僧環空詩鈔已刻
- 濟洲遺稿 山根道晉詩集已刻
- 太室集 幡文華詩集已刻
- 敝帚集 赤松大業詩集未刻
- 名流春遊編 同上
- 寰海詩稿 僧寰海詩集已刻
- 小草詩筐 合麗王著未刻
- 北遊草 同上

- 東遊草 同上
- 玄圃集 大江穉圭詩集已刻
- 讚海詩刪 同人著未刻
- 南江遺稿 友淵宜卿詩集未刻
- 三橘集 川井立牧三兄弟詩集未刻
- 鶯山遺稿 永德信詩稿未刻
- 映山漫稿 福尙脩遺稿未刻
- 春莊詩集 端文仲詩集未刻
- 綿山詩稿 柚木仲素詩集未刻
- 玩鷗詩集 賀伯魏詩集在刻
- 冬至三百首 僧亮融 大管集 松景韶 三人 一日百首 未刻
- 換璋編 藤世式詩集在刻
- 空華菴集 僧雪鼎詩集未刻
- 華山詩集 嶋津琴王詩集未刻
- 阿山叢桂集 同人著未刻
- 岸翁遺稿 岸季英詩集未刻
- 六甲遺稿 武谷泉詩集未刻
- 石城遺稿 原子章詩稿未刻
- 草菴稿 僧蘭陵著已刻
- 觀鷺堂詩集 永田俊平詩集在刻
- 松蘿館詩集 岩垣亮卿詩集在刻
- 春菴詩稿 田文卿詩集未刻
- 歸家日記 井上氏著已刻

中山詩稿 立花氏著已刻

[Faint bleed-through text from the reverse side of the page]

日本詩選卷之一

平安 江 邨 綬 君 錫 著

姪 清 勳 公 績 同校
受業 永 田 忠 原 俊 平

五言古詩

古風二首

原題云。贈伊蓋先生。藤井微君。

室直清

鳳凰翔溟漠 時鳴崑山岑 鳴聲一何悲 生平多苦心 所願簫韶奏 踟躕託遺音 世路日艱險 下
視邈古今 唐虞忽已逝 岐山不可尋 文彩須自愛 羽儀世所欽 誰復爲稻梁 低首從羣禽 饑
餐綠竹實 寒棲椅桐陰 自甘隱倫久 寧辭霜露深 清高有如此 虞羅安可侵 同

杜若生江渚 旖旎被其涯 長風搖紫莖 洪波浸朱鬣 風波迭驅迫 恐爲衆草欺 自羞無國香

非復絕世姿。 苒苒歲將晚。 孤芳徒自持。 高人好奇服。 佩芳固無遺。 豈料側陋質。 謬辱君子知。 揄揚言亦至。 微生非所宜。 但恨處僻遠。 不植君園池。 願早充下陳。 朝夕近容儀。

送復軒之南海

源 璵 白石

南山何粲粲。 白石爛其光。 長歌堯與舜。 中夜一何長。 今子遊南海。 萬里涉沅湘。 秋風西北到。 飄子芙蓉裳。 脩途難共越。 分襟在路傍。 行矣蒼梧遠。 望彼白雲鄉。

【白石詩草。 白石餘稿。 多載近體。 古詩僅僅一二。 蓋二集並非全集。 其他篇章。 羅池魚災。 餘稿緒言可徵也。 是以公之古詩傳者絕少。 殊可惜焉。】

咏孔雀

祇園瑜 南海

孔雀生南越。 五采何視視。 十步一顧影。 五步一顧尾。 致君玉堂上。 恩愛無所比。 珠玉爲我籠。 稻梁爲我餌。 竦尾爲君舞。 滿堂誰不喜。 奇珍世所疑。 奇服人所指。 一朝被讒言。 恩愛不可恃。 毛羽非異初。 君意已非始。 未能從鳳翔。 寧爲野田雉。

下山逢故夫

同

上山采薜蘿。 下山逢故夫。 薜蘿尚有香。 夫妻情豈無。 枕席成胡越。 容顏今已殊。 新人未諳性。 好慎奉舅姑。

【朴而婉矣。 怨而不違。 樂府古歌謳妙境。】

雜咏

梁田邦美

瓊矛開日域。 寶璽萬古尊。 文之以禮樂。 垂拱安元元。 叔世皇綱弛。 四海稜氛昏。 簪纓變介冑。 豺狼相噬吞。 奎壁沈芒彩。 碩果無復存。 六藝束高閣。 流裔寓女門。 龍德興關左。 霸圖臨中原。 馬上得天下。 詩書深其根。 世仁期已至。 鳳鳥鳴東園。 濟濟青雲士。 春風和苑壤。 老夫今耄矣。 何人能立言。 賢良有大策。 雕篆不足論。

一

同

玉露湛草野。 秋花倩粲開。 一夕驚鷗至。 彩艷委塵埃。 候蟲失庇蔭。 麋鹿鳴且哀。 佇立青松下。 三嘆賦悲哉。

二

同

宿昔如蘭臭。 飄零散四匯。 生離猶有合。 遊魂去何之。 秋燈風雨夜。 往事空復思。 開箱得錦字。 清揚宛在茲。 月下沙棠榭。 花間金屈卮。 豈無新相識。 著簪獨自悲。

三

同

昔我客濃州。 一登養老山。 斷崖數百仞。 青壁不可攀。 水簾分兩道。 迸落白雲間。 林風散珠玉。 濺射洗塵顏。 別來三十秋。 膏盲留泉石。 夢從羽人遊。 煙霞繞巾舄。 神瀆飲椒蘭。 頓覺換精魄。 飄然駕蒼虬。 天闈遠咫尺。

〔景鸞雜咏十首。此選四首。瓊矛之章。蓋伏櫪之嘆。王露宿昔二章。追感少時東都遊跡。言簡情繁。養老。爲加納文學時所登覽。其餘六首。都論我邦前古事迹。並不收採。〕

櫻島二子見過山亭

澤維顯

人生從所安。靜躁各異迹。維余耽幽閑。空山寄落魄。二子大雅流。時名已赫赫。雖在冠蓋場。烟霞素所適。春郊花雨後。遠來顧四壁。一咲傾肝膽。清談雜今昔。居貧寐無衾。留歡難永夕。分首林塘西。芳草傷心碧。

有所思

物茂卿

冉冉白日徂。坐看庭草滋。朔風吹我裳。嘆息歲暮時。人生自有老。老至亦何悲。富貴儻爾來。榮名非可持。置酒高堂上。聊以娛佳期。秦箏聞胡笳。嘈雜侑我卮。酒酣淚如霰。君子有所思。良朋滿四坐。此悲少人知。

古風五解送縣次公還鄉

同

遠道三千里。所歷鬱糾紛。名山與大澤。况復出白雲。白雲巧虧蔽。何以能望君。一解 君行從五馬。道路有輝光。君歸還鄉里。妻孥樂一堂。君行誠不惡。居者徒悲傷。二解 我無黃鵠翼。安能從君游。君馬嘶西風。徘徊不能留。人生都如此。誰抱千秋憂。三解 去矣策君馬。北上岐嶺巔。回顧中原色。芙蓉高燭天。是我送君意。皎皎遙爲懸。四解 艤舟廣陵渚。君亦援瑤琴。聽濤寫妙散。微我孰知音。

贈我非此物。何以慰我心。五解

縣孝孺

踰碓日嶺

西登碓日嶺

反顧吾孀鄉

吾孀渺無極

烟樹帶朝陽

征馬慘不進

行人憂且傷

躊躇弔古昔

孀不可望

【此用日本武尊之語。眷戀東都友社。章短而意長。風流可嘉。】

同

八月十四夜青松館集 二首 節一

微微生雲間。眼、昇中天。清暉耀萬戶。素影落百川。樹咸冒瓊瑤。人俱比神仙。對此誰不娛。疣痂復爲蠲。瞻望經幾人。輝光無間年。良遇苦難值。歲華逝不還。美酒宜忘老。晤言誠可歎。終宵樂未央。明夜許蟬聯。

服元喬

人日登臺

城南有高臺。乘春且登臨。春風吹萬物。光澤動園林。况逢人日嘉。繁華自可尋。宮觀何鬱鬱。闐闐麗城陰。車馬多貴客。歡娛愜賞心。剪綵競相贈。奇巧直萬金。顧此應和氣。蕩滌開懷襟。寄言幽谷鳥。亦應改好音。

同

答田彥愛二首

秋風摧庭樹。白露復爲霜。感此變衰候。中心坐悲傷。鴻鴈碣石來。遠過濱海鄉。爲我傳尺帛。中

有相思之長。故人憶在昔。旦夕金門傍。冠佩何委蛇。司直稱賢良。不意浮雲變。沒迹天一。方時物怙春和。夕日回朝陽。且勉爾遜志。願復愛景光。

其二

同

故人從遠方。遺我蒲萑席。清潤冷且柔。殊勝錦與璧。歲晚養吾老。偃偃愜枕藉。臥見秋雲馳。感念江湖迹。一席尚可卷。我心不可釋。此物出君手。永言護愛惜。

奉答越君瑞先生見懷二首

同

燦燦機中綺。佳人裁爲衣。遺我展殷勤。被服發光輝。衣上錦繡字。織出以相思。忽見感君心。恐令傍人知。不如藏之固。且待歡娛時。

二

同

昔栽畹中蘭。隨時發芳香。盛年忽一逝。憔悴徒憂傷。凜凜歲且除。耿耿恨夜長。悠悠遠遊子。短褐寒無裳。思此青雲士。愛慕在景光。鴻鵠自千里。逸翮何縱橫。爲我謂鴻鵠。四海誠難忘。

餞別于士茹歸西京

原詩四首。今選其一。

同

笑言不斯須。曷爲復西行。遊子戀家親。感念發中誠。儼裝將即路。跪申別離情。離情各更深。別筵羣友生。絲竹互且起。中厨酒尚盈。門有將辭馬。蕭蕭自悲鳴。合坐慘直顧。慷慨激歌聲。

詠懷

高維馨

寒暑互代謝。奄忽歲云除。凝霜被庭樹。百卉咸凋枯。慄冽北風厲。吹我蓬葦居。短褐不掩胷。攬帶起踟躕。浮雲逝不返。頽陽逼桑榆。人生天地間。少壯左斯須。朱顏忽已改。玄髮一何踈。願借黃鶴翅。高飛翔太虛。

早春贈宮子雲

同

汎汎長流水。白日照江春。徘徊芳洲上。隨流采白蘋。馨香可以贈。遠道思佳人。佳人不可見。惆悵望青天。關河阻且長。執手將何年。憂傷使人老。雙涕霑衣巾。

【子式古詩。風韻有餘。但摸擬太過。所以爲累】

僧原資

落日下高臺。餘照翳更微。江湖漫無際。客心轉淒悲。豈曰無舟楫。故鄉不可歸。不歸何以爾。中心有所違。木葉蕭蕭下。商飈飄客衣。惆悵思所愴。歲晚損容輝。

【蕙菴辭藻雋拔。近體固當行矣。若夫古詩。則雋語或害古意。此章婉雅可嘉】

字鼎士新

少年執銳志。多病欲何爲。林叢幾榮枯。綠髮漸成絲。寧及饑與渴。沉淪愧明時。客來歌相和。同調有瑱簾。瑱簾各自奏。囂塵暫相遺。羨彼巖穴士。心事夙自知。

春夜宴野氏莊

服天游 蘇門

解道良宴會。幽墅娛佳賓。蘭燈繼白日。晤言心曲伸。相對酌金罍。何辭杯行頻。四時相推轂。奄忽復值春。朱華覆綠水。惠風徐轉蘋。鴻雁何嗷嗷。求友在河濱。茲夕知何夕。逢斯賢主人。勸我以美酒。贈我以奇珍。奇珍果何物。瓊瑤絕纖塵。

擬古

劉維翰 龍門

涼風吹羅幃。皎皎月復圓。空牀攬衣起。徘徊私自憐。故鄉信可樂。出門不能旋。踟躕西北望。一身悲棄捐。衰老唯涕泣。歸鄉及盛年。

枯魚過河泣

秋儀 玉山

枯魚過河泣。出河歎不神。我乃白龍子。魚服遊河濱。一被豫且辱。遂喪騰雲身。委尾伏豆俎。翹首語庖人。莫教割我腹。我腹葬忠臣。

【結句突奇。若為古詩之結句。有傷風雅。此為樂府古歌擬作。所以為妙。】

晚歸

同

川上看欲暝。餘紅在層巒。彎彎初弦月。艷艷暮寒。岸遠行人小。村幽獨樹團。喚舟沙際立。秋水正漫漫。

九日諸公見過林亭

同

弱齡戀中林。棲遲杳以深。白雲來庭際。英英覆鳴琴。巖壑收陽彩。水木含夕陰。茲焉集好友。綢繆

寄賞心。芙蓉灼柔翰。薜荔間重襟。况有芳菊酒。酌言發長吟。世事勿復道。且坐聽秋禽。

詠史

服元雄 仲英

太古濟斯民。神聖降蒼穹。乘龍翔紫海。正域鳴谷東。四隅三萬里。車書長一同。日升臨六合。光自我邦通。赫赫耶摩都。爰作樞原宮。皇基何所卜。世祀傳無窮。

燕子

同

燕燕雄與雌。雙來止我堂。故巢幸猶在。振羽一廻翔。今年復就此。此栖不可忘。辛苦含泥土。東西頷且頰。身微志亦小。蓄租安一梁。哺成五六子。呢喃口正黃。所願秋節至。歸歟共相將。鴻鵠非儔侶。何羨冲彼蒼。

哭源稷卿

原詩四首。此選二首。

松崎維時

秋風動微涼。草木稍凋落。寒暑更徂遷。之子歸幽宅。感物傷舊遊。結交念夙昔。在我總角時。忘年自相索。許余以國士。投分義不薄。兼復通家好。一身共休戚。海內多友生。豈伊歎寂寞。人世知己希。神期不易託。冉冉老將至。安得同心客。年命如飈塵。詎云幽明隔。

其二

同

已矣音容邈。悠悠無還期。送子出中野。淚為永訣滋。論交三十載。緬懷疇昔時。疇昔趨庭日。與子每追隨。時或侍公燕。並坐庇華棨。直暇數相見。歡樂不知疲。汎舟遵北渚。醴酒臨西池。宴

間爲相語 千載長若斯 俄然隨物化 百歲誰能持 慟哭動黃泉 惻惻不能辭
【稷卿墓碣 行狀 遺稿序 並君脩撰焉 蓋知己之感然矣 此詩非無疾而呻吟者】

古意

伊藤縉君夏

貧賤寡知遇 終年獨閉門 區區自束縛 鬱鬱與誰言 丈夫心一冷 百計不能溫 所以窮途士 慷慨有悲嘆 所悲同衆人 白首老邱園

詠懷

同

南山有黃鶴 將雛恆苦思 一步一回顧 飲啄每相隨 一朝飛北溟 形影遠相離 渺茫雲海路 棲息未有涯 羽翮摧將墜 哀叫一何悲 借問何所求 嗟嗟常苦饑 安知舊巢處 得不覆且危 群鴉鳴無謂 啞啞集昏時

即事

同

環塔塵埃中 四壁東風至 憑欄偶披襟 春鳥動詩思 園柳生暖靄 庭燕還新翠 節物看如此 幽憂依舊萃

夏夕讌會

同

日夕孤霞滅 衆賢共舉觴 朱花臨綠水 隨風冉冉香 解劍放遊矚 素月出東方 晶晶天宇淨 嘉樹引流光 金波流不盡 星彩散陂塘 麗藻互相酬 惠言蘭吐芳 良夜難常遇 佳人安可忘 懽娛

不及時 老大徒悲傷

東山遊

柳美啓

步屨東山麓 春風襲人衣 野梅無數落 林鳥一羣飛 煙樹遠陰映 山光含霞暉 春來事幽討 勝槩今不違 徑蹊窮人迹 憇息思所依 陟巒投亭子 晴軒坐翠微 下窺指祇林 流眄盡京畿 遽然幽意伸 稍久都忘機 朗吟復舒嘯 不覺遊侶稀 林巒忽暝色 頽陽照半扉 自酌馨柳瘳 沈蕩此忘歸 安知宿醉解 明日覺昨非

秋初雜咏

原詩數首。今選其一。

同

候晴觀星斗 露坐軒南頭 暑徂天欲澄 節早火已流 明河一匹練 脉脉牛女愁 列宿如貫珠 機轉何曾休 推步非吾事 弄象聊遣憂 熟視斗牛懸 懷古獨悵然 世豈無神物 無復張茂先

秋日遊山寺

皆川愿

來攀招提境 寶塔跨煙霄 磴道從山麓 疊險入岩巖 惟昔遯跡者 創基擇高超 護法多神佐 伐木去衆虺 遂移鎮海寶 永使白雲朝 門樓丹青落 碧瓦撐風颺 鐘罷蒼鷗叫 秋天空寂寥 巖廊嵐靄積 松竹籠翠綃 殿上金人像 趺坐閒無聊 迴觀衆峯外 寰區何曉曉 大都名利耳 塵俗無時消 寧復知有命 淪胥就枯凋 尊沓真可厭 相避誠有繇 萬古被緇徒 宜矣據幽椒 但我憂世者 志欲拯溺澆 巖谷雖洵美 不敢易唐堯 三十頗閱世 憤憤時見撩 斯境多幽邃 百物形迢

迢。尙期屢繼至。湧泉滌濁器。

羽林騎閨人

乳鴉啼庭樹。落日挂齋隙。良人出建章。銀鞍照紫陌。放歌青樓中。千金恣一擲。酩酊終不歸。起見秋月白。含情坐閨中。垂涕竟終昔。

【語意俱古。藹然樂府遺音。可稱。但非深于詩者。無解此義。】

招隱

世途何紛擾。人情頗局促。舉手謝朋儕。薄言歸幽谷。結廬依林壑。把琴操古曲。長松懸我幘。清泉濯我足。青春啼鶉賦。芳草萎已綠。薜荔自可披。豈必待錦繡。薇蕨自可飽。何須饌金玉。寄言語同心。臨岐何了了。請解蘭纓縛。山林縱所欲。

憶尾生

同

林園方夏首。蔥籠卉木深。永晝讀書罷。緩歌弄素琴。踈籬來爽氣。綠陰多鳴禽。情人一判袂。睽違劇商參。索居非我志。戚戚傷中心。焉得晨風翼。爲子寄徽音。

詠懷

龍公美

秋風千里至。颯爽夜何深。耿耿不能寐。馮軒獨微吟。仰觀雲漢皎。斗斜月亦沈。中情難具陳。惻愴撫素琴。絃絃急且苦。凄其發哀音。千載鍾期逝。誰能知我心。

折花

鳥宗成

園林求春色。東風花滿樹。將折高枝花。却露卑枝露。豈厭露滴身。聊欲贈佳人。強攀一枝去。已滅樹頭春。

謝和州南溪師來訪。見惠團扇。

同

投我南都扇。宛似三笠月。一揮清風生。飄飄奪炎熱。別後憶君時。懷袖頻出沒。出沒君不見。遙望白雲窟。

【浪華諸子。不喜踏襲。其識卓矣。但勤去腐陳。易流纖巧。或反近淺俗。近體猶可也。古

詩蓋遠。此二章工鍊可嘉。古意則我不知也。】

坂越寓居歲晚作

赤松鴻

一去江海上。遂與世人違。詩書從我好。富貴非所希。曳藜出村巷。倚樹獨依依。朝看白雲起。暮見倦鳥歸。釣叟相迎語。投竿坐石磯。不說人間事。但說溪魚肥。匆匆歲云暮。雨雪故霏霏。縑袍適身在。不復畏寒威。

送赤松大業西歸

原詩六首。今選其一。

岡思潛孔彰

千載如旦暮。萬里爲比鄰。古來丈夫遇。自是異常倫。神交在夢寐。天涯益相親。大業國鸞長子。國鸞今老子家。大業代父爲赤穗文學。自東都還播州。○此篇僅三十字。而

銳氣勃勃。活動紙上。孔彰大業。並青年官仕。不失本色。所以最佳。】

歲晚作

春政紹

窮臘雖多事。隱居無所營。擁爐風雪裏。開卷慰餘生。鶯兒來庭樹。待春未發聲。上下寒柯際。似問我幽情。男婦時薦饌。炙魚兼菜羹。一飽膝幼孫。坐睡又起行。老夫唯與汝。間應待新正。

【真境真情。以故太朴而不失深厚之氣。所以爲佳。】

雜詩二首

清絢

長安多俠客。被服艷綺羅。中堂置美酒。佳人勸且歌。歌聲既妙絕。嬌態亦殊多。四座方懽呼。遊子竟如何。中心懷救水。死生豈有他。所懷猶未就。忽忽歲年過。強飲不能醉。持觴涕滂沱。

其二

同

西山有桂樹。根幹託岑嶽。雖無桃李艷。不使雪霜侵。如何斧與斤。荼毒日相尋。勁直雖自將。芳馨恐銷沈。一旦裁華館。培養恩遇深。青松與翠栢。矧又契同心。永侍君子庭。凌雪方自今。

曉發木下驛

同

山夜正寒凜。欲曉偏難睡。蓐食更衣裳。把火照行李。月影尚啣山。村中人未起。隔牆謝主人。辛苦渡溪水。澗道次第高。群山何累累。回看過來村。森木朦朧裏。

東郊步月口號

江邨秉愚亭

晚歸東郊路。徐徐負手行。吾影忽在地。月華背後生。學眼薄霧合。山野似水平。霽來須臾際。輝輝萬象明。山容頤秀媚。水光亦澄清。數曲沙堤上。陰蛩草底鳴。灣頭大柳樹。踈翠漸相迎。下有賣酒店。一啖酌青巵。

立秋前一夕。陪君錦先生。汎舟掠湖。

柚木太玄

斜日城南路。陪從赴巨椽。避暑偏宜水。避喧命野航。已遶林篁際。忽到水中央。回瞻煙水澗。胸襟一茫茫。天宇澄夜景。燦爛月湧光。遠近菱荷淨。清風復送香。蘆管時一發。逸響中清商。測得秋節逼。夜深骨髮涼。蕭然人境隔。曠乎物相忘。因悟乘桴志。無奈取材妄。

古意

永忠原

秋風蕭瑟至。入我良人裳。良人今何處。遠征在遼陽。戚戚城南婦。歲歲守空房。砧杵催搖落。白露看爲霜。皎皎雲間月。照我羅帷牀。相思不能寐。中夜起彷徨。仰見連飛鴈。何曾繫書翔。愁心兼愁夢。難奈秋夜長。

鸚哥

僧顯常

鸚哥產南海。今在日東邊。彩綉驚千目。五色一何鮮。故林失伴侶。萬里受拘攣。條鎖繫其足。軒檻阻風煙。衆人尙異物。吾意獨爾憐。瞻彼雙飛鵠。千里一翺翔。豈無羅與網。逸翮何由殃。文章世所重。文章祇自傷。

冬夜懷高雄某上人

僧慈周 六如

微霰鳴暗竹。窓燈人未眠。忡襟鬱不開。聽鐘眺遠天。北山有高士。抱朴慕先賢。先賢雖隔世。冥通欲比肩。遙想當此夕。望月方出禪。因憶曾遊時。雨霽秋色鮮。理策臨郊野。郊野綠芊芊。落日林光媚。孤石激清川。紆直沙際路。寺門散香煙。相迎願清供。洗鉢掬飛泉。咲言促蘭席。白露湛池蓮。濡翰題麗藻。暮霞落彩箋。此遊已陳迹。忽看月再圓。清輝逼離人。斜漢心與懸。層城雞聲發。悠悠夜如年。

高雄山賞楓

烟柳安 黃山

城西勝槩地。楓樹稱高雄。遙望宕山麓。連嶂鬱青蔥。隱映霜林見。邈迤苔徑通。澗水激危石。溪橋落彩虹。躋險步石門。披雲上梵宮。磴道崎嶇聳。空翠濕濛濛。三絕觀寶鐘。懷古感那窮。坐臨千仞壑。俯瞰萬樹紅。參差綺散波。爛熳錦敷叢。淨地絕人寰。造物別施工。把杯暫憩軒。夕曛吟晚風。真境殊多致。忘歸語山翁。

日本詩選卷之一終

日本詩選卷之二

平安 江 邨 綬 君 錫 著

姪 清 勳 公 績 同校

受業 永 田 忠 原 俊 平

七言古詩

老少年行

源 瓊 白石

【自注云。老少年草名。一名雁來紅。又有一種十樣錦。一名錦西風。】

西風吹老老少年。白雁來後紅娟娟。霜葉真勝二月花。雲錦新裁十樣箋。老年準擬少年時。不恨當筵舞柘枝。仙姑雙鬢如鳥爪。妖姬三少是鷄皮。白頭吟罷人愁絕。楊花徒思楊叛兒。君不見東家阿嫗年七十。夜來向市買燕脂。

謝泉南唐生所贈棉布因憶南紀祇伯玉

同

南方舊聞木綿花。奇卉殊勝桑與麻。三尖楓葉未染霜。一寸葵心欲傾陽。瑤池蟠桃子正結。金堤楊柳花如雪。蚪殼剖時迸珠淚。鸞群闌來飄素毳。人間一葉碧梧飛。泉女夜織月前機。初傳海上珊瑚市。應換山中薜荔衣。美人所贈我何酬。南望側身歌且愁。君不見都布單衣公孫述。馬援到日不樂留。可憐老去心空壯。却爲平生憶少遊。

【剪裁至巧。而不見痕迹。天造之妙。所謂別才。】

咏鸚鵡

祇園瑜

隴山有鳥名鸚鵡。芙蓉爲冠雪爲羽。朱樓繡戶何時栖。玉璣金籠誰是主。隴山萬重夢已非。海外相望儔侶稀。人語學得更禽語。好學花間不如歸。

咏紅梅

同

【自注云。花名未開紅。在京師誓願寺中。相傳官女和泉式部所植。】

美人在時人如花。美人去後花似人。花尚呼成未開紅。人去難逢三五春。東風夢覺悄無語。枕痕潮頰朱未勻。腸斷春去花亦老。紅雨狼藉撲錦茵。

雨竹

同

虞帝南巡不復還。千歲遺恨湘水間。蒼梧雲深雁影暗。竹上啼痕空斑斑。孤舟夜宿煙水浦。萬竿秋倚白雲塢。客心半夜夢難成。鷓鴣啼斷枝枝雨。

【南海畫竹諸歌。及詩畫歌。篆隸歌。富嶽行等。最得意作。數書貽人。並長篇大章。波瀾縱橫。

世稱傑作者。非不傑作也。但縱橫太過。規度多乖。以故不收選云。】

謝美濃部氏惠雜花

梁田邦美

維揚紅藥雨後催。千朵朝捧仙雲來。燕子花開水中央。微風欲上玳瑁梁。美人艸色豔態齊。至今楚歌悲虞兮。白及風流不媿蘭。恨無幽香度畫闌。名園四月清和天。攢玉光生藍田煙。主人折來插竹瓶。錦字併寄子雲亭。玄經草罷鬢已華。一別青春不見花。此日何幸逢芳菲。醉倒樽前胡蝶飛。

答桂彩巖

同

雞林才子玉堂仙。冠佩風生筆如椽。青天白雉弦齊發。知君鞞囊相周旋。柳絮舞風滿郢里。芙蓉插空照江水。鴻臚半日百年心。兩雄相許有意氣。海曲梁鴻色欲飛。煙浦徒望星槎歸。孤嶼齊沈帆影薄。落木寒岸露沾衣。嗟吾白首宦天涯。無因金城觀國華。黔驢一生不知虎。聞林豐草伴麝麝。簿帳如丘君休厭。文章依然有光焰。車輪馬足萬斛泥。不蝕真人青萍劍。朝遊樊桐暮縣圃。巖下電鏡射千古。藍玉案高燈結花。紫石潭寒雲散雨。吾夢回輸入函關。咀嚼桂香輒忘還。鶴鶴原上道如髮。卻迷煙月滯南山。南山叢桂誰攀得。蕙洲蘭時無顏色。獨有隴頭一枝春。聊附驛使傳消息。

讀赤城義人錄

桂義樹

蒼天空洞不能言。狂瀾代鳴國士冤。陸續忠肝四十七。海上精藍易黃昏。二十年前春風殿。一念殺人羊觸藩。國破家亡何顏面。廷尉三尺不足尊。千金散盡武城市。鐵椎夜叩仇家門。滿庭白雪踐爲血。快劍斬斷長蛇元。歸來松楸一哭足。甘心伏誅入九原。寒山風雨點燐火。或將孤月弔英魂。此輩平生衆人遇。一死唯知酬主恩。却笑橋下漆身者。多少計較向人論。

看花有感

湖元泰

昨日催花雨。今日落花風。艷陽三月花如錦。家家誰不醉春紅。花開花落知幾日。一夜東風吹作空。玉環飛燕俱塵土。到此妍媸亦相同。請看紅顏子。今作白頭翁。安得長白頭。不如拊髀伴鴻蒙。中有老蔓粘枝死。何事貪婪不知終。飛乘春風最可憐。有似去從赤松仙。落隨流水亦可愛。有似去泛五湖船。自古急流貴勇退。向花欲問花不對。君不見英雄士兮殊麗人。晚節往往呈醜態。

【急流勇退四字。此篇眼目。亡何栢山乞骸退老。誅茅負郭。名賜問亭。可謂不負前言。】

春江花月夜

堀正超

浪華江上梅花樹。南枝開遍及北枝。浪華江水接大海。西海南海無津涯。春潮連江江不流。夜月纔生光陸離。江花江水相掩映。江上春色更熙熙。昔日仁皇此營都。虞廷揖讓衣裳垂。萬井皞皞人煙暖。江花獻笑入麗詞。龍馭一去空千載。高陵松柏雨露滋。豐王重築浪華臺。金湯不脣亟關噉。駕御龍虎在掌握。威名赫奕震華夷。代換臺空復何見。唯有江月閱榮衰。江月有待夜夜明。江花居然年年披。

江水猶不舍晝夜。萬古滾滾無盡時。仁皇邈矣豐王逝。人世興亡忽可悲。此時須記春江好。春來勿

誤花月期。

【春江花月夜。世以爲隋樂府。不知陳時已有斯曲。唐人演作七言歌行。已異本辭。景山斯篇

特浪華懷古耳。】

煮茗歌

字鼎

衡門客去秋夜長。紅爐煮茗愛清香。陰蛩吟絕秋將盡。高樹風空夜未央。窓前明月影漸沒。轉聞爐上松風狂。松風裊裊狂且細。也堪相和弄笙簧。清高便擬山中相。時見浮浮白雲揚。此物有權兼有力。未問神仙金玉漿。却笑當時陸鴻漸。著經著論事何忙。獨坐自斟還自飲。飲罷猶自玩遺芳。忘却心中不平事。五更燈火對空堂。

少年行

藤煥圖

五花良馬沫如雪。平明繫向杜曲樓。絲管紛紛春日短。燭影沖天听吳歎。白龍魚服誰能識。意氣分明稱貴遊。歸路直就劇猛飲。彈丸探罷縱博局。君不見百萬輸却顏色壯。身上還着鸚鵡裘。

【東都貴遊。間有微服遊狹邪。白龍魚服。蓋有所指者。】

太宰純

神巫行
宕邱之山鬱崔嵬。朝雲暮雨去復來。宕邱巫女何姣麗。弱質婀娜倚高臺。長者二十少二八。恰似芙蓉

並帶開。金釵玉簪羅衣裳。環姿瑋態極容光。耀若日照屋宇。皎若明月臨池塘。聯娟雙眉不待畫。花顏豈假紅粉粧。晒暎已含無限意。一顧斷盡萬人腸。儻遇吳王便傾國。即入漢宮定專房。清歌妙舞真絕倫。起雲行雨信有神。城中紛紛禱祠者。投與金幣如埃塵。那知蛾眉能伐性。况復尤物尤傷人。須臾神升歌舞休。美人歸去不回頭。陽臺夢覺無消息。依舊雲雨繞宕邱。

聞笛

服元喬

二月梅花洛城東。欲落不落待輕風。君不聞風前笛裏情。翩翩吹滿洛陽城。吹者不知聽者恨。三弄都作斷腸聲。

漢宮詞

同

漢武英風驅一世。升平殷富極壯麗。當時丞相設離宮。詔賜經營北闕第。第中行殿十二重。萬金爲給大司農。四時恒例移仙仗。滿朝百官從六龍。甲乙帳前奉娛歡。經筵且開進賢冠。儀具禮畢始賜宴。笙歌響起青雲端。八珍携從太官膳。內府更進白玉盤。瑤階灑迤百花春。春醴薰薰醉君臣。醉來不辭獼猴戲。列侯御史中貴人。天顏有喜咫尺地。羅綺錦繡傾恩賜。內外臣僚及侯家。拜舞盡擊金玉器。謹呼萬歲樂未央。忽復耳傳全盛事。君不見汾上歌。歡樂極兮哀情多。只今秋風茂陵道。草木黃落舊山河。

【詳詩意 託言漢宮 追詠憲廟時事 典麗雋壯】

早雲寺覽古

同

臺殿松杉入空翠。巋然獨存知何寺。云是黃金長者園。唯有青苔布滿地。古木森森歲月長。野人爲說全盛事。綺羅春殿舊時花。墓草碑苔冢累累。空伴名號列五公。剝石一看皆涕淚。憶昔永正元龜中。天下車書久不同。萬邦瓜剖相吞滅。龍戰虎爭誰不雄。就中勃興北條氏。一朝割有海沂東。累世子孫功業繼。八州草木共偃風。大城列峙精兵饒。晝擐金甲夜鳴弓。氣籠山嶽風雲起。勢捲波濤江海通。何意中原出霸王。一旦長驅入封疆。石垣山上臨闔境。震擊天雷不可障。計窮面縛悲瓦解。城池社稷共喪亡。即今四海日月新。此地爲餘供香人。關門行路通大嶽。弔古且過溪水濱。野店山橋無情甚。往來屢送馬蹄塵。

難波客舍歌

同

八間樓上南去客。八間樓下北來舟。問君駐舟自何處。東極江都西帝州。問君此去向何處。難波風俗甚壯遊。城闕邑屋海雲邊。五方雜錯萬國船。江南江北青樓女。到處隨意擁花眠。勸君鸚鵡杯中物。一杯一斗斗十千。勸君行樂好自愛。明朝回首各風煙。

【情致宛轉 而駕以平調 唐人遺範】

高維馨

園中栽花盛開

護洲之北孤草堂。百畝爲園人逕傍。去歲移樹培根株。今歲着花吐芬芳。彩雲爲幕花爲障。滿林爛熳占風光。長條短梢花如霰。紫榮素芬使春遍。梁王繁蕊苑遊。石家風流金谷宴。兔園金谷何足榮。

金綠叢中寄此生。春芳盛時多謝客。閉門日愛百花明。黃鳥來窺列樹間。求友追飛何嚶嚶。落花堪勸杯中物。風來點衣不可拂。目送落花惜開花。可惜春色在貧家。明歲亦應逢花信。羞殺老來鬢有花。

姑蘇臺歌

田憲章 子漢

勾吳雄圖動四郡。越王戰敗遂稱臣。枉使西施奉箕箒。西施顏色更無人。嫣然來上姑蘇臺。姑蘇春滿百花開。君王此處設盛宴。日擁西施醉不回。採香徑畔春風香。春風搖曳綺羅裳。清歌妙舞觀不厭。長夜飲酣傾金觴。金觴玉壺酌不盡。曉月斜懸響屧廊。年年歲歲偏歡樂。那慮此地荆棘荒。賴有忠良姓是伍。屢進直言棄如土。無端越寇白日來。戰鼓瑟瑟罷歌舞。姑蘇城郭風塵起。豪華一朝何處是。寧忍甬冬主百家。千乘國破空到死。君不見見宴晏毒國國所憂。不獨姑蘇麋鹿遊。

寄島子行

劉維翰 龍門

故人去年別我去。今年故人知何處。千金買醉不辭貧。繫馬青樓楊柳樹。都門微雨春草迷。郭外桃李自成蹊。聞道君住城南陌。玉壺春酒那得携。

春鶯囀

秋儀 玉山

二月三月春欲暮。桃花李花開滿樹。洛城東南亂鶯鶯。綿綿蠻蠻隔花鳴。蹴花條忽高枝去。啣花宛轉低枝語。百囀相合落花邊。一聲忽流刺繡處。玉箏共調漢宮姬。金梭同擲秦川女。夢裡聽之斷柔腸。

碧紗朦朧窓初曙

鍾馗掣鬼圖

同

深山之阿夕出雲。淒風苦雨鬼成群。小鬼跳梁大鬼笑。高明之家來去紛。終南高士面如丹。青袍烏靴峩其冠。十圍腰間三尺劍。小鬼大鬼肝膽寒。君不見白日擲揄鬼如林。不獨女蘿薜荔陰。

【此等題詠 易流詼詭 此篇字字典故 巧而不俳 可謂高手也】

秋夜吟

服元雄 仲英

秋夜蕭蕭秋雨聲。枕上燈下夢難成。愁緒萬端將告誰。臥床展轉祇自知。蟋蟀三更鳴不罷。坐疑子細解我悲。

羽林郎騎射歌

同

漢家英主登祚年。承藉奕世文物全。南夷北戎盡賓貢。車軌一同通八埏。今時豈有征討事。當場簡閱習周旋。鸞輿朝出上林苑。霞際幔城三月天。千乘萬騎爭扈從。細柳新花御道邊。羽林親軍知幾隊。良家諸少誇控弦。繡幕如雲金作埒。春光照耀錦鞍鞯。龍種養得試神足。飛兔腰裏氣翩翩。步驟並轡齊應範。奔逸絕塵誰後先。繁弱之弓忘歸矢。一馳縱送各參連。巖下電激光決眦。滅沒唯看過隙駛。楊葉百步何足論。風裏鷺毛達其志。行止非關金鼓聲。申令嚴肅不亂次。講藝人人堪競雄。精鍊偏稱至尊意。恩詔晚自有司傳。拜舞共受黃金賜。

【此亦追詠德廟時事】

送大泉大夫水明卿

松惟時

四牡駢大道側。玉鞭維帕黃金勒。大夫跋涉一何勞。萬里東歸大泉國。大泉富彊不可當。山河四塞固封疆。羽吹夏翟傳禹貢。肅慎石罌遺職方。大泉先公周召功。神祖賜履齊魯封。分土風雲雄東夏。帶礪誓存磐石宗。大夫學術經今古。丹心許國思報主。九言可觀子大叔。三命益恭正考甫。列國名卿動相聞。為政風流有如君。非但閑燕成髦士。兼將內政寓三軍。若道詩書不足論。卻穀何得上將尊。明年擁節朝京國。君看輿誦滿東藩。

驛舍書懷

僧大潮

客居蕭索傷遲暮。夢遶青山引歸路。豈意青山勝事違。曉猿夜鶴啼祇樹。紅稀綠冥晝冥冥。雨濕雲深草色青。人道年年春不管。自憐歲歲向離亭。

【音節杳渺。如怨如慕。無香火氣。又無烟火氣】

七夕詞

伊藤縉

白紵新裁諸女兒。玉腕繚繞五色絲。含嬌爭上乞巧樓。樓上高褰翡翠帷。絳河一帶月欲流。烏鵲雙飛玉露秋。誰道牛女津梁阻。一年相思一夕休。君不見人間咫尺行路難。禍福相尋指一彈。薄命紅顏難自持。誰得年年永相歡。

題崑崙石

同

聞說崑崙天下奇。假令圖寫亦應疑。爭如造化巨靈手。鑿取雲根挺玉姿。陽崖陰嶺都紺碧。孔隙嵌空玄玉光。神物一朝落人間。遂為風流靜者藏。自誇仙訣須此求。相對含杯坐春樓。春樓日暖雪初盡。瑞氣緜緜繞酒浮。醉去頽然對石眠。夢中忽上閩風巔。金母碧桃何必問。咫尺層城一萬千。觸目琳琅洗六塵。睥睨乾坤作近隣。不妨為宦混朝市。時作眠雲跂石人。

題桃源圖

柳美啓

爛熳桃花寫如真。武陵風物絕世塵。人間空想桃源趣。豈知桃源慕往春。一自溪頭送漁客。千載無復迷花人。

【一翻古今套用故事。景境自新。而不見痕迹。妙妙】

芥煥

懸壺館歌自注云。贈劉長叔。

長安城中大道衢。壺公賣藥此懸壺。壺外戶庭不滿丈。壺裏宮館綴珊瑚。羽人仙客常會集。麒麟為羹龍為醢。流霞瓊液醉相勸。玉簫金管奏共娛。借問咫尺紅塵陌。已來當年費令無。

流螢篇

松秀雲

清夜追涼上水樓。樓前忽見螢火流。誰道眇身生腐草。熠燿含輝著簾鉤。薰風颯颯吹不已。冷焰高低更相倚。粧點菱花明似鏡。穿過楊葉疾如矢。楊葉菱花太液邊。飛來飛去照綺筵。越女爭撲輕羅

扇 銀燭明珠空妬妍。獨有幽人守陋巷。十年伴汝照詩書。詩書讀罷人不識。更憐螢火來起予。

雀羅篇

同

歎雀羅。門外無人感慨多。百年榮耀一場夢。其奈今朝寂莫何。紆青拖紫何處客。乘勢起家二千石。平明飛鞚入形闈。幾人望塵追馬跡。一朝失勢墜青雲。飛鳥鍛翼魚脫鱗。長衢日暮獨歸處。故舊相看如路人。炎炎威去誰炙手。遊子行歌不回首。君不見翟公題門絕送迎。一貴一賤見交情。

長相思

龍公美

長相思望長天。梧桐秋落金井前。西風蕭蕭明月懸。牀下虫聲斷復續。孤燈華結夜若年。西方美人在天邊。上有鴻雁下鯉魚。鯉魚鴻雁不可傳。憶之愁心徒飛揚。關山何處路三千。長相思夢未圓。

答劉文翼見寄

赤松鴻

東方佳人絕代姿。顧我雲錦寄西垂。披緘清香散案上。五彩飛動光陸離。西東路阻三百里。寄來空中經幾時。時去時來不得見。悵然空感歲年移。憶昔武陵溪口花。金盞玉壺醉君家。歸來投竿寒江雪。或隨樵者伴麀麇。誰憐憔悴添樵間。上國繁華無由攀。

長安道

烏宗成

駐馬灞陵頭。遙望長安道。陌上紅花映白日。青樓楊柳掃碧草。花柳如錦春可憐。唯恐行樂使人老。

浦島行

平九齡

君不見浦島太郎釣鼈處。釣得巨鼈化作女。情好婉孌為夫妻。蓬萊瀛洲携手去。珊瑚之枕玳瑁床。仙宮深處娛樂長。蘋藻巧結同心縷。漣漪細織合歡裳。雲車俱朝龍王都。赤螭後乘蛟前驅。水族波臣侍行酒。熊掌猩唇麟為脯。虬笛鼉鼓舞馮夷。奇花珍禽若春時。可憐凡骨不可換。却似劉阮多歸思。夫妻把袂淚不晞。白玉小奩隨其歸。慎莫相開再相見。雲濤路分達海磯。自謂仙遊未周歲。何知人間世代改。偶然長生駐紅顏。七世子孫復何在。江山無恙空吊古。犖犖浩歎失所怙。忽爾驚怪一開奩。白浪皺波滿眉宇。

龍安寺晚歸 寺在播州

赤松勳 大業

興來朝上龍安寺。興闌夕下龍安寺。吾愛行樂屢過此。總是無人解我意。村村落落日將曛。一縱一橫草廛分。獨自行歌獨自笑。回首山頭只白雲。

鏡柄行

清 綯

鏡柄之山大海涯。播攝風煙入望奇。山容海色無今古。人間嘗此覆六師。東方副將源九郎。軀幹雖小謀慮長。大將城南戰未半。潛兵却向城北方。山屏千尺俯城中。石怒沙崩路不通。異體同心三千騎。翻如逸翮下長空。黑風吹起滿城塵。火發雲中散金鱗。十萬西軍如獲薙。馬上簇簇無首人。龍舟出沒海門煙。玉璽無光殺氣懸。勝敗永留青史上。一肱春夢五百年。

白雪魚歌

同

北陸雄藩福井城。三冬雪霰大雷鳴。黑風吹海潮如馬。衝崖轉石勢縱橫。萬艘葉點海濱漁。與波上下似安車。垂天之網如使臂。白雪紛紛白雪魚。進奉之餘不論錢。儋叟先生喜氣偏。紅鱗銀鯽何須數。當稱汝是魚中仙。鸞刀揮處水晶寒。玉椀盛來雲母團。露下芙蓉迎曉月。風前柳絮點鳴湍。松花仙酒金叵羅。為汝何妨滿酌多。白雪歌兮我愛汝。染翰還羞白雪歌。

【白雪魚。即大口魚。或曰吞魚。邦俗稱鱒者是也。北海產焉。冬雪初下。漁者捕之。而其肉潔白所以稱白雪。君錦有羊棗之嗜。因為作歌。】

携諸子華頂良恩精舍避暑得二冬

江邨乘

二三社友忽相逢。左提右携促吟筇。云是城東華頂麓。清涼界裡可從容。大道炎塵如霧起。葵扇揮處亂鬆鬆。赤日射人人欲仆。火雲硤硤壘奇峯。乾喉噴煙汗成雨。細葛何堪毒熱衝。纔到禪關萬翠滴。梧竹槐柳雜杉松。踈檣虛櫺數十筇。玉椀冰漿滌心胸。一陣風颯毛骨冷。滿身煩蒸頓銷鎔。石泉霽沸侵露榻。亂山縹碧當面重。鳴蟬啼鳥真笙管。嘈嘈切切和晚鐘。楸枰碁破山吐月。垂堂揮麈競談鋒。從事督郵遭詈辱。却使酪奴寵眷濃。山月漸高涼逾益。炎帝苛政奈吾儂。可嘆世間輕薄子。漫稱河朔為高蹤。

妓王篇

柚木太玄

維昔平相全盛日。千金不惜求麗質。由來麗質稱難求。會有窈窕佳人出。娉婷絕世名妓王。顧影揚

蛾入玉堂。長袖轉風迴白雪。清歌妙舞斷人腸。斷腸不必歌舞妙。輕態逸姿嬌笑長。朱雀街東綺羅筵。丹鳳城南豔陽天。擅恩專寵誰得比。馳情邀歡誰不憐。自恃恩寵長如此。自期歌舞更延年。歌舞延年豈可期。人事須臾易推移。新歡故愛成涇渭。不知新歡復幾時。春草秋草俱枯死。請爾聽我懊惱辭。新人聽之忽歎息。相慕西郊共追隨。西郊寂歷空山曲。松門蘿逕隔塵俗。樂國金仙是吾師。世上榮華何所欲。君不見當時相府女如雲。千載容色有誰聞。

【服子遷小督詞。膾炙人口。以其殊長篇。故不選錄焉。爾後效顰者。咏小督及妓王佛妓等歌。行長篇。多見諸子集中。雖華藻可稱。往往見疵病矣。仲素此篇。如少讓富麗。其實能守規度。無瑕類可擿。因收之云。】

城南客舍歌

下川貴慶

桃花李花流水傍。淡蕩春風滿店香。良友相携青旗下。欲去不去復行觴。樽前互舞花與蝶。又聽黃鸝囀綠楊。醉態婆娑猶呼酒。不知西山帶斜陽。

春夜送人卜隱湖中

僧慈周 六如

東溪烟樹逗微月。一牕寒梅香初發。深岫三聲兩聲鳥。陰崖去年今年雪。聞說竹嶼卜隱居。烟水僅隔十里餘。湖上山中應相憶。漁笛雲磬共有無。

將西歸預賦贈叡山鈴上人

同

龍盤虎踞舊帝都。天台佳麗天下無。春風三月千峯雪。片片吹落琵琶湖。吾將去棹月夜舟。請君洒掃江上樓。樓下百尺含風漪。臥吹玉笙下鹿洲。

鬪龍灘

播州龍野名勝

巖垣彥明

麗水之陽何奇絕。磊落巨石數里列。憶昔女媧補天時。謾向下土拋餘屑。隕星紛紛化相聚。灘中縱橫如碁布。水際屹立東洪流。怪形奇狀令人怖。神禹命斧鑿難平。仙人揮鞭驅奚行。驚波激揚飛霹靂。玉龍奔騰勢猙獰。噴雪撒霰白日寒。展渦漸轉生回瀾。金鱗鯉裂欲掠攫。紫萍綠藻相旋盤。遊人臨此久彷徨。水光射胸洗心腸。張子泛宅度無術。米家丈人拜不遑。千賞萬嘆一望中。當令淫預在下風。濯足振衣斷岸上。長嘯自覺氣魄雄。

日本詩選卷之二終

日本詩選卷之三

平安 江 邨 綬 君 錫 著

姪 清 勳 公 績
受業 永 田 忠 原 俊 平 同校

五言律詩上

遊銀閣寺

那波方

寂莫將軍廟。無邊草木肥。苔深過客少。松臥古人非。流水幾時盡。行雲何處歸。長嗟山路暮。幽鳥傍吾飛。

遊金閣寺

那波守之

相國遺踪在。荒蹊松竹幽。青山千古色。金閣幾人遊。雲影浮寒水。林聲接素秋。遙憐應永日。臨眺使吾愁。

【銀閣在京城東。金閣在京城北。並足利氏遺構。那波先生橋梓之作。體裁酷肖。二詩在當時可謂合作矣。】

三遊平等院

僧元政

三遊平等院。舉目思淒淒。何謂鳳凰殿。獨成燕雀棲。寶池幽草合。縹瓦古松低。昔日文筵地。向誰問舊題。

草山晚眺

同

愛山頻出門。投杖倚松根。秋水界平野。暮煙分遠邨。露昇林際白。星見樹梢昏。自覺坐來久。蒼苔已有痕。

遊妙光寺

江邨宗珉

城外無塵地。幽尋坐小堂。登山觀遠水。弔古到斜陽。心愜邱樊靜。眼明草木黃。敝衣何日振。處處有高岡。

冬日自尼崎歸京舟中作

同

霜楊橫斷岸。風荻偃寒洲。舟枕不成夢。客愁已上頭。歲華隨水去。世事與雲浮。說與執篙者。莫驚起睡鷗。

春月

松永昌三

共愛朦朧月。微風倚小欄。梨花珠弄影。柳絮雪何寒。遊惜寸金短。坐臻更漏殘。紈思蕩子婦。幽賞倍秋看。

旅夜

太田林菴

關山家萬里。旅夜對秋風。遠笛孤村外。殘燈四壁中。夢遲聞落葉。情懶恨飄蓬。鄉信携來否。月前有過鴻。

早行

安東元簡

曉起試征鞍。驛樓燈火殘。踈鐘來水外。驚鵲遶林端。野渡星初落。斷橋露未乾。前村人尙夢。寧識客行難。

遊清水寺

宇都由的

天畔登高閣。倚欄回白頭。蒼蒼鳩嶺樹。脉脉鴨河流。官舍兼民舍。城樓又寺樓。望中無近遠。富庶帝王州。

泛舟葛野川

伊藤宗恕

欲極西山勝。沂流葛野川。浪圓魚忽沒。枝動鳥相遷。落日紅霞外。行舟翠壁前。風光隨處好。薄暮未言旋。

芭蕉翁邀宴東郊別業

同

勝集祇園北。東山畫裡看。踈鐘生午寂。微雨減春寒。何用千年計。唯憐一日歡。風花漸將少。莫使酒杯乾。

春日偶作

同

病軀非世用。况乃已心灰。鳥几三竿日。膽瓶小字梅。閑詩宜自遣。靜賞任人催。老去寒暄懶。爲愁俗子來。

秀野亭作

原十首選二首

松下見櫟

林外高亭出。背山且傍川。幽閑徵士徑。薄共野人田。環檻春花好。穿牕秋月妍。長生何足學。政爾日如年。

其二

同

亭中無俗物。幽趣一何長。屏護風前卷。鼎添雨裡香。傍籬戲鷄犬。諳徑下牛羊。殿閣無須羨。胡床適意涼。

夏日遊紫雲山

村上友佐

琳宮東嶺下。城市隔雲烟。燈影照沙界。鐘聲振梵天。炎蒸三伏日。風露一牀前。吾輩何多幸。屢來廁法筵。

秋日閑情

同

竹風吹不_レ休。老境又逢秋。身抱長卿病。冷侵季子裘。螭頭無夢到。牛後自堪羞。今夕有奇計。一杯解百憂。

秋日郊行

同

蕭索三人影。相從度野原。溪聲寬酒渴。秋色役吟魂。一壑元吾事。萬鍾非所論。百年如此耳。今日又黃昏。

【余於詩史論冬嶺翁七律。昂昂乎一時。今所錄五律亦自整莊。可謂作家也。】

夏日同遊紫雲山

伊藤長胤

香刹接雲岑。共穿花木深。欲尋方外友。來問靜中心。課業蓮花漏。遺芳薔薇林。從今幾來此。山岳恣登臨。

秋郊閑望

同

一村桑柘暗。千畝稻粱肥。藍水流紅日。白雲住翠微。世途榮願薄。今古賞音稀。尙愧機心在。山禽驚却飛。

早秋郊行途過僧寺

木貞幹

郊村蕭寺靜。涼氣滿簾櫳。老樹千年綠。名花百日紅。詩成午天雨。香燼晚檐風。方外交如水。共憐塵慮空。

逾大內嶺 嶺在丹後州

江邨簡

地勢雄西北 崎嶇傍海灣 溪風衝袂起 磴葉沒筇深 小憇擇平石 窮登數列岑 渚洲烟霧底 頃刻不可尋

火後寄宿妙覺寺僧房

伊藤元基

衡茅回祿後 寄迹蕊蕪園 地僻雲生石 寺貧雨倒垣 松風弘景宅 竹色子鄭軒 倚杖即原隰 不須勞駕言

妙覺寺寓居對月

同

夜來雲雨霽 氣色有餘澄 徙倚珠林月 留連寶地清 松筠含皎潔 臺殿發晶英 若到中秋夕 更添一段明

垂絲海棠

鳥山輔寬

新著清明雨 幽芳發滿枝 無花應誤柳 多緒是非絲 露重憐紅濕 風收見影垂 一春慵似我 少有起來時

浪華郭外移居

同

巷南皆梵宇 無處不樓臺 賃宅移書帙 招隣設酒杯 小池當戶湛 雙井倚門開 僻遠任人說 未妨詩客來

【三四雖非佳境 形容移居頗工 雙井在道頓渠東 俗稱二井者 其東即一帶蕭寺街】

春日遊川崎亭子

鳥山輔門

江上一亭幽 携壺得再遊 爲隣皆竹樹 過岸幾蘭舟 望可憐青草 閒堪羨白鷗 惜春何不醉 况解客中愁

【川崎在浪華天滿橋東北 隔江與網島相對 網島歌船所集 故第四句云爾】

同

八月十六夜集古松館

邀月南牕下 吟魂與露清 一輪雖已缺 萬里不妨明 滿地有松影 半天唯鶴聲 堪追前夕賞 向曙尙飛觥

與二客上東山

笠原龍鱗

偶步東山路 杖藜烏角巾 誰知探勝客 總是愛閑人 十里村村雨 千林樹樹春 浮生各有樂 不獨葛天民

同

寒夜客懷

短景三冬暮 關山萬里餘 飄零因計拙 異俗任情疎 急雪殘燈暗 寒風野館虛 夢中遇鄉友 先問有音書

春月有感

柳川三省

靄靄春宵月。依稀坐水樓。漸從花外上。還傍柳梢流。清影無今古。浮生有去留。空添懷舊淚。不照昔人遊。

對花懷舊

同

年年洛陽道。到處百花新。豈料同遊客。多爲泉下人。露留他日淚。香放舊時春。往事共誰語。躊躇獨愴神。

西泉晚步

同

採藥西泉曲。林巒日欲晡。亂山迷曠野。細水入平蕪。農父行相語。棲鴉飛且呼。不知眼色起。窈窕失前途。

觀獵

同

清世不忘危。治兵此及時。烏雲分部伍。風雪灑旌旗。高鵠應弦落。窮猿抱樹悲。請看渭濱獵。無意獲熊羆。

春日病中作

澤維顯

幽懷無所告。轉使鬢絲多。花已爲新樹。身猶抱舊痾。四鄰春社酒。一路醉歸歌。煎藥孤燈下。癡兒奈汝何。

【五六無聊太甚。結句悲酸。不堪多讀。】

偶作

同

一徑孤村曲。柴扉晝自關。晴郊黃犢集。野水白鷗閑。花傍踈樞發。壺餘濁醪還。百年樓隱地。何必鹿門山。

上巳浮舟望嵐山花

江兼通

溪上尋春日。山陰修禊天。枝低臨絕壁。花密蔭飛泉。浮水觸漁網。飄空落酒船。何須問源去。觴詠樂如仙。

宿釣雪翁齋

同

青燈春雨夜。高枕趣偏長。雖在吳門市。似投廬嶽房。夢驚隣寺磬。醒解博山香。明日花應發。無心還故鄉。

遊西王寺

同

郭外烟村寺。高僧喜賦詩。西郊連密竹。南畝接疎籬。貝葉分三藏。烏藤掛一枝。曾聞裴相國。月下亦尋師。

【寺在京城郭西。東連民家。西南則田野。此詩鋪叙切實。寺奉陽明藤公香火。故結句云爾。】

訪江山人

瀨維賢

一路溪橋外。孤村杳靄中。柳垂前夜雨。花媚暮春風。白屋經年漏。青山與昔同。浮生須痛飲。前路

水月朦朧

遊竹浦

富逸

經盡翠嵐裡。秋風竹浦清。江波微雨歇。山樹晚蟬鳴。寺與塵寰隔。人尋幽處行。壯遊知幾日。真得薛蘿情。

癸亥中秋伏見法藏寺作

堀正超

偶入招提境。更知月色清。行雲風不定。遠水夜逾明。松覆巖人影。蘆深過櫓聲。一生期此夕。能遇幾回晴。

磨針嶺酒樓望琵琶湖

同

湖樓西望遠。鄉思忽紛紛。霞奪神龍氣。波連天女雲。水光含日閃。山影蘸春分。目送晴烟末。心隨歸雁群。

海雲席上次某叟韻

堀正脩

石逕寒潭畔。翩然下翠微。野梅過雪吐。山鳥畏人飛。閑計孤藤杖。老身一紙衣。偶逢林客話。瀟灑竹間扉。

【南湖自少好詩。至老不倦。篇章幾乎萬首。學博才優。號為一時巨匠。其詩清新奇發。警妙不少。但意主獨造。規律多乖。以故難入選錄。可惜耳。】

歲暮

僧百拙

電影歲還盡。朔風五拂裳。鳴鳩三業拙。蛺蝶百年狂。梅塢春須宿。菱花客自傷。明朝如應律。井

凍解茶鐺

自玉壺樓歸途歷馬山但州

同

流水寒山路。絕頂駐奚囊。一帆天影遠。孤客鶴吟長。生熟茱萸駁。高低禾黍黃。樹陰過卓午。歸策尙相忘。

【百拙為南湖方外友。詩契冥合。唱和最多。其詩體裁頗肖。才力亦相伯仲。】

室直清

故園有老親。遊子傍風塵。垂柳千絲恨。飛蓬萬里人。關山朝策馬。野渡暮迷津。桑梓村烟起。依依動晚春。

同

次韻井處士秋夜宴集

良辰難屢得。逸興好凭欄。銀漢雲方淡。金樽露不寒。團圓明月滿。荏苒素秋殘。惜此年華晚。回頭仔細看。

【井處士蓋白石。爾時白石未解褐焉。所以有此稱。】

觀獵

同

東門千騎出。西野百重圍。走狗連麋起。饑鷹接雉飛。風聲驕殺氣。日色肅寒威。壯士尙餘勇。彈

送春

源 瓊白石

春去從何路。花飛處處同。徒窮千里目。長恨五更風。歸意蘼蕪綠。離情芍藥紅。相思無可贈。寄

小集同賦庭上未開梅

同

庭上寒梅樹。枝頭春欲歸。臨風調玉笛。待月撫金徽。素艷猶遮面。幽香未出衣。幸得芳心結。

新鶯出谷

同

幽谷回陽律。交交拂曙暉。梅邊經雪度。柳上帶烟飛。語學玉連鎖。歌傳金縷衣。禁林春欲遍。何

葛城峯

同

天上玉芙蓉。五城十二重。帝畿標巨鎮。神府擁群峯。列宿環朱鳥。飛泉掛白龍。霓旌仙蹕度。時

有羽人逢。【白石自注云。雄略帝獵于此山。而逢仙。事出舊史。】

武庫山

同

萬仞鬱嵯峨。天兵一凱歌。玄雲熊耳甲。紫電虎皮戈。蘋渚沈魂冷。苔碑墮淚多。年年春草色。何處

吉見里

同

雉鳴青野外。犬吠翠微間。桃欲迷前路。桂堪歌小山。數家機杼動。一水桔槔閑。每隨明月到。應

佐野浦

同

青松綠水濱。花映萬家春。巨艦浮南浦。高城對北津。鶴樓觀畫客。鮫室賣綃人。因想鴟夷子。陶

山此地隣。【葛城以下四首。泉州垂祐堂八詠中詩。此選其半。佐野大賈富室所窟宅。陶山在其東北。】

燈火

祇園瑜

孤飛長信殿。萬斛景華宮。夕飲芙蓉露。曉流楊柳風。只應伴岑寂。何必上青空。隨意清池上。高

送藤文鵬

同

南竄十餘歲。夕鴻又夜猿。非操鍊石志。安得錦衣恩。驛路連滄海。歸裝照大藩。明時多俊乂。君

去擇_二卮言。

博多歸帆

同

霸臺商舶湊。

中嶼福山隣。

歌館偏宜月。

酒樓別有春。

歸帆懸落日。

遠棹指雲津。

朱今幾人。

哭石處士

同

栖栖石處士。

名以章書傳。

一灑興何逸。

數行醉更顛。

蕭疎秋竹雨。

蒼勁古松烟。

逝矣杯中物。

不及_二□。

【自注云。處士名字魯。號鼎菴。又號集松居士。以章書名世。】

歸雁

雨森東

萬里條風至。

雁歸總幾群。

低飛聲拂曙。

高舉影藏雲。

唳藻能諳候。

銜蘆巧避紛。

情同弄絃客。

送到斜曛。

九月十三夜作

服愿維恭

朔風吹木葉。

鴻雁復南來。

黃菊秋同老。

清樽月共開。

天晴斜漢近。

霜落早寒回。

負郭千家夜。

幾處催。

【雖無佳句警聯。氣韻婉暢。有足誦詠者。】

客舍新秋

僧若霖

小樓倚暮天。

雨過半簾前。

冷艷芙蓉露。

蕭疎楊柳烟。

蜻蜓空款款。

燕子故翩翩。

舊隱長相望。

流水邊。

【若霖有詩名。其徒到今稱之。停雲集所載。大抵尖巧傷格。如此篇平暢無瑕。故選錄。】

碧於亭

梁田邦美

梅巷傳芳址。

春波撼水亭。

高花巖際白。

疊嶽檻前青。

暮雨漁樵路。

朝霞鳧雁汀。

箕川墟里近。

或來經。

和河間生秋過楠子墓作

同

榎楠支大厦。

天日照孤忠。

邱隴蕙蒿在。

古今感慨同。

駿材思冀北。

龍德望隆中。

不見旌旗色。

花飈水風。

擬冬送人遊邊

同

十月幽并道。

客衣何自單。

黃河水上渡。

青海霧中看。

奇策參誰幕。

壯心衝爾冠。

臨行晨飲馬。

是窟泉寒。

咏孔雀

同

飲啄甘蠻瘴。

文章萬里傳。

炤山驕翠羽。

臨水護金鈿。

荳蔻花間露。

桃榔樹裏烟。

樊籠充獻貢。

似客南遷

巨川長流。為會津大夫西鄉氏賦

同

蒼鬱稽山麓

魚龍噴作波

九霄通絳漢

萬里配黃河

舟楫良材在

雲霖美德多

矧君流水曲。春

調發陽和

辛亥正月

拜三緣山

台廟 恭賦

桂義樹

一世風雲會

百年盤石宗

西征曾破竹

南面更培松

廟宇鬼神護

蒸嘗侯伯從

長驚精爽在。園樹

似群龍

送熊子孺西上

湖元泰

臨別賦靡鹽

賢勞鬢欲皤

花殘辭海嶠

葉落出關河

馬首乾坤濶

鷓程日月多

風雲遇明主。壯

志豈蹉跎

冬日城南別莊

同

吏隱應如此

薄言學軸邁

天寒山影淡

木落夕陽多

人語隔溪聽

鐘聲穿竹過

投間知幾日。吾

性素巖阿

林臥

物茂卿

夏木千章好

况逢三伏天

披襟風葉底

高枕露枝前

深映青樽色

斜窺織月妍

似惹南柯夢。此

心已恍然

早行

同

壯心凌曉發

客路不知悲

為抱烟霞癖

忽忘筋力衰

雲巒微白際

海日欲紅時

立馬千尋坂

悠然悞往期

白山雜咏

膝煥圖

落日銜山頂

秋風上古城

曲池驚草色

邃宇供蟲聲

生路崎嶇出

愁雲睥睨平

雍門千載淚。日

擊更縱橫

中秋

縣孝孺

淡淡輕雲合

微微素月圓

不眠過半夜

乍霽仰中天

陋巷我詩酒

危樓他管絃

振衣風露淨。獨

立意飄然

江州道中

同

今年復行役

落日向東州

津樹春雲合

驛樓山雨浮

乾坤故壘在

晝夜大江流

徙倚憐風物。龍鍾

獨自愁

贈縣次公

太宰純

故國重賓師

何人最週知

載歸真特典

引見定多時

席上千金壽

樽前四牡詩

築臺應不日。莫

遣壯心衰。

九月六日猗蘭臺集賦此奉呈

同

東閣群賢坐。

西臺太守堂。

金風散積雨。

玉露欲重陽。

興至詩皆好。

樽開酒正香。

那知布衣客。

爛醉

任踈狂。

哭搗謙先生

同

昨日歌梁木。

今朝失哲人。

遺書空倚壁。

坐席已生塵。

架插如椽筆。

牕懸漉酒巾。

從來子平願。

已

矣九泉身。

九日有感

同

復值重陽至。

悲風對落暉。

百年因酒過。

萬事出門非。

暮景官情拙。

客中心事違。

愴然深自怪。

未

爲葦鱸歸。

冬日雜詩 八首選二

同

山河催短景。

雨雪自陰陰。

意氣憐湖海。

蹉跎感古今。

酒從窮巷薄。

詩入客愁深。

門外無車轍。

猶

堪稱陸沈。

其二

同

衰晚負初志。

西遊事未成。

朔綬過酒肆。

儒服稱狂生。

不是江湖性。

寧知魚鳥情。

世間何物是。

總

比虞人旌

新霽寄人

服元喬

開窓新霽好。

不復畏寒威。

城鼓乾清響。

簾鉤上靄輝。

興來移午枕。

病起試春衣。

明日出幽谷

還求黃鳥飛。

酬字士朗春日見寄

同

尺素相思字。

天涯喜不踈。

陽春無變調。

歲月有盟書。

上國花應好。

東山錦自如。

此時君且信。

吾

厭武昌魚。

集飲長藩松浦氏此日寓自侯園

同

主人從上舍。

守邸自通家。

相引窺齊苑。

忽疑游海涯。

臺池棲翠鳥。

林木靜瓊花。

更有如澠酒

留連到日斜。

宇士侯凌霄閣雨集探韻

同

邸第爭高地。

凌霄此閣看。

侯家分錦字。

賓客飽芳餐。

詩重千秋業。

杯深一日歡。

醉來雲霧色。

忘

却雨中寒。

首夏松前氏西莊得青字

同

林苑宜初夏。

相携問野亭。

鳥鳴芳未歇。

日霽樹愈青。

對境慚詩拙。

當風任酒醒。

看山閑暫得。

何似白雲停

草堂春興 五首選一

草堂聊寄身。起臥幾回春。樹長稍來鳥。竹繁宜避人。自忘雙鬢短。復對百花新。欲問棲遲意。風光赤水濱。

同

烏山侯席上贈大鵬禪師

高維馨

朱郎迎金錫。衣冠入坐忘。凌波乘折葦。觀日到扶桑。花雨隨尊者。雄風侍大王。羞將詞賦戲。妙偈欲爭光。

護洲雜詩

同

蕭索護洲上。閑居近海磯。誰傳鸚鵡賦。無恙芰荷衣。煙樹收寒雨。江帆掛落暉。可憐鷗鳥狎。吾性久忘機。

上巳前一日

同

先節江亭宴。佳期對碧流。非關脩禊事。還似舞雩遊。水繞桃花岸。春深杜若洲。一觴兼一咏。明日復何求。

擬秋宵寓直

同

薄暮巖城闕。南宮傍紫虛。商秋仙署肅。甲夜吏人疎。禁月懸青鎖。樓雲接玉除。不才慚補袞。明

日奏封書

壬戌八月江水大溢

同

洪水侵平陸。橫流混太虛。東南傾地軸。宇宙半舟居。濁浪都沈稼。蒼生欲作魚。已聞乘四載。微禹竟何如。

宿牛頭寺

鳴鳳卿

江城收返照。石逕暮烟侵。明月來牛首。寒鐘徹鶴林。天香與風落。仙梵入雲深。遙夜無人境。堪觀不住心。

【鳥秘監之詩。余未多觀。近備前湯子祥。錄秘監越中懷古五律示余。其中聯云。十年謀智士。一旦殪強吳。夜月遊麋鹿。春風啼鷓鴣。精巧可稱。惜乎起句字法有瑕。因不收選。】

雍正長

答竹處見寄

雍正長

天涯朋好少。悵望坐蕭然。浮雲生海上。病葉下霜前。故國三秋別。羈心一夜懸。稍向南來雁。愁看碣石篇。

懷仙閣小集得深字

守煥明

壯會真難得。高談睨古今。陽春無和曲。流水有知音。玉斗瓊醬滴。瑤笙仙閣深。雄風聊可賦。此處好披襟。

【此詩雖非佳境 秀緯五律捨此無所目擊 因錄以存雞肋之意】

春夜宴友人莊

岡孝先

繫馬花如待 入門月共開 青山良夜宴 綠野暮春盃 直是吏人少 能令騷客來 請君歌一曲 醉舞我徘徊

春日田家

同

古道垂楊裡 高低八九家 斜陽橫麥隴 流水隔桃花 南畝農初勸 東隣酒可賒 村村春社散 歸路話桑麻

同諸子分題得武侯廟

木實開

鞠躬扶後主 英氣尚如生 司馬還奔走 木牛不復行 表文唯涕淚 廟略故縱橫 祠畔千尋栢 凌霜黛色清

夏日同諸子遊國府臺

田良暢

渡頭煙樹曉 挈榼共乘舟 兩岸微風起 千山爽氣浮 誰知移棹去 獨愛濯纓流 無恙孤帆色 悠悠下總州

里伯龍來訪

僧原資

青山風雨後 詞客問祇林 祖訊三乘路 遙論二雅心 石谿松影亂 花樹夕陽深 冥契離言道 寥然

見宿禽

佛原有感

同

貴賤雖區別 終焉共北邙 生涯封馬鬣 履歷轉羊腸 碧漢遙黃鶴 空山落白楊 秋風吹不斷 天地幾滄桑

鎌倉懷古

同

浮雲餘霸國 列嶂半祇林 草木踈風雨 煙波渺古今 蕭條朝會地 杳渺戰爭心 似助遷流觀 鐘聲落日陰

春晚

僧元皓

縹緲煙霞色 倚欄春日斜 舟藏南浦樹 雲宿上方花 綠水疑無地 青山如有家 暮年千里客 將復向天涯

同

淀河舟中作 淀河秋漸晚 尚可泛扁舟 返照紅纔斂 群山青未收 犬吠孤村月 燈明兩岸樓 篷窓疑聽雨 風急一鷗

春日過山寺得鳴字

僧圓乘

刹竿天畔立 列樹著花明 路險雲陰濕 臺平海色晴 經行隨細草 梵唄雜啼鶯 殊覺發深省 晚

雷幽壑鳴

和藤東壁

僧堅卓

五柳門前逕。一張月下琴。賦詩迎夜色。高枕對秋霖。白日時時鼓。黃昏樹樹禽。吾廬今咫尺。交好意殊深。

送田藍田之京師

松儀

牆上梨花發。檐低黃鳥飛。因君鄉國去。沾我別離衣。春棧杜鵑合。暮村驛樹微。柳條各折盡。相見獨依依。

春日病懷

同

二月風光美。三春花柳長。乾坤留病客。日月苦閑神。竹樹鶯啼密。茅檐燕至頻。可憐芳草地。寂寞不成春。

【松禎卿木靖恭門人。

對馬文學。則宜與雨伯陽並錄。而禎卿詩傳者無幾。如停雲集。僅載

其四首。余作是編。第三卷將卒業。而適得祇南海所手鈔。禎卿遺稿。因錄于此云。

送友

岡島達

青樓送君處。離怨柳條長。江水陽侯激。山雲神女粧。征衣經夏換。驛樹入秋涼。莫道書難寄。南飛雁幾行。

哭檀伯啓

菅長曜

屈指已十稔。從遊幾往還。交常憐淡水。曲自對高山。殘夢空携手。遺編猶見顏。侯巴今逝矣。仍爾鎖玄關。

偶作

字鼎士新

過客未全謝。相逢隱几眠。玄談終落落。彩筆少翩翩。時事吾何解。古情人已捐。此生誰獨往。徒有阮宣錢。

小集得流字

同

碧天寒似水。萬里白雲流。鴻雁年華老。酒杯病色愁。人間居未靜。客至興還空。潦倒三秋暮。相携懶樓。

病篤謝來訪諸客

同

伏枕辭過客。相知或臥迎。死生憂共切。兄弟義寧輕。世態寒冰薄。交情愛日明。春風如得起。携手與縱橫。

送人還山

字鑒子期

舊業空山裏。棹頭出帝城。千峯黃葉積。一路白雲迎。詩卷時名過。泉聲晝臥清。誰知臨別語。不復世中情。

山居

星野龍子雲

澗水仙源近。雲霞物外居。層崖丹桂古。空磴翠蘿餘。門對麝麇跡。家藏黃老書。極知蘭茝佩。不敢

易簪裾。

鶴士寧

僧西遊不還。不住雲遊去。西天回錫遲。書無空外字。交有世中期。駒隙歲年過。人間生死疑。徒勞迷路夢。何以

秋夜

田長温

秋夜長如此。愁人無限情。月林翻鵲影。露草亂蟲聲。百歲行將盡。通宵夢不成。殘燈纔耿耿。可

競鬢華明。

源敏樹

咸光上人房觀壁上西湖圖。勝遊般若窟。別院望悠哉。南海牕中畫。西湖坐上開。龍宮移湧出。鷺嶺似飛來。滿壁濃藍色。洪流

擬渡盃。

石正漪

鵲巢今夜會。何用架橋浮。暫此離城市。非關犯斗牛。戶庭繁白露。村落入清秋。坐望星河轉。西

露

山根清

清夜降霄漢。凝光仙掌中。玉階聲滴瀝。琪樹彩玲瓏。曉氣警鳴鶴。暮寒薄響虫。吳臺荆棘長。千

古泣西風。

林義卿東溪

送人之賀州。日域三都外。大邦誰不聞。文抗千乘國。詩駭萬人群。金澤杯邀客。白山雪照君。賀中雖信美。回

首帝城雲。

飯田居謙

龍江泛舟。雨後龍江夕。乘涼青翰舟。清風晴夜色。明月映潮流。鷗鳥驚絃管。杯盤滿柁樓。坐疑迴銀漢。近

傍斗牛頭。

瀧長愷彌八

月下懷友。離群千里外。踪跡嘆浮萍。江上雙魚斷。天涯孤劍停。悲風起中夜。明月照空庭。又值西飛雁。哀

鳴不可聽。

秋儀玉山

銅雀妓。漳河流不盡。妾思自悠悠。搖落銅臺晚。淒涼玉座秋。寵恩爲往事。歌舞感曾遊。西望園陵處。蕭

龜泉群螢為觀水翁賦

同

龜泉鳴暮夜。螢火集菰蒲。風到撲難住。波搖看欲無。路傍堪按劍。衣裡忽投珠。疑是銀河上。離離種白榆。

代簡答鄉人

同

聞說南山下。悠然出世塵。松間種白石。竹裏戴烏巾。日月閑居賦。田園歸去人。可憐千里外。遊子未知津。

登白雲山

井通熙

鬱盤諸嶺秀。寒峽入雲餘。巖樹低如草。石蓮齊作花。上方看雁塔。下界到人家。強欲題名去。夕陽相照斜。

春日病中漫成

七首錄一

湯元禎之祥

十年官不調。養拙且酣眠。病著潛夫論。情關客難篇。啣杯銷白日。撫卷望青天。國士心猶在。經綸誰復憐。

以詩代書贈蘭臯師

十五首錄二

田好銑

浮雲嗟世事。駒隙過芳辰。更以無生契。偏親有漏身。園林花已落。風雨草逾新。形影空相吊。何時見故人。

其二

同

稍忘疲頓苦。臨眺又攀躋。極目平湖濶。入看衆嶽低。歌臺三樹北。橋柳二條西。空指曾遊處。風煙自不迷。

題日間賀江亭

松秀雲

滄波南浦口。孤嶼水中央。山控三河遠。海連五瀨長。歸檣依斷岸。漁網挂斜陽。臨眺貪形勝。淹留對酒觴。

野遊值雨

同

野遊逢驟雨。蹇步稻畦間。逃苦寧離苦。尋閒却不閒。支藜迷亂草。轉眼失雲山。向晚荒村路。龍鍾戴笠還。

至日有感

井鼎臣

客中逢至日。烟樹慘斜陽。酒解千愁結。晷添一線長。鄉心天外雁。官况髮邊霜。歲事看如此。蕭條獨舉觴。

漫興

木貞寬

愛此春光好。漫傾金屈卮。窮途餘阮籍。流水奈鍾期。深樹黃鸝囀。疎簾白日移。不將詩酒趣。敢使俗人知。

堂成

豈知城市裡。丘壑趣翻存。傍竹斜開徑。種花未滿園。雀羅將設處。鳳字孰題門。淹側爲何事。病餘對一樽。

同

月夜懷關西諸弟

武昌今夜月。相照獨披裘。起指南溟迥。臥看北斗幽。客身憐短髮。官況戀扁舟。本識地難縮。愈增鄉國愁。

奧田士亨

夜踰志賀山歸京

行行山不盡。照炬夜歸京。星點漁舟火。月添旅客情。柱笻憇林樾。隔嶺辨鐘聲。一望江湖外。雲烟萬里橫。

谷鸞士章

夏日放舟

搖棹春風後。興深詩不孤。輕衣含水露。披髮稱江湖。遊必做棲逸。飲非混酒徒。歸途已昏黑。螢火散明珠。

同

山房

三夏讀書地。松枝懸薜蘿。長霖閑苦竹。墜露走清荷。雲影移高枕。水音助放歌。羲皇上世者。我遂不爲多。

那波祐昌

中秋懷芙蓉舍集

西風吹暮雨。東嶺白雲沈。松竹秋聲起。芙蓉月色深。興來誰授簡。醉後又彈琴。多病負良宴。聊同希逸吟。

乾祐直 莊岳

仲夏喜越中某生來訪

送迎皆在此。情發舊知音。新荷僅浮水。迸筍未作林。隱囊供阮嘯。書帙託韋金。吾子幸來往。慰予遺世心。

岸季英 芳洲

寒山

千峰懸夕麗。一室翠微中。谷邃容歸鳥。野悠迷牧童。飛泉雲外響。清梵坐邊通。古寺寒山裡。蕭然塵慮空。

春政 紹

訪北海先生

爾時余在城
南遂初園

數畝閑園裡。滄池與碧苔。客來時下榻。詩就又含杯。好鳥簾前語。幽花檻外開。淹留我未去。佳興醉中催。

三上義從 宗順

過水士遜後亭

環樓皆水樹。無日不清涼。積翠簾添翠。彼蒼波亦蒼。坐來湘岸盡。吟裡越山長。同調此經過。復奚期帝鄉。

宿嵯峨

田温信 東閣

投宿青山下。嵯峨深竹村。歡情人幾在。往事月空存。爽籟清詩思。踈鐘驚夢魂。寂寥如在寺。夜色鎖柴門。

夜泊

香國典 太常

雨晴楊柳岸。獨夜駐扁舟。滄海孤輪月。金波萬里秋。風從天外起。潮湧島前流。不寐聞鳴雁。悵然動客愁。

送成龍淵歸朝鮮

井敏卿 松菴

落日長門口。懸帆赤馬關。望遙滄海月。夢繞白雲山。萬里人南滯。三春雁北還。故鄉何處是。縹緲碧波間。

智乘院集得中字

有小引略之

野公臺 子賤

載酒邀諸彦。池邊倚梵宮。談高千古外。交熟一杯中。綠水芳堪採。朱絃曲易終。嗟予異鄉客。此會幾回同。

其二

同

蕭寺曾遊地。今來熟路通。相迎高士座。復借梵王宮。詩酒盟無恙。河山感不窮。誰知嵇阮後。重醉竹林中。

同前得杯字

種濟 元民

勝遊借梵臺。聊勸濁醪杯。坐隔風塵色。人誇詩賦才。珠林過雨濕。綠水淡雲迴。久望諸賢會。襟懷一日開。

首夏

巖同甫

野子賤

種元民

携饌具

集知乘院

同諸君賦

分得天字

詞賦梁園客。相携首夏天。登廬原許酒。避暑此開筵。彥會祇林外。良遊彩筆前。斜陽風雨起。應爲

駐群賢。

谷友信 文卿

同前得青字

叢林涼雨晚。會彥此池亭。許酒携芳饌。論文倒玉餅。龍潭沈鏡碧。栢樹帶烟青。共待輕陰散。

諸天指聚星。

餘承裕 子緯

同得風字

社地分清切。蕭森古梵宮。樹深籠氣色。池潤涵虛空。人憶西湖水。詩驕東海風。共憐萍梗會。一

醉此相同。

山維熊 子祥

同前得林字

風流朱第侶。移宴借祇林。捉塵乘清興。觀魚會賞心。潢池添雨漲。樓樹隔雲深。江左傾諸彥。

斯遊見古今。

漫興

同

柴門何所見。高枕暮雲深。夙好違林臥。浮生任陸沈。連城空抱壁。同舍動疑金。不是青樽興。安知傲吏心。

蓬蒿

田景化 之躬

蓬蒿城外宅。藜藿野人家。脩竹千竿籜。甘棠一樹花。潛夫常閉戶。長者不留車。日夕高林上。棲棲無數鴉。

【之躬河內人。少小有才子之稱。死年僅二十。余閱其遺稿。佳篇不尠。又有田黃裳。字處文。亦河內人。學詩字士新。才名頗著。亦早沒。余閱其遺稿。絕無佳作。因不及收錄云。】

兼葭堂集

福尙脩 承明

相逢湖海上。交熟任吾疎。人醉三春酒。家藏萬卷書。繞樓山色秀。傍水月光虛。招隱非難賦。幽情本有餘。

【承明家翁。名剛字百鍊。爲潑浪華。承明幼而穎異。長而才名煥發。死年三十四。無有兄弟。家翁有詩哭承明。悲酸不忍多讀。亡何家翁亦病卒云。】

夏日臥病

僧宜 收

西方爲客地。伏枕謝津梁。世界思三藥。禪房置一床。歸心何黯澹。狂態動飛揚。強促登臺興。慙慙望故鄉。

寄夢澤君

僧寶 性

伏枕青春日。聞君解綬歸。鳥窺移柳地。童待映花扉。探勝支公馬。舞雩曾點衣。昨宵芳草夢。相引到漁磯。

僧房看花

僧圓照 普明

山上尋禪窟。林花檻外開。非關天女送。偏任遠公栽。色映金身動。香連仙梵來。爲耽塵外興。昏黑未知回。

日本詩選卷之三終

日本詩選卷之四

平安 江 邨 綬 君 錫 著

姪 清 勳 公 績

受業 永 田 忠 原 俊 平 同校

五言律下

登南叡嶽

晴景登高好。馳眸千里悠。遠江烟際白。羅象畫中秋。蘭阪入雲峻。桂山含日幽。蒼茫平楚裡。處處

梵聲流。

夜過逢阪

逢關山夾阪。一路月光明。人影過松影。葉聲訝雨聲。天吞淡海濶。雲吐朔鴻橫。夜色秋無限。

西風羈客情。

武欽絲 梅龍

同

遊和歌浦

服天游 蘇門

壯遊南海上 秋色滿兼葭 風捲松根露 潮來鶴影斜 漁村舟作市 神島玉爲沙 更見宗藩地 煙霞幾萬家

春遊仁和寺

寺舊寬平帝離宮

同

此地尋芳好 離宮即梵宮 華幢雙阜北 繡幕五雲中 花影人顏醉 山光鳥語工 更知靈囿樂 千載與民同

送某生歸隱鄉里

同

十載青雲志 一朝拂袂歸 早花隨去馬 殘雪照征衣 荒圃堪抱甕 故山好采薇 更憐潘岳拙 裁賦侍慈闈

將赴東都

三首錄一

伊藤縉 君夏

花後頻多雨 綠陰入夕晴 旅遊隨日逼 客意在家生 開篋燒書札 檢方錄藥名 關東還往慣 不復筭行程

踰薩埵嶺

同

九折盤林杪 回頭遠近晴 河流歸海白 嶽雪接天明 斷壁潮爭澗 懸崖樹倒生 登臨思不已 况復幾年情

七月二十一日雷雨

同

黑霧乾坤合 狂飈城欲摧 迅雷驅雨至 落電截雲開 萬壑蛟龍鬪 千山魑魅哀 翛然天色霽 涼氣滿樓臺

和雪鼎上人箕山瀑布作

同

瀑水青冥落 松杉斷壁開 千尋分日月 萬古吼風雷 妙偈偏奇勝 真遊自異才 知君雲霧裡 孟鉢蓄龍回

峽中

越前道中

同

登登山更合 積翠映征衣 獨鳥驚人起 孤雲觸馬飛 溪回泉脉亂 地瘦麥芒微 絕嶺樵歌響 不知何路歸

寄題三原妙正寺

伊藤善詔 忠藏

海西名刹在 鍾秀擬蓬瀛 日月寰中潤 雲烟畫裡清 朝宗流水遠 拱揖攢峯晴 若得四難并 能令杯酒傾

依竹堂集

芥 煥 彦章

青天含雨色 雲物自凄然 一榻移花下 千竿繞酒邊 人間多樂事 仙境晚還年 向晚林風響 驚吾醉後眠

首夏再遊依竹堂

同

春至憐花發。重遊坐綠陰。標梅數細艸。新竹住幽禽。亭近青山趣。客同白雪心。含杯消永晝。臥見夕陽沈。

春日雜興 十首錄二

柳美啓 子明

輕風吹散髮。沐罷下庭陰。桃有田園趣。松無冷暖心。壤泉求易足。市井隱非深。陋巷前賢樂。欲從此裡尋。

其二

同

連日阻風雨。名園花發時。既違華頂約。又後仁和期。蜂蝶應嘲我。冠童欲附誰。古人嘗已歎。四美易參差。

季冬和田雨龍

渡守時 南平

凜凜寒威重。病軀苦季冬。殊因塵事劇。自失勝情濃。欲報來書意。如何揮筆慵。早迎春徑暖。蓬戶待吟筇。

詠菊

清 絢 君錦

商飈催落木。秋菊見時芳。蓋奪黃鸝色。枝含翡翠光。瀟湘堪獨往。彭澤好相將。泛酌多幽賞。併生春酒香。

次龜峯和尚見寄韻

同

泉谷勝因在。舊盟情自依。卜隣來近市。携友叩深扉。妙偈清塵眼。玄風颯絳衣。仍將茶事靜。歡坐送炎暉。

秋雨漫成

皆川愿 伯恭

高閣秋陰迥。斜陽欲到難。雲兼群雁去。雨向積烟看。籬菊含香晚。池蓮抱葉寒。輕愁纔倚酒。未敢玉杯乾。

北海先生見枉次韻奉謝

那波師曾 魯堂

村舍多幽意。春雲寫一飛。文章彫漢雋。富貴附秦肥。落日紅梅塢。輕風白板扉。莫嫌家釀薄。好自醉題歸。

遊仙遊巖

宮 奇 筠圃

曲磴躡雲上。途窮望豁然。回頭都絕壁。穩坐是中天。襟抱曠披霧。詩情湧若泉。不須問之朮。偶此擬飛仙。

大堰清流 嵯峨十勝之一

僧全統 大圭

西堰一條水。微茫入遠眸。烟中半橋斷。晴後幾舟浮。不聽潺湲響。只看繚繞流。天涯斜日影。過雁落何洲。

真淨花雲 同上

僧承堅 翠巖

中庭花正發 風靜有餘芬 不作三春雨 唯垂一鳩雲 亭臺晴縹緲 簾幙暖氤氳 應為主怡悅 留連帶夕曛

春月

僧令椿 湛堂

山月四時好 春宵最可憐 光清送回雁 影澹促啼鶯 花塢籠香霧 柳塘浮翠烟 自無霜露冷 坐到五更天

中秋無月

龍公美 草廬

蕭條三五夕 烟霧鎖秋城 不見姮娥影 徒聞蟋蟀聲 孤燈遙夜暗 四壁早寒輕 多病文園客 轉教白髮生

三橋客樓飲賦得明月滿前川

同

共醉江樓月 倚欄夜色遙 水明浸兩岸 霜白滿三橋 應見洛神舞 堪聞秦女簫 詩成欲歸去 清影轉蕭蕭

答尾陽西河生見寄

同

秋鴻天外落 忽得數行書 畫本曾知爾 詩今足起余 農桑高士業 江海病夫廬 自此思同好 莫教音信疎

書懷

同

擾擾紅塵裡 十年寄此生 自憐狂者態 誰識腐儒名 形骨因詩瘦 囊錢爲酒輕 江湖今孔邈 何意負鷗盟

還自浪華

孔文雄 世傑

浪華城下水 歸客此揚舠 日落棉花白 江澄蘆荻青 垂綸應我友 傍竹問誰亭 知是家人輩 携來炬一星

【自浪華還河內 舟中景况寫得如畫 但結末輕佻失體 世傑詩才輕妙 而規度不密 往往有

斯疾可惜耳】

野望

兄 臧 樂郊

烏紗時一岸 薄暮步城陰 南浦寒雲卷 西山爽氣沈 江湖仍嘯傲 雨雪又悲吟 爲聘冬郊望 轉知沮溺心

春日郊行

烏宗成 宇內

行樂春郊外 盤桓欲夕曛 僧歸巖際寺 帆隱渡頭雲 殘雪千崖窄 新花兩岸分 茫然迷故路 城鼓隔林聞

題友人田廬

同

新卜田間宅。柴門常不開。清風三徑竹。綠水半巖苔。鹿鹿朝攸伏。牛羊晚下來。願辭塵世累。琴酒此徘徊。

冬夜得家書

同

老去歡娛少。病來記憶疎。鐘聲棋散後。雪片酒醒初。孤影燈前淚。一封筒裏書。平安題兩字。忽使客愁除。

仲冬集松濤樓

同

松濤樓上月。隱見使人憐。悽愴會今夕。依稀憶往年。梅花長至後。雪片大祥前。鳳吹仙遊去。何時還洛川。

合神童患痘疾。詩以訪之

同

九歲詩書業。芳聲闔國飛。神靈應有護。痘疾預知微。三五明星點。團圓紅玉耀。浴湯何日是。共詠舞雩歸。

【神童麗王長子。客歲余遊浪華。主子琴家。麗王提携來謁。席上勸韻揮筆詩成。時十歲云。神童之稱不溢美】

題畫

田章 鳴門

心在湖山上。躊躇水一涯。氣晴如鳥喚。峯斷爲雲埋。遠樹斜藏墅。細流纔沒鞋。宛然摩詰賞。勝

槩不吾乖。

秋山寄興

同

未爲探芝客。登履一簞瓢。墜葉人家錦。偃松山澗橋。鹿鳴應笛到。雲影和歌飄。過寺題盤石。恐傷霜後蕉。

七夕作

僧顯常 蕉中

天上二星會。人間一葉秋。炎雲收北郭。爽氣動南樓。樹影迷鳥鵲。日華帶斗牛。興來橋畔步。恍似絳河遊。

遊永源寺 十首錄一

同

浮生無伴侶。山水有良緣。曲岸疑窮路。危峯欲上天。澄潭藍可染。殘葉赤將然。落日樓臺上。徘徊感昔賢。

哭宇士新先生 十首錄一

同

萬古文章道。憑君且可求。功名湮一代。慷慨轍千秋。紫氣忽相失。白楊黯自愁。寥寥子雲宅。非復問奇遊。

登飛雲閣

僧敬雄 金龍

飛閣層層壯。雲梯裊碧空。平臨星斗上。下見帝城中。回郭千山合。抱都二水通。春風倚欄夕。坐

覺入_二天宮

某莊蓮池

同

蓮池淨如鏡。迎客此開筵。珠散葉間露。香浮花際烟。遊魚吹浪出。馴鳥近人眠。濠濮情無限。並
凭曲檻前。

好雨知_二時節

服元雄 仲英

恰好如_二絲雨。園庭擁_二晚陰。風斜花際灑。烟濕柳邊深。似解添_二佳色。寧無_二愜賞心。芳時此相及。
終日助_二幽吟。

春日郊行值_二雨過_二丈人莊

同

曳_二杖衝_二泥濘。郊天望_二轉迷。春夜沾_二細雨。徑竹傍_二幽棲。下_二榻携_二碁局。呼_二童命_二黍鷄。回看踏青處。
烟暗野橋西。

感_二春

同

今春重作_二客。去歲一_二還家。復值_二風光好。轉憐_二關路賒。斷鴻迷_二暮雨。芳草遍_二天涯。故苑終無_二主。空
開桃李花。

草堂春興

劉維翰

放歌耽_二野趣。藜杖憩_二莓苔。竹影侵_二書帙。鳥聲隨_二酒杯。斷橋濃_二樹外。虛牖白_二雲隈。一夜山中雨。小

園花盡開。

送_二人歸_二南紀

同

似得_二沈冥意。杳然隨_二斷鴻。人歸寒食後。春盡落花中。熊野迷_二滄海。龍門倚_二碧空。知君耽_二勝絕。况
復賦_二辭工。

還_二舍

松崎維時

客舍神門北。棲遲已五年。移居公館下。益近鳳城天。春動朱樓雪。花明紫陌烟。偷閑憐_二景象。退
食意_二茫然。

同_二井子慎君璋_二郊行尋_二花

同

不向_二西郊路。參差十載餘。同遊人已異。舊賞路還虛。老怯_二春衣薄。疲知_二酒力疎。白頭插_二花藥。笑
問意_二何如。

其二

同

古寺樓花外。空亭密竹間。此鄉稱_二日暮。幾客探_二春還。倦鳥鳴_二相喚。歸雲意_二自閑。微名慙_二小草。早
晚向_二東山。

題_二羽處士隱居

紀德民 平洲

地勢西郊路。幽人此買_二山。茅簷低_二樹裏。苔徑入_二花間。白日看_二將夕。春禽聽_二轉閑。况君玄理妙。戀

賞不教還。

送人遊宇治

同

地形幽兔道 一路翠微重 夜色長橋月 秋聲古寺鐘 高僧餘梵窟 女史見王蹤 君去含毫處 誰如藻思濃

春日同子元太一郊遊

南宮岳

數里城西路 相携步淺沙 村橋吟倚杖 古寺迴尋花 雲霧孤帆出 林開萬嶺斜 不妨留賞久 我意在雲霞

秋日河村右中山房

同

秋郊多廓落 別墅傍江湍 地有桃源似 人為栗里看 寧知秦與漢 唯種桂兼蘭 幽事携餘興 啣杯到日殘

移居東臬

僧淨壽 終南

紫陌紅塵密 青山白社疎 門無車馬客 室有古今書 吟傲風雲色 優游歲月徂 東臬間若此 西嶺復何如

酬丹公

同

傲放林邱上 逍遙曠野間 蝸廬僑舍似 鷗鳥客心閒 花樹春幾遍 柴門晝不關 留歡故人意 指點

暮雲還。

賀龍文師住南山

僧元明 悟心

文翁化蜀日 支遁買山時 雌伏原吾輩 雄飛非汝誰 夜談少林意 晝採商邱芝 自愛巖阿裏 津梁且莫疲

春盡有感

赤松鴻 良平

又逢春色盡 偏感昔時遊 久客年年老 飛花處處愁 風塵留短髮 世態付長流 起見新林綠 烟霞落日浮

同

馬山客舍悼館主人失偶 芳草露空流 澗水咽危石 山雲覆故邱 鳥啼春夢散 花落夕陽愁 猶想溫泉上 時從女伴遊

悼人喪妻妾詩

如此點綴

亦自感愴

過此求巧

往往褻慢失體

余所不取

赤松勳 大業

途中晚眺 停鞭試一望 落日沒長河 樹帶秋陰暗 雲含暮色多 踈鐘和牧笛 繁杵雜村歌 所得非吾土 脚躄奈晚何 賦得野無遺賢 近藤篤

物色江湖遍。廟堂俱俊賢。神龜開禹範。瑞鳳舞堯天。嘯絕蘇門月。田荒鄭谷烟。猶思養文豹。隱霧待他年。

夜飲得佳字

井潛 仲龍

柳絮垂當戶。江流綠映階。談隨牙後慧。酒使體中佳。夜飲雖無量。春宵奈有涯。好將明月色。成贈入君懷。

春雨中山陽客舍送人從侯駕東歸

同

春盡城南路。憐君歸我鄉。一鳥留絕域。千騎向東方。山共迴腸遠。江隨極目長。淚痕知幾點。和雨濕衣裳。

木曾道中

澤貞雄 平藏

岐蘇三百里。出沒白雲端。駒嶽群峯峻。鵝湖萬頃寒。峽中花未發。岩際雪猶殘。駐馬危棧上。行歌蜀道難。

春日閑居

度會末雅 雅樂

散步閭門外。烟霞一道通。連橋春草綠。映水晚花紅。但恨幽間賞。殊無友侶同。偶看禪宇入。杖底夕陽空。

暮春遊威勝寺

同

林垌親杖屨。蘭若暫逍遙。未了三車喻。先知百慮消。階閒苔漠漠。春盡樹蕭蕭。幽賞吾曹在。時時破寂寥。

爲原公俞悼內

高彝 君乘

不待秋風起。摧殘連理枝。鼓盆應當哭。學案憶齊眉。香燼無魂返。幃空有月窺。安仁徒抱膝。意唱悼亡詩。

長嘯

岡思潛 孔彰

長嘯愴然起。誰同偃臥心。遠林生雨氣。啼鳥訴春陰。常抱山泉賞。况兼絲竹音。新詩足洵寫。古調試高吟。

擬月夜上省中樓

副士定 保卿

冠帶登高閣。千門夜寂寥。金階浮皎月。玉漏肅嚴宵。華露凝仙掌。天風響鳳簫。憑欄聽廣樂。轉覺切雲宵。

十七夜諸子過飲分得七陽

同

月占三秋色。晴添一段光。連陰既見妬。少缺亦何妨。雲盡銀河近。樽開桂子香。炬蛾殊未瘦。窈窕入新章。

遊霞谷眞宗禪院

江邨秉 愚亭

籬花露未晞。林葉漏殘暉。鶴迎居士杖。蟻上比丘衣。始覺真宗在。須知假諦非。歸到山門外。雲鐘下翠微。

同諸子賦秋雨得十四鹽

同

秋陰暝日色。徐見雨纖纖。湘浦鴻書滯。巴山客袖沾。無聲穿密竹。有氣透疎簾。漏濕貧家苦。待晴喜敗簷。

巫山高

柚木太玄仲素

十二連天起。峰巒望壯哉。灘聲三峽轉。山勢百蠻開。翳日朝輝暗。恣風暮色哀。欲尋行雨跡。雲斷碧崔嵬。

秋日陪花山右丞相遊淨妙庵

同

鷹峰禪寂境。幽徑草間斜。地設三台座。門留一乘車。風前丹壑雨。雲外赤城霞。月彩將催處。逾憐夜景加。

小倉堤歸途值雪

端隆文仲

漠漠湖雲色。霏霏帶雪飛。折蘆風拍岸。起雁草粘沙。漁舫烟中渚。酒旗橋畔家。窮年餘小景。歸路不愁賒。

送高維亨歸省

同

春風傳喜報。新歲促行裝。雪盡吟鞍穩。梅開負笈香。鶯應迎久客。椒好頌高堂。重就家園樂。難奔翰墨場。

石動山在能登州

合離麗王

高林曳筇進。弔古切緣攀。海表天平寺。雲根石動山。百年兵火後。十里戰墟間。欲就僧房語。安居白日閑。

終南悟心二禪師並隣結廬因贈

同

並隣方丈室。道德亦何孤。爭馥華生鉢。比明衣出珠。論寧龍馬讓。詩不支休殊。憶昨雙飛錫。後先卓有無。

晚秋野望

葛張子琴

植杖西郊外。秋天霧乍陰。草枯無放犢。菓竭有饑禽。紫翠雨餘嶺。紅黃霜後林。未窮千里目。渺渺暮烟深。

同

端午後一日芥彥章見過留酌。端午後一日芥彥章見過留酌。落日一層樓。綠樹連中島。青山擁上游。采餘河畔草。競罷渡頭舟。不但殘樽在。簾櫳月半鉤。

抵松尾村宿夕霽菴一首

岡元鳳公翼

松尾村何處。寒山十數家。尋籬秋菓熟。叩戶暮烟遮。樽乏茅柴酒。瓶凋野菊花。所期霜樹賞。夕

霽一峯霞。

其二 松尾村在泉州。非京師之西者。

繩床衣且薄。夜冷草菴眠。身在白雲上。夢廻青嶂邊。山村無鼓報。溪寺有鐘傳。曉起開牕坐。負

同

鋤人向田。十月五日同倪高二子遊高雄。清音辨古鐘。鳥歸林景薄。烟合暮山濃。橡實拾相後。楓枝折且從。崎嶇未全下。鈞月

同

幽意千年寺。在中峰。【五六遊高雄光景。寫得若畫。全章亦勻稱。可謂作家矣。】

過子岳

偶然相契濶。明月幾虧盈。花柳皆陳迹。詩篇獨舊情。狂歌閱世態。酣醉歎浮生。文酒今宵宴。為能

尋社盟。

春初過子琴。留酌歡仍舊。新年下楊初。悶猶因酒遣。興自有詩舒。暖景堪行樂。春流好坐漁。主人情不淺。柳

月影扶疎。

閒興

何處宜吟步。林間且水邊。斜陽鴉認樹。殘雨竹浮烟。耽句消長日。看花惜少年。病身無別事。

煮藥汲前泉。

春日山行得時字

匡廬春欲半。林壑傍行移。何寺鐘傳處。下方花落時。瀑侵青荔掛。日與白雲垂。個裏多仙跡。

歸途向晚遲。

觀德朔 市橋侯借樂園十二詠中名題

昇平多禮射。貫革事長休。揖讓觀衆耦。優游擬四猴。鷺翎何沒鏃。柳葉欲凝眸。瞿圃當年士。饒

佗縱去留。

調馬埒 同上

良馬驪黃外。健兒馭得馴。驅馳元有範。走過總無倫。汗血應沾池。街衢不起塵。王家豪貴客。金

埒徒誇人。

【二題俱不易賦。而工績整齊。語有來歷。所以為佳。】

宿山家

草屋空山裏。柴門雜樹陰。秋容岑月小。風色澗烟沈。偶到幽清地。頓生栖隱心。靜聞松子落。不

福嘉貞 士標

厭夜更深。

奉陪大納言菅公遊西王寺

大江資衡 支圃

五雲繞香刹。

佳氣滿庭隅。

寶地迎冠蓋。

瑤杯醉醍醐。

園香梅已發。

竹密鳥相呼。

竟日陪歡樂。

春

風興不孤。

移居

邨 漸 中漸

書劔纒容膝。

賃居便我家。

小窓愁負月。

尺地苦無花。

尙植王猷竹。

未隨李愿車。

終焉豈遑恤。

一日是生涯。

客中

平信好 盧門

行路東風裡。

春光日日移。

江晴帆影疾。

山暝馬蹄遲。

感物鄉愁切。

臨高客淚垂。

故林千里外。

遙恨

過花時。

秋雨夜懷長崎縣伯壽

石川貞 太一

山河秋雨夜。

柝斷覺更深。

木葉飛無影。

溪流靜有音。

孤鴻冠嶂外。

遠夢鶴洲潯。

縱使同蘭臭。

何

時語斷金。

江津

岡田挺之

舟船沙岸外。

樓閣水烟中。

詩景多相似。

會心即不同。

山光連夕照。

江樹引微風。

杖策時回首。

長

天有斷鴻。

天然寺

林文肅 敬夫

晚尋城外寺。

咫尺遠塵氛。

窺相諸天月。

論心一片雲。

竹深人語響。

江近棹歌聞。

爲愛幽閑地。

徘徊到夜分。

迴到夜分。

歷粟穀嶺

僧惠實 雪鼎

山郵高鳥道。

雲霧上崔嵬。

北陸行人少。

越中旅雁回。

嶽雪經春滅。

林花向夏開。

梵宮深樹裏。

靜

慮此間催。

夏日寓懷

僧慈周 六如

香城花已落。

遠野麥將秋。

雲結奇峯出。

雷隨片雨收。

人情諳變化。

世諦有沈浮。

借問膏梁客。

寧無杞國愁。

寧無杞國愁。

夏日漫成

源義宜

寄傲南牕下。

睡眠長夏時。

夢尋蝴蝶古。

風想虞絃遺。

琴酒任生好。

劍書奈歲移。

何知城市裏。

種

種滿頭絲。

冬夜宴高言守宅

源義根

綺筵今夜會。

列燭照高堂。

絲管歌如涌。

杯盤興正長。

樹疎寒落月。

風動下微霜。

酣醉歡何極。

隣

鷄不復妨

聞箏

山良由蘇門

鳴箏垂柳裏

三奏坐江樓

風靜歌逾曼

牕深調轉幽

纔將雙手巧

能起幾人愁

曲罷時回首

簾

前月似秋

寄懷源少卿

藤共建子樹

聽鶯懷故友

見雁寄新詩

花促離居淚

雲追日暮悲

論文知爾壯

作客嘆吾衰

借問春園翠

尊前共賞誰

和袁希寔寄贈之作

同

大藩才子滿

獨有故人名

未得黃金諾

先知白璧情

混塵衣不染

裁雪和難成

多謝斯歌曲

餘音及我生

早行

本多成要左門

客路經千里

高秋尚早行

天懸殘月淡

山引曙光明

不雨征衣濕

履霜驛馬鳴

憑陵平旦氣

暫散故園情

初冬遊狛太夫別墅

榊原敬之幸八

登樓回白首

山水似期人

幽賞逢閑日

留歡醉小春

遠村晴曝稻

前岸暖流薪

農事原相憫

誰思借寇恂

【太夫園中有農日樓故云】

同

暮春書懷有小引略之

鼓盆歌未闕

時節坐因循

寒食花殘雨

旅裝鳥促春

家計依老母

服飾託新人

日永纔成醉

關

山夢愴神

夜

下川貴慶貴一

高峯收返景

棲鳥去啾啾

清興都依月

閑情自在秋

涼生槐露滴

夜靜草虫愁

詩就聊方適

更

深獨倚樓

郊居

同

環堵稀人到

自然幽意生

鶴當蘋渚立

鹿傍竹園行

九夏紅塵絕

三秋爽氣清

不知何處寺

雲

外暮鐘聲

避暑

江思齊省卿

爲嫌城市熱

江閣遠相尋

涼逐歸帆至

暑隨夕日沈

波光開鳥影

雨色訝秋陰

更有蘭舟興

滄浪鼓柁吟

寄懷田子亮

源敏東溪

爲問先生柳。近來栽幾株。隱淪逃薄俗。浪迹學潛夫。歲月新詩句。河山舊酒壺。何時二三子。重與醉江湖。

岐岨道中雜詩 十首錄一

同

秋風吹落葉。蕭颯雨紛紛。斷岸斜懸棧。前途半入雲。行軒依水去。伐木隔山聞。欲問漁樵意。林深路不分。

歲暮吟

內田士顯 長卿

結髮誦墳典。箕裘終業醫。幸從諸子後。復辱大夫知。酌酒青氈坐。揮毫白雪詞。生涯如此足。賤役曷還悲。

湖上

中島微朴 子淳

片雨過湖上。涼風入小亭。松牕吟月客。竹徑點衣螢。處處漁歌答。時時荷氣馨。不嫌村酒薄。屢共叩柴扃。

【子淳嘗有題瀨田橋詩云。水色兼山色。大橋連小橋。寫景甚切。今失其全章。以故不錄。】

月夜獨釣

乘竹良弼

木落秋江冷。月明宿鳥閑。一竿坐磯石。十里對青山。未應龍鱗兆。自安鷗鷺班。任他魚得失。自勝在人間。

送中村正謙歸泉州

櫻井良幹

故人辭北極。歸去向南薰。河內封疆接。泉中道路分。馬牛何不及。鷄犬自相聞。詩禮趨庭日。知君轉好文。

洛陽客舍喜柚仲素過訪

福謙 益夫

寥閔虛堂夕。一盃把向君。鐘聲霧中寺。月色嶺頭雲。移席鴨河近。捲簾叡岳分。忽聞歌古調。楓葉落紛紛。

中秋

內山之明 栗齋

乾坤秋已半。圓月欲斜初。對影須相惜。占光恨有餘。興只隨坐臥。感自屬居諸。曉漏縱催去。桂尊莫使虛。

春日遊某氏別業

隱秀明 士遠

幽莊溝洫外。落日透林煙。啼鳥飛花裏。遊魚垂柳邊。青山行處在。白水自相旋。野老休爭席。無人不可憐。

贈某故人

平九齡 壽王

彼美清江上。一朝賦卜居。芙蓉秋水佩。鴻雁暮雲書。蘆月鳴榔後。蘋風垂釣初。漁蓑堪避世。幽意近何如。

阿波客中雜詩 十首錄一

岡豹 君章

悲哉搖落候。天地氣蕭森。積雨川光暗。重雲山色沈。鴻音秋欲盡。木葉晚逾深。何耐楚臣意。還爲越客吟。

高津春望

飯田美允 支野

故都遺廟在。春滿萬人家。雲外暮山遠。風前弱柳斜。浦煙籠白水。鳥影帶紅霞。誰思布衣客。登臨獨歎嗟。

寄懷小野耘業在平安

北山彰 元章

琴酒相思切。醉來曲更新。高山情未薄。尺素語偏親。下榻空終歲。歸舟只待春。白河流水上。知己有何人。

送田夢鶴還秋田

篠應道 安道

離筵長夏夕。匹馬向風鳴。三越雪全盡。重溟波始平。羈身無善計。違世有交情。聽汝潮聲引。蕭蕭起羽聲。

鳥羽道中

小山儀 伯風

弔古離宮外。城南大道分。馬邊蝴蝶近。天末杜鵑聞。日照他村雨。風驅遠浦雲。春光可怡悅。旅思不紛紛。

夏日村居

武谷泉 六甲

午枕陶家興。小牕對素秋。三盃甘薄酒。五月任披裘。雨意蛙聲亂。夕陰螢火流。村居只偃蹇。孰與一沙鷗。

川口泛舟

僧淨芳

不是天河水。人疑上九霄。塵襟茲蕩滌。仙樂已飄颻。斜日分城闕。層波通海潮。欲探明月壁。一掬擬星杓。

將赴有馬下舟漢河

伊藤榮吉 士善

舟行百里程。秋色滿天清。皎月山容麗。金波樹影明。推牕漁火點。回棹宿禽鳴。半夜眠難就。吟詩共友生。

溫泉寺

岩垣彥明 亮卿

石磴瑠璃色。高懸慧日明。鯨音搖壑冷。藥樹滿庭清。燈照千年刹。泉靈萬國名。來遊仙佛境。換骨一身輕。

石山寺

同

山石奇蹤古。湖雲梵閣懸。門依青嶂設。僧對白鷗眠。八月吳江水。千年湘竹烟。自堪觀世外。不必問安禪。

次韻子淳子淳住天津

久保信行君利

杖履尋君宅 俱憑湖上樓 文章同臭味 盃酒舊風流 雨濕閑棲鷺 煙晴出釣舟 不須非土感 一醉氣千秋

雪夜訪友

永田忠原俊平

江山雪初霽 百里布瑤華 試步柴門下 放舟野水涯 淡雲渡鴻鴈 缺月上蒹葭 風咏興何盡 直應到戴家

題壁

早苗三寧

風雨千山暮 乾坤一葉秋 悲哉難作賦 卒爾易生愁 天末家書隔 世間友道休 范張終不至 鷄黍爲誰求

北野探梅

清勳公績

獨欲探春信 梅花北野陲 清香風外冷 踈影月前奇 暫駐烏藤杖 微吟白雪枝 寄言酒樓笛 今夜不須吹

懷讚州妙高文

今大路源浦

渺渺天南郡 悠悠寄所思 海山千里別 風雨一秋悲 縮地元無策 寫心但有詩 孤燈耿殘夜 正是懷君時

岐岨道中

畠中正盈寬齋

古城芳草沒 誰亦勒功勳 關樹多含雨 潭烟半作雲 巖歌隔泉脉 峯聳轉星文 一夜投山驛 清猿入夢聞

除夜

餘公瑟伯玉

除夜寒燈下 尋思笑此躬 素琴稀所值 彩筆一無功 世路風波險 人間日月空 今年看又過 春晚出塵中

歲暮

鎌田鵬玄珠

歲月悠悠晚 客愁續續新 應知行樂地 不屬遠遊人 活計三盃酒 生涯一葛巾 可憐將落魄 明日復逢春

夏日偶成

僧魯州

多病苦炎熱 蕭然坐草堂 蟬聲當戶噪 松吹隔溪長 庭際年年蘚 案頭日日香 與誰言此意 瞑目到斜陽

遊山寺

僧實聞荃菴

曲磴山門古 幽尋倚杖藜 白雲秋色澹 金磬夕陽低 松老橫高閣 楓落照一溪 寥寥無客到 獨向壁間題

夏日遊宮川

度會末顯

稍識仙源近。柴門各自幽。桔槔依獨樹。雞犬隔清流。竈有丹砂伏。崖看瑤草稠。人間若可謝。此處是玄邱。

仲春訪正木見龍

荒木田興正

尋訪櫛川曲。行行綠水邊。莓苔印轍跡。篁樹隔入煙。遙逐蘇門嘯。近思谷口賢。幽棲知不遠。鷄犬敗籬前。

首夏漫興

片岡承行子順

忽驚朱景至。筇杖出林東。堤柳全遮日。池荷漸動風。咏歸春服後。回望夏畦中。還向昨遊處。落花一徑紅。

雪中尋梅

馬島安榮君用

欲問春消息。試尋雪後梅。要看一朵綻。忽訝千株開。和月色難辨。追風香暗來。青囊兼瘦杖。行盡水之隈。

中秋無月和答田生

河合維修

浮雲千里合。遺恨各天生。不見明珠色。空聞清漏聲。孤燈催睡暗。斗酒與誰傾。只有西風落。坐來傳鹿鳴。

白鶴老人集得長字

山英

金花纔咫尺。遶坐白雲長。松暗應棲鶴。石搖欲叱羊。閑中人不老。醉裏臥何妨。偶入遊仙境。薄言對渺茫。

送金龍上人還京

山處和其一

西天歸路迥。蘭若赤城陰。苔滑承趺坐。松高和梵音。華山繞寶地。白水抱珠林。一片浮雲色。看君不住心。

滄洲書至云還自海西今在京師寓于法泉寺贈此促歸

朱義君宜

忽傳西土信。抵掌喜何如。浮海探仙窟。遊京託佛廬。千山三伏日。萬里一行書。爲報相思切。那能長索居。

夏日訪觀上人

高浚士明

化城三伏日。山樹綠陰深。幽鳥巢虛閣。暮蟬噪密林。微風薰法席。迸水滌煩襟。淹坐忘炎熱。轉論世外心。

客中秋雨

佐伯樸季履

九月看將盡。無衣客未歸。江天雲漠漠。山路雨霏霏。鴻鴈聲逾亂。梧桐葉已稀。獨斟小亭酒。更覺遠遊非。

秋夜有感

松山猷 子植

陰雲天地暗。伏枕自凄其。寒雨撲牕夜。亂蛩近砌時。貧交無舊態。感興入新詩。不寐幽懷切。轉增秋晚悲。

【松山氏。世住越後絲魚川。客歲子貞遊京師。受學魯堂。又學詩於余。詩才絕人。間有傑作。不懈則當為北陸作家。此篇亦大有佳處。】

遊理性院

鈴木有弘

曲磴烟蘿邃。登臨一院秋。山粧霜後色。海接檻前流。竹裏棋聲靜。松間鶴唳幽。坐迎東嶺月。歸路傍沙洲。

秋夕

藤周 子山

野水衡門下。棲遲秋氣寒。樽從留客醉。琴懶向人彈。詩賦有叢桂。歲時只釣竿。興來更移榻。孤月照欄干。

倦夜

田千秋 夢鶴

衝窓霜氣至。展轉小堂中。爐燼灰成雪。燈殘華落風。枕欹愁易集。帳冷夢全空。起坐數更柝。寒聲西復東。

宿全良寺

竹吉 泰

數里山中路。深秋到上方。池荷餘敗葉。籬菊吐殘香。林晚華鯨度。院閒蓮漏長。夜闌參侶少。寒月照禪房。

江亭

東 璞

不羨輞川勝。風煙滿此亭。集洲群鳥白。隔檻數峯青。遠水開明鏡。孤城列畫屏。漁歌堪勸酒。何學楚臣醒。

題某上人房

熊阪邦 子彥

愛爾東臯好。還逢秋色深。龍門風浙瀝。鷺嶺氣蕭森。井上梧桐盡。牕間蟋蟀吟。亦知遙夜月。皎皎照禪心。

秋夜得霜字

中島恒久 子成

愁心聞蟋蟀。切切繞頹牆。官況林泉遠。貧居草露漚。元龍無客禮。中散但踈狂。空見牕頭月。亭亭照鬢霜。

春日臥病

岡壽卿 元齡

蓬門常寂莫。長者不回車。伏枕三春雨。憑欄一樹花。疎材無所用。多病但堪誇。過客如相問。臨邛賣酒家。

舟次牛渚

永井貞卿 孝幹

津樹秋風起。篝燈海色寒。鄉書雲外斷。客路月中看。山接黃薇國。帆過白石灘。方舟不相識。轉覺別離難。

冬夜雨讌集紅梅館

宇都維潭 士龍

高亭冬夜宴。滿酌覺寒輕。雨促紅梅樹。人吹碧玉笙。英華隨筆發。流響遏雲清。不是蘇門嘯。偶聞鸞鳳聲。

海樓避暑

奧山久武 如山

同遊携手處。避暑海邊樓。目極蜻蜓國。心閑白露洲。非關王粲賦。準擬謝公遊。豐土誰言遠。人烟古帝州。

淡州雜詩 五首錄一

島津義張 琴王

海風吹古木。客路雜樵漁。萬里雙龍劍。孤身一笈書。波濤傷日日。雨雪沾衣初。自笑雄飛志。圖南事或疎。

同諸子遊今浦

今浦或稱琴浦

荒川為考

松籟響琴浦。潮平好泛船。雲晴出遠樹。雨罷作輕烟。飛鳥紀山外。故人淡島邊。臨風自多思。况值月明懸。

擬宮中行樂詞

岡水室

六官含麗景。面面繡帷開。翠眉巧欺柳。寶髻斜插梅。彩虹橫閣道。天樂下瑤臺。阿監急相報。宸遊簇仗來。

舟中晚望

鈴裕 仲舒

帆外水烟白。凄其殘月孤。舟船何處所。遠近互相呼。樹斷雲縹緲。岸迴山有無。曉鐘聲僅落。霞彩照平湖。

謁春臺先生墓

北山皓 白甫

君去歸何處。紫芝空有園。一邱埋傲骨。片碣拜師恩。舊事堪追憶。新編誰復論。空留千載業。猶自壓中原。

五日遊禪林院聽諸子奏樂

田中遜之 箕山

五日蓮華社。相携訪遠師。罄歡時弄管。續命那須絲。淨境塵心息。妙音天樂疑。淵明不解律。對酒獨攢眉。

次韻宅美卿春日江村作

中山惟貞 子幹

一徑江湖上。茅簷八九連。飛花三月雨。幽竹晡時烟。開圃何嫌小。買魚好割鮮。晚來人去盡。鷺立岸邊船。

夏夜小集得深字

橘雍 子和

高堂同避暑。况復結交深。風色生細簾。泉聲和夜琴。行杯螢照席。移燭鳥驚林。徹曉不須去。聊酬投轄心。

秋日訪井子豐臥病

伊藤維寧

假蹇辭過客。風流伏枕求。吟詩蘇病骨。服藥試仙遊。林下清音起。海門蒸氣收。長生君勿怪。天地是滄洲。

九月十三夜

三宅芳隆 嘯山

明月照鈎欄。苑林秋色闌。碧天輪未滿。白露光先寒。一有寬平詔。傳成永世歡。清輝今夜過。三五亦空團。

秋日臥病

藤有行

驟雨消殘暑。西風送晚涼。開牕數來鴈。伏枕厭鳴蟬。小徑槐花積。短籬豆蔓荒。悲哉堪可賦。物候使人傷。

山中

邱綱尚

山中人不到。花落送春光。林雨朝添翠。溪流日泛香。牕前鶯語老。屋後柳條長。空恨年華歇。高吟對夕陽。

竹林避暑

桑公祥

為避人間熱。相携入竹林。微風吹散髮。濁酒滌煩襟。賦筆平臺色。玄言正始音。尋常松籟好。何若此君深。

送人歸贛州

蘆玄虎 文炳

憐爾歸歎歎。扁舟逐旅鴻。駕來逢叔夜。此去少車公。珠可探南海。書難寄北風。各天相憶處。回首月明通。

登高

關虎 叔文

登高四望敞。春色倚崔嵬。鳥影層雲外。人家積翠隈。鐘聲穿紅樹。返照落青苔。時欲寫秋懷。愧非落帽才。

和雲律師韻

僧玄韻 栖霞

蓬門塵事絕。豆粥養殘生。老樹交新樹。磬聲和水聲。雨苔連屋壁。霞彩入溪明。鳥去定僧出。經行復幾行。

秋夜書懷

僧香 嚴

獨夜秋牕下。吟詠轉悵然。故園遙萬里。客舍經幾年。鴻度無書到。月明有夢懸。詩名非我事。豈可老風烟。

梅雨新晴

立花氏

仲夏連朝雨。苔痕四壁空。新晴含返照。濁潦浸殘虹。開帙薰風至。把盃荷氣通。暮蟬吟未歇。孤月挂林東。

姪興正齋前花發得香字

荒木田氏

櫻花開近席。靄日照垣牆。家卜林泉趣。座陳桂醑香。嘉魚求不遠。好鳥哢逾長。向晚催陰雨。咫尺歸何妨。

日本詩選卷之四終

日本詩選卷之五

平安 江 邨 綬 君 錫 著

姪 清 勳 公 績 同校

受業 永 田 忠 原 俊 平

五言排律

菅公子冠且有攀桂之榮陪筵恭賦

伊藤長胤

紀元文化洽。舊典錄才賢。祖德耿光遠。英風奕葉傳。茂材登科日。榮爵拜恩年。世守絲綸美。貴遊簪裾聯。婆娑同上壽。踰躅叨陪筵。千古詩書在。爲君勸勉旃。

賦得殿閣生微涼

室直清

亢陽驕盛夏。畏景赫長空。御節尊炎帝。司方屬祝融。君王嘉永日。清豫樂深宮。芸閣澄佳氣。蘭臺引景風。綺牕交豁達。瑣闥互玲瓏。霄漢鳳樓迥。芙蓉仙掌崇。槐陰垂玉砌。柳影夾珠櫳。露

冷蟬常飲。欄高燕自通。神怡寰宇敞。心適道情冲。無復憂煩熱。何由問蘊隆。幸逢舞干戚。淹此
息兵戎。設讌招羣士。開樽喜共功。九農欣麥熟。四海報年豐。藻詠頌時育。朱絃鳴聖衷。披襟
觀物化。解慍與民同。借問窮廬下。何如廣厦中。生靈連一體。愉樂敢私躬。但願霑時雨。莫令
草野紅。

【典莊雅健。才學並見。○鳩巢集中多長律。或五十韻百韻者。今並不收選】

秋夜旅懷

同

海風吹驛樹。搖落遍邊州。方抱馬卿病。仍登王粲樓。川原茫欲夕。雲物澹云秋。孤鴈天邊過。候蟲
草下幽。清霜飛荻岸。明月滿蘭洲。中夜噪烏鵲。平沙起白鷗。林棲何寂寂。水宿亦悠悠。去國羈
臣思。離家遊子愁。一從違魏闕。相望戀朋游。鄉信長難報。空傷歲月流。

賦得碧瓦霜寒

源 瓊 白石

碧瓦霜初落。上林鴻已飛。銀河分素影。璧月帶清輝。萬井金鐘徹。千門玉漏稀。夢寒驚鳳枕。坐冷
隔鴛幃。綺席宵添酒。薰爐曉煖衣。城南多思婦。不寐織殘機。

九月十三日賀平子壽七十一

同

【自注云。子壽三世名暨者。命題云菊契千秋。即和歌題也云。】

華誕良辰會。垂弧耀畫堂。幾望黃應月。晚節菊凌霜。東海延仙侶。南山對壽觴。千齡添景。七

菱襲林祥。種玉靈苗秀。煉金繁蕊香。夕餐供寶鼎。朝飲泛瓊漿。馥郁薰詞席。斑斕映舞裳。長
生真有術。何望白雲鄉。

中秋泛舟暮過牛頭寺

同

蘭楫中流動。長風玉笛哀。青林圍寶刹。碧水繞香臺。仙梵秋潮響。華鐘晚日頽。鴈王標塔過。龍
女捧珠來。槎泛天河近。桂飄月路開。朗吟牛渚夜。清興爲誰催。

八月十六夜海天望月作

同

可憐今夕月。還勝舊時秋。縱有金甌缺。應將玉斧修。滄溟波不動。碧漢露如流。夜靜蛟龍舞。
天明罔象愁。鴻傳千里字。人倚萬家樓。最識無私照。清輝遍九州。

癸卯元日

梁田邦美

海南多淑氣。閩郡壽千春。銅虎專城久。土牛迎歲新。流澌環畫舫。旭日炤朱輪。濟濟熊羆士。區
區螻蟻臣。楚筵陪上客。鄭粲讓賢人。齒髮今如許。可能一獻芹。

和谷子炳十六夕對月見寄韻

同

高臺多灑氣。憑檻瞰江清。蘋末吹千里。樹間出五城。煙霏湘水暮。月露楚天明。坐久荷裳冷。醉
來蘭漿輕。絃歌應自喜。筆札使人驚。何日攀黃鶴。孤雲度大瀛。

【子炳東都人。此詩併前詩。景鸞赤石筮仕後作。】

送大潮禪師歸省西肥作

太宰純

應化無方所。虛空任去留。十年鄉土念。萬里水雲遊。大道元高蹈。連城不暗投。襟期兼百氏。才調曠千秋。文入莊周室。詩輕支遁儔。逃禪同木石。講法蔑王侯。爲有倚門望。難忘陟岵憂。扶筇蘇山水。發櫂浪華洲。玄澗風偏正。滄溟月共流。布金檀越在。持鉢苾芻稠。往矣江湖興。歸與竹樹幽。翩然從此去。別意兩悠悠。

【此詩鋪叙可觀。但玄澗所謂玄海洋。與滄溟對。殊覺偏枯。且同是海。詩律病之。可惜耳。

○平子和集中。長律。有氣象超逸可稱。但結撰龐朴。疵病間出。因不采錄。】

參政滕公府詠小池芙蓉得四支

服元喬

咫尺憑欄處。芙蓉出水時。已含仙掌露。疑植鳳凰池。相府生花近。雲臺捧日移。洗頭供玉女。過步妬瑤姬。衣整紅全艷。珠明翠未衰。誰爭初發色。自有謝公詩。

應人請賦得竹不改色爲岡田公壽

同

苞翠南山色。壽堂映綠樽。琅玕來鳳侶。蟠結護龍孫。不受風霜重。偏留雨露翻。凝光迎日御。聳簞上天閭。松讓蒼顏鬱。庭交玉樹繁。江東王氏貴。長對子猷園。

乙卯之冬猗蘭侯莊五松館側生靈芝賦此奉賀

同

郊垞廻風藪。谿壑蓄龍淵。此處生神草。由來異瑞煙。和蒸三秀色。氣接五松前。倚樹宜承露。

臨巖似挹泉。晨昏紫澤潤。咫尺彩雲懸。何必銅池上。不須玄圃田。休祥王者化。贊育我公賢。庶

績方無事。豐稷已有年。退朝移草履。之館展瓊筵。堪養茹芝老。非求避穀仙。頌聲歌誦入。賀

客酒杯傳。共醉清風德。還羞穆若篇。

諸子集觀鄴中西園圖

同

丹青資不朽。盛事在千秋。曾擬鄴中集。今觀西苑遊。披圖明月出。竟卷綠池流。玉樹光猶動。朱

華色未收。共疑分旅食。並坐飽珍羞。長此行杯滿。應緣飛蓋留。文章深敬愛。藻績久相求。公子

誰堪比。群才自作儔。傳神稱顧陸。曠世數曹劉。嘆息追隨志。悵然難可酬。

九日上金龍山與稷卿賦

高維馨

爽氣龍山出。寒流牛渚開。石蘿秋露重。隄柳夕陽催。佳節思前跡。同遊上古臺。清風吹落帽。黃

菊照銜杯。暮嶺鳴鐘響。霜林倦鳥回。登高惜餘興。握手尙遲徊。

出塞

同

星軺辭北闕。玉節指西羌。絕漠三軍帥。長征六郡良。風生金絡馬。霜吐綠沈鎗。楚練臨關壯。吳鉤出塞裝。黑山寒草白。青海陳雲黃。殺氣低空磧。旄頭動大荒。先登驃騎將。轉戰左賢王。鐵鼓轅門振。牙旗幕府揚。總戎圍朔地。破虜鎮邊疆。胡壘月將滿。漢兵秋更防。一身能報國。萬死獨當場。願勒燕然石。功名數建章。

中納言菅公挽詞

清德月卿推。名家野老知。簪纓希鶴髮。臺閣仰鴻儀。白璧元無玷。青蠅何得欺。朝天聞去歲。遊
岱歎今茲。附驥非迷路。登龍奈失時。空將三載望。長作九原悲。且問門人誌。寧論國史辭。沈痾
堪執紼。陋巷坐題詩。

晨起望東山晴雪

當戶東峯秀。開窓積雪鮮。初寒高鳥外。曙色遠鐘邊。出樹人家點。如絲樵路懸。餘清歸縹帙。明
霽落茶煙。梁苑應裁賦。剡溪欲放船。梅花何處發。昨夜夢相牽。

春色滿皇州

服元雄 仲英

大液冰開處。上林鶯囀辰。好生虞帝化。迎氣漢宮春。變理班陽令。風光入日新。河山非舊態。草
樹發天真。柳帶青雲色。霞連紫陌塵。浴沂皆冶服。拾翠幾佳人。甸野宜携手。煙火必有隣。京城
通淑景。率土及何濱。

樂山公子見枉村莊賦奉謝

同

陋巷通軒冕。衡門駐旆旌。葛巾寬禮數。華蓋此逢迎。甕牖腐儒隱。春風公子行。野呈芳草色。林
擁紫驪聲。旨酒尊何盡。落花茵自成。郊天收昨雨。煙樹入新晴。廢圃偏承潤。隣農訝勸耕。丘隅
憐鳥止。鼓吹有蛙鳴。預解無供給。任他遠市城。移厨分美饌。不羨五侯鯖。

邊馬有歸心

松崎惟時

絕影隨飛將。騰光出義臺。權奇維驥足。倣儻老龍媒。豈做韓原敗。誰憐屈產才。骨兼邊月瘦。聲
入海風哀。不見場苗久。空悲塞草摧。秋高胡馬動。顧步獨徘徊。

御溝新柳

伊藤 紹

嫋嫋御溝傍。千條柳色芳。天低分雨露。日近借輝光。綺靡涵波暖。參差覆岸長。枝枝還鴨綠。葉
葉變蛾黃。華蓋初堪拂。金衣漸易藏。王恭容可想。張緒態何忘。風蕩相磨倚。煙籠兩渺茫。不知
離別地。攀折幾人傷。

春風扇微和

同

帝里年光早。惠風草際歸。分晴浮瑞色。拂曙發春暉。綺陌紅塵暖。金爐紫焰微。催花度殿閣。織
柳入宮闈。澹蕩迎歌扇。悠揚送舞衣。陽和今漸遍。娛樂莫相違。

秋山極天淨

同

長風吹爽氣。萬嶺入新晴。遠映連江曲。衆娟遶洛城。仙區思縹緲。樵路指崢嶸。日落流霞赤。天
空彩翠明。秋光來宇宙。夕麗滿寰瀛。倚杖聊延首。躊躇愧子平。

春臺晴望

柳美 啓

龍盤虎踞地。梨白桃紅天。臺樹攀千尺。都城窮四邊。芳塵經緯路。沃土上中田。旣庶人家密。載陽

物象妍。滿空飛野馬。幾處放風鳶。靈巖遙岑見。葳蕤遠樹連。心追冥鴈迥。興被晚霞牽。欲去脚
踟久。踈鐘花外傳。

同木士豹上叡嶽絕頂

同

崎嶇三塔路。突兀四明巔。勢壓東江壯。脉通北陸連。威靈鎮赤縣。絕頂衝青天。塊聚視羣阜。枝
分指百川。都城基野正。湖水鏡奩圓。遠嶼蒼茫底。冥鴻咫尺前。高歌驚伏魅。逸興想登仙。客有
風流韻。物無塵俗緣。行藏共論志。老少各忘年。偶酌乘微醉。遞吟成幾聯。欠伸寬宇宙。身世淡
雲煙。借問爾時趣。人間誰復憐。

微雲淡河漢

皆川愿

纖月城垣隱。明河耿未收。依林踈雨霽。籠漢澹雲流。接地寒無色。含虛曠有秋。歛侵龍闕暗。
還拂鵲津浮。玉繩夜難結。清霜曉欲愁。玲瓏相望處。一夜奈羈憂。

遊富春山

松秀雲

秋風吹客鬢。落葉滿人家。嵐翠浮松杪。江光冷葦花。冷冷上方磬。閃閃遠村鴉。野曠低山樹。潮
平泛釣槎。歸帆連杳靄。鳴雁起寒沙。因縱登臨興。坐來返照斜。

現嶺道中作

同

山晴多彩翠。登覽一銷憂。琪樹尋蕭寺。青帘問酒樓。攀松藤蔓引。下岸檻泉流。麥隴將雜雉。

花林拂羽鳩。餘春耽逸興。携客恣閑遊。招隱如堪誦。叢叢岩桂幽。

南宮喬卿

雨中臥病簡山共之田子風
棲遲吾所分。空鎖舊松筠。伏枕憐今雨。揮毫憶故人。才縱稱曠達。跡自附沈淪。白髮愁初見。金
丹術未真。耻無飄舉態。遂誤遠遊身。陸橘推前美。潘輿是後塵。友于俱壯麗。交會弄芳辰。不厭
蓬蒿選。出尋二仲頻。

副保卿

同賦秋江夜泊得秋字
辭家知幾日。爲客已高秋。沙岸三更月。霜天獨夜舟。櫂歌驚旅夢。漁火照鄉愁。水樹淒風動。篷
窓冷露浮。雲迷鴻雁渚。波白荻蘆洲。遙夜徒危坐。一寒奈弊裘。

鳥宗成

驅蝗
千村共驅汝。去去勿夷由。不畏炎風日。長驕白露秋。肥田朝沒畝。瘠土夕盈疇。忽破盛時樂。
能添饑歲憂。曾聞鷓鴣啄。寧有鳳皇求。明主吞難盡。黎民捕未休。火攻非下策。水灌是良謀。只
願乾坤裏。無令遺種留。

田章鳴門

登金閣寺
層臺依蔭翳。飛閣插蒼穹。色相煙霞外。人天指掌中。長松當戶翠。午日傍軒紅。俯識栴檀氣。仰
聞河漢風。邱陵齊自出。林薄遠相通。云是源公宅。今爲梵帝宮。黃金無上客。白玉集仙翁。蓮座

知神在。鏡池悟性空。花繁鳳城北。雉離鹿園東。惆悵千春後。誰詢一世雄。

贈賣茶翁

有自注。畧不載。

合離麗王

有髮僧形古。陌東屏跡偏。五山高法臘。六祖遠心傳。當選松爲塵。伺門竹若椽。風旗疑酒肆。霜

葉認茶筵。好事他新識。清談是宿緣。寧無博士著。不計老婆錢。朝采梅峰種。夕和鴨水煎。侯

湯誰聽雨。赴鼎自薰烟。木產蓮池玉。尚通雲閣仙。飲中知淨理。一味澹參禪。

世肅席上同諸子咏瓶中紅白梅花

葛張子琴

膽瓶春一種。更吐兩般奇。折去問何處。寄來知是誰。堪寒凌朔雪。向暖挺南枝。蝶粉盡全細。猩

紅葩半歇。爛星圍皓黃。膏雨濕臙脂。粧點壽陽額。奪將姑射肌。珊瑚穿鐵網。沆瀣溢銀卮。綺席

陀顏映。紙窓嬌面窺。珠簾鉤影淡。絳燭淚痕滋。照閣西湖志。對吟東閣詩。因名帳須製。按曲笛

休吹。新水宜相換。狂風能自持。香添君子室。瘦效道人姿。既醉羅浮酒。嬋娟入夢時。

三日遊青松院

院在上福島。古稱鵲林。

同

紅塵蠶市遠。碧霧鵲林連。蓮社討盟日。蘭亭修禊年。堂張唐雅樂。坐滿晉名賢。也是禁杯酒。不嘗

妨管絃。清音通八水。逸響徹諸天。庭際花成雨。池頭草作煙。踏青親石友。拾翠報金仙。飯飽

衆香積。茶參一味禪。暮鴉隨覺路。春浪渺迷川。辭出燈龕下。餘光照大千。

三月八日遊墨江

同

臥遊還有倦。行樂興無窮。青甸花蹊達。墨江水道通。樓船多載妓。杖屨或携童。草嫩服添綠。桃

殘顏奪紅。農家含艷景。漁網晒晴風。沙嘴露文蛤。海心吞彩虹。歌筵林表裏。酒店路西東。松暗

危橋外。燈明邃宇中。大都交佛典。只是贊神功。一切經爲會。十天樂未終。鳳帷人雜沓。夔鼓雨

空濛。方沼舞雩晚。詠歸伴斷鴻。

岡元鳳 公翼

和葛子琴遊墨江十二韻

淡島望仍遠。墨津途那窮。潮痕漁浦接。村逕酒樓通。步屨江湖客。追隨六七童。淺汀行拾翠。深巷

或探紅。珠貝全遺渚。魚龍不激風。茂林籠白日。架木吐丹虹。猊鎮神宮北。鳳臺華表東。文章踪

自舊。景仰意新中。法會張天樂。仙儀欽聖功。笙簧音四起。羯鼓舞三終。已識雲遊漢。寧疑雨色濛。

飄飄君可羨。獨自愧吳鴻。

【公翼詩名伯仲子琴。子琴才妙。間傷過巧。而公翼能守法度。余數稱之。】

春臺望

清 綸

層臺開遠矚。羣物媚春陽。廻合宮城出。縱橫市井長。衣冠馳道上。歌吹狹邪傍。殘雪融遙岫。晴

烟擁密篁。川平搖鴨綠。柳弱弄鵝黃。花帶游絲映。鶯兼翡翠狂。風流朋在坐。登覽酒盈觴。鳳

輦知時出。雲成五色光。

鮫人潛織

唐時試士詩題

江邨秉 愚亭

貝室重淵闕。鮫人弄杼時。陽精光不徹。陰魄彩相隨。水綃非蠶種。青藍染藕絲。機聲和波響。梭影亂文漪。成匹盈筐筥。逐羣臨路歧。泣珠元不易。海市莫相疑。

八月十七夜陪北海先生及二令子道卿孔均賞月廣澤得無字

柚木太玄

廣澤宜明月。煙光入畫圖。開樽臨水曲。設席對山隅。池上秋偏淨。檻前晝不殊。金波搖激澗。碧嶂涵縈紆。霄漢織雲盡。天階片影敷。團圓輕趙璧。燦爛笑隋珠。鸞鏡應非缺。仙娥未改姝。桂花看如此。葦蕪亦何拘。顧眄情逾密。留連興豈孤。見君橋梓愛。羨爾鵲鴿俱。所愧才多少。勿論賦有無。昔聞推二陸。今喜接三蘇。忘返慵携杖。恣懽仍擊壺。良宵何限賞。欲去更踟蹰。

假山

僧令椿 湛堂

心匠疊雲骨。為山奪化工。飛來疑鷲嶺。湧出自龍宮。群嶂環如拱。孤峯竦最雄。青蓮開小朵。玉筍挺脩叢。高下形非一。縱橫勢不同。樂偏屬仁者。移豈笑愚公。盛夏猶含潤。新晴欲吐虹。寒光侵几席。秀色映簾櫳。穿竹暗泉迸。縈苔回磴通。階前盈尺地。坐覺在壺中。

九日歸京舟中

僧顯常

閑居無所卜。來去一扁舟。此日登高興。翻為擊汰遊。斷雲低遠墅。泛鳥下清流。兩岸蒹葭晚。孤村砧杵秋。村童逐社鼓。行客和漁謳。顧眄移山岳。縈紆轉渚洲。澄江茶可煮。佳節酒無酬。明日東籬菊。猶堪哀露求。

南紀桃谷丈寄寓台麓讀書賦贈

僧慈周 六如

旅服春風軟。草生紀水涯。挂帆城堞轉。驅馬壑雲遮。楓暗沙中雨。棧懸林杪花。乾坤康樂屐。富貴少游車。青惜龍門樹。赤知台嶠霞。蹤將追白足。官未忝黃麻。鸞轍隨烟霧。儒冠笑土苴。君看列仙傳。過半係吾家。

日本詩選卷之五終

日本詩選卷之六

平安 江 邨 綬 君 錫 著

姪 清 勳 公 績
受業 永 田 忠 原 俊 平 同校

七言律詩上

梅花

名園桃李競嬋娟。 憐汝清寒倚竹邊。 東閣題詩人動興。 西湖載酒鶴迎船。 點茗欲效霏霏雪。 傍柳偏含淡淡煙。 玉笛誰家明月下。 曉風咽斷更凄然。

村上友侖 東嶺

歲晚小集作

青樽歲晚思難禁。 共見頭顱霜色深。 忼慨強收燈下淚。 低垂姑任世間心。 愁邊一笑比雙壁。 老後分陰重寸金。 薄宦身閑亦天幸。 清時莫作獨醒吟。

同

【惺窩先生。中興斯文。而後巨儒碩匠。篇章傳世固多。五七言絕句。及五言律。間有可錄。若七律。首尾完整者無幾。冬嶺而後體格始備。因首載焉。○冬嶺前七律雖體格未全。或優柔自然。或用意精巧。可稱揚者。草山集所載。僧元政尋殘花詩。名賢詩集所載。大田林菴遊豐國廟。松永昌三應制賦上林。紅白牡丹。安藤省菴感春。北村篤所山行。其餘猶多。】

詠鷹

松下見櫟

齊野玄霜楚澤水。十分猛氣正騰騰。目中今已無凡鳥。天外常思制大鵬。利爪幾經紅血戰。奇毛深入白雲層。誰言一飽即颺去。左指右呼憐爾能。

【子節一時作者。惜乎七律傳者不多。此篇今時輕俊子弟指為宋格。然氣骨蒼老。精神雄動。自是合作。又有養老瀑布七律。亦佳。今不全記。為可憾耳。】

咏塵

伊藤長胤

洛陽三月鬪芳菲。爭奈遊人浣素衣。客舍朝來遭雨滯。午臆影裡和煙微。客稀榻上長相委。歌罷空梁落更飛。城市山林隨處在。斯生避避復何歸。

中秋無月

同

滿架圖書散未收。仍開絡緯動清愁。嘗期佳會三秋半。那意賞心一夕休。雲影無人橫北渚。雨聲伴客近南樓。百年天地恨何限。慵去滄洲伴白鷗。

三月晦日送別

鳥山輔寬 碩夫

堂堂春事一宵殘。花底開筵欲別難。身上青袍違我計。杯中綠蟻盡君歡。津亭有月吟應好。野店無燈夢亦寒。洒淚肯為兒女態。直從醉裏發征鞍。

季春遊谷口亭次友人韻

同

數家雞犬碧山阿。中有孤亭隱薜蘿。幽徑埋香花片積。古松堆翠鶴群多。煙霞渾可遺塵想。澗壑肯容通世波。倚遍欄干猶惜去。歸牛已下夕陽坡。

中秋無月

鳥山輔門

細雨如絲洒未休。賞心零落懶登樓。嫦娥漫負中秋約。蟋蟀頻添孤客愁。五夜銀缸明的的。一枝金桂遠悠悠。人間安得知微術。天柱峯頭把酒遊。

秋夜喜子登來訪

澤維顯 宮內

一室蕭然水竹灣。胡床相對共開顏。含杯新月窺簷隙。說劍悲風動坐間。老去虞卿書未著。歸來陶令跡何閒。莫辭酌酒永今夕。世路艱難鬢易斑。

尼南晚望次冬嶺老人韻

江邨篁 義菴

翠竹森森自作班。曳筇緩步白沙間。雪花墮地旋消盡。春色留吾不等閑。落日雙垂橋外柳。斷雲爭出海中山。睡鷗定到華胥國。浦口風收舟未還。

和登山韻

江郎惊實

雙屐躡雲千丈巔。渴來松下嗽清泉。躋攀路缺榛荆合。臨眺野晴畦畛連。幽鳥一聲鷹澗去。斜陽半嶺報昏偏。生平空抱煙霞癖。何處高栖得息肩。

訪岳陽翁

同

清隱如君更可嘉。柴門斜擁竹交加。高談留客傾家釀。幽賞品泉烹建茶。煙際近馴窺硯鳥。雨餘半落匝墻花。向來欲約頻頻過。溫藉定知不我遐。

【翁姓江郎。名宗純。嘗以文學仕肥後侯。致仕之後。退隱京城西南。鷄冠村。園中有岳陽齋。因以自號。翁亦文詞雄贍。但任意揮霍。詩律多乖。以故無所收選。】

野宮懷古

伊藤元基 宜齋

野宮陳跡久相思。此日經過無限悲。華表到今橫古道。柴籬依舊帶叢祠。陵園空閉春風面。齋帳爭禁秋雨時。幸遇聖明除弊事。鶴鷄晝叫老松枝。

長濱眺望

同

春風十里過湖傍。拍岸餘波濺客裝。浩蕩天隨山盡處。依稀島在水中央。鷗聲隔霧聞纔辨。帆影入雲認却亡。驛路馬蹄倉卒去。不能留賞苦相望。

侍讌藝侯應命賦呈 有小序畧之

堀正超 景山

漢家盤石古諸侯。城闕雲開十二樓。萬井人煙鷄犬曉。千村社酒稻粱秋。黔黎久受春臺樂。政典永貽金

賈謀。卜世應將仙劫數。神山紫氣海頭浮。 神山謂嚴島。

次韻鼎洲師

堀正脩 南湖

避世工夫誰若君。山林城郭本相分。槩南蹤跡六環月。湖北夢魂一衲雲。春色上梅擇枝折。雪聲度竹倚窗聞。泉溪脉脉久尋取。汀鶴沙鷗不與群。

郊行有感

大井守靜

春徑風香里社邊。池塘留夢草如氈。水涯僧院梨花雪。竹裏人家柴火煙。伏櫪誰求千里馬。齊眉徒憶五噫賢。行行有感未歸去。華頂峯頭暮月懸。

西河卜居次某韻

入江兼通 若水

漫將山水作生涯。纔挂孤瓢即我家。傍岸苔磯魚可釣。隔橋茆店酒堪賒。聞笙先認遊仙駕。倒屣便迎長者車。連榻終朝觴咏處。滿林霜葉勝春花。

遊猪飼氏廣澤別墅

同

風翻麥浪竹關開。醉坐池亭洗俗埃。松翠暗霑頭上帽。藤花低映手中杯。沙禽驚客飛相避。村犬馴人奔倏回。剩水殘山君所占。清幽豈道路無媒。

擬宮人入道

柳川三省 滄洲

僊風吹斷內家粧。雲雨茫茫別路長。環佩猶餘漢宮賜。霓裳不染御爐香。霄間何處聞鷄犬。樓上有時
駕鳳皇。早晚瑤池再開宴。碧桃花下侍君王。

新年書懷

同

晴牕睡起向春陽。楊柳參差日影長。羞對菱花問勳業。吟斟栢葉附行藏。天涯兄弟書千里。海內交
遊夢一場。恨值新年却無賴。衰年多病兩相將。

送人之濃州

同

西風萬里動關河。搖落何堪送玉珂。遲暮誰憐平子賦。清時猶唱伯鸞歌。路連山嶽愁雲合。天入江
湖旅雁多。聞說濃陽秋水澗。莫將簑笠老煙波。

【滄洲七律一時之選。所錄三首之外。佳作尙多。以其繁不悉載。】

淀川舟中作

僧百拙

寒林鴉背夕陽紅。踈柳橋邊買短篷。唯覺身昇天碧上。不知坐在月明中。隔洲犬吠孤村火。罷釣人
歸一櫓風。思算往年過幾度。滿頭慚愧雪鬢鬆。

【百拙南湖詩友。才學超凡。爲方外一敵國。但勤建一家基礎。不循詩家規度。是以雖多妙語
警句。全章齊整可收選者無幾。七律殊甚。余爲禪師深惜之耳。】

早發魚津

越中地名

室直清 鳩巢

朝發魚津傍海來。平原曠野望悠哉。清川水落石爭出。疊嶂雨收雲未開。處處人煙分邑里。時時
氣結樓臺。越中百里山河固。明主須求撫御才。

【蜃樓海市。我邦各處之有。就中越之魚津最常現。邑人慣見不其奇之。富山西士明。嘗圖記
所目擊以寄眎余。且曰春夏之交。天氣和暖。海雲釀雨之日必現云。】

琵琶湖上作

同

琵琶湖上水連空。萬里虛無目擊中。疊浪涵天迭高下。群山分地各西東。孤村遠樹迷圖畫。百尺長橋
飛彩虹。獨覺芳洲生逸興。不知此意幾人同。

鷄冠花

源 瓊 白石

仙葩曾下白雲端。遙想淮南靈藥殘。燕燕辭巢花已結。猩猩滴血色初乾。朱冠相鬪秋風亂。綉頂如鳴
曉月寒。孤劍不須中夜舞。客情空對碧欄看。

冬日牡丹

同

十月江梅未吐芳。一枝妖態漏韶光。春宵夢入吳宮艷。月夜魂歸漢殿香。日映繡窓催短景。風飄
錦幄拂嚴霜。可憐玉色寒無粟。始信溫柔別有鄉。

少年行

同

十二翠樓臨狹斜。長安遊俠競豪華。金堤塵動章臺柳。玉道風開杜曲花。寶馬忽過三市陌。錦綉還醉

五侯家。鬪鷄走狗春長好。不信青門老種瓜。

和山成中秋韻

同

西風吹起木蘭舟。到日江天玉露浮。鴻雁書來千里月。芙蓉劍老十年秋。黃金臺上誰求馬。白石歌中獨飲牛。亦識山公終貴盛。當時不入五君流。

祇生席上贈白峯

同

碧瓦霜飛落木餘。燈花聊伴竹間居。天寒紫氣雙龍劍。歲晚青雲一鶚書。衰鬢只應知己惜。交情漸覺世人疎。相逢共感綈袍贈。未必王門問曳裾。

重和室直清次春初韻

同

才名落落重中州。此日江東賦遠遊。萱對北堂春不老。草生南浦水空流。百年壯志曾題柱。萬里鄉心獨上樓。莫說瑤華難可報。采蘋猶自用公侯。

見梁景鸞寄鶴樓詩悵然有感因和其韻

同

綠酒天寒紫綺裘。蘭燈一夕接風流。彩毫幾見傳新賦。華髮何堪憶舊游。莫問五噫生感慨。遙知七序繼春秋。當時玉笛今零落。吹盡梅花懶上樓。

詠燕

祇園瑜

曼娜垂楊綠映沙。渡波歲歲記年華。東風春恨誰相語。細雨香泥半是花。芳草籠烟滿野暗。柴門帶水

孤村斜。玉樓繡戶珠簾捲。獨入當時王謝家。

詠白鷺

同

孤高清瘦絕埃塵。唯與汀鷗堪日親。踈柳寒堤雪漠漠。青莎白石水粼粼。涼風不惜遺揮扇。生計誰爭伴釣綸。一半斜陽林影晚。群飛非是負遊人。

【余近讀祇南海詠物詩鈔。宛轉流麗。嘆服才美。但脫畧聲律。金石多乖。白璧微瑕可惜。】

恭奉次小倉藤公賜韻二首

同

名公品藻孰能先。久仰芝蘭奕葉聯。天上星辰照環衛。人中鸞鳳出群仙。筆花爛粲奪宮錦。墨霧氤氳帶御煙。更向延英殿上望。何惟風采映瑤篇。

其二

同

天開錦繡是神京。南鄙山川寧比清。紀水未堪控江漢。秦童妄自認蓬瀛。人空明月扁舟興。歌盡白潮孤鶴情。欲報瓊章問泉石。滄浪未遂濯塵纓。

【大納言藤公。雅尚藻思。作詩寄人。乞和以爲娛樂。亡論一時名高之士。遐陬遠境。學究

寒禱。僅解作詩。每聞其名。必泛寄漫投。前後無慮數百千人。諸家集中。無不有奉和藤

公之作。而往往輕薄失體。何則藤公官歷參議中將。是以和詩多爲台鼎之語。登壇之辭。如

南海和詩。可謂能得其體。以故標出。】

贈隱士

雨東伯陽

鶴湖山下少微星，澹泊幾年養性靈。門外那看題鳳客，案頭時閱換鷲經。密篁繞逕千竿碧，輕絮拂簾五柳青。長物平生惟甌石，何論西蜀子雲亭。

中秋對月

南景衡思聰

雲間皎月滿南樓，光彩射人逼客裘。河漢遙流千里影，關山不隔一輪秋。金風吹樹芙蓉老，玉露侵階蟋蟀愁。聞道今宵海樣遠，相隨願得到神州。

次祇伯玉寄陶石梁韻以寄二首

同

一別參商萬里餘，悠悠往事片雲如。鶯花空濺杜陵淚，風月每懷玄度居。才大功名難處世，氣高詞賦欲陵虛。休言契濶交情薄，越嶺無鴻可託書。

其一

同

幾歲江湖絕雁魚，詩情酒態近何如。猶懷燈火連床話，還訝夢魂隔世居。燕子微風春院靜，梨花淡月夜窗虛。愁來欲訴心中事，多少情長不得書。

北溟眺望

南景春國華

寺臨無地出塵寰，海色浮來妙見山。積水遠圍三島外，怒濤高蹴九霄間。樓連蜃氣青天遠，雲斷鵬程白日閑。誰得乘槎凌碧落，超然遙犯斗牛還。

秋日寄南紀祇伯玉

岡島達

江上秋風柳色疎，故人此日意何如。昔逝渾似夢中話，生前只疑世外居。台嶠探春凌峻峻，海門弄月迓清虛。祇今鴻雁向南去，欲問平安一寄書。

癸未季秋長崎留別宴上賦十日菊兼寄江東諸友

眞子明

萬里金風客夢回，重登十日望鄉臺。馬蹄欲向江東去，鴻影時從海北來。厭聽月前楊柳笛，忍啣節後菊花杯。可憐孤劍逢秋色，手裏芙蓉空自開。

行郡歷珠洲三崎

大地昌言

雙廟巍巍國北陲，土人崇祀幾千秋。蠶成麥熟民情悅，海濶山高客路愁。大嶽浮雲連鹿島，中天積翠擁珠洲。政平須慰蒼生望，暇日不妨訪古遊。

暮春遊山

小谷繼成

半醉半醒堪解襟，杖藜引興好追尋。茱萸烟簇村園遠，薜荔徑斜山寺深。花落松間春寂寂，鳥啼柳下暮陰陰。風光三月須臾事，祇見長流無古今。

元旦作

小瀨良正

春星耿耿晃朝衣，晨惹爐香拜舞歸。草色纔迎驄馬動，梅花欲傍玉人飛。天低雪嶺東風度，日滿滄江朔氣微。百尺鳳樓雲霧裡，簫聲響處是金扉。

【大地以下三人。並加賀人。鳩巢門人。鳩巢常稱其才。小瀨氏有咏海鼠腸七律。最巧緻矣】

春興

僧法霖

四山雪盡望青春。華髮誰驚鏡裡身。一水人遙梅耐折。半宵夢斷月相親。只今天下劍無氣。依舊世間錢有神。竹杖多時懸薜壁。遊山合與鳳鸞馴。

澁谷道中

僧若霖

曉過豐王古廟陰。半壁月殘挂碧岑。僧廬磬響藏松塢。客店雞鳴隔竹林。泉滴馬蹄黃葉滑。谷空人語白雲深。江東烟水長關思。幾度斯途獨自尋。

七夕

梁田邦美

溽暑南州未遽收。清樽有酒此登樓。牽牛花謝人間夕。織女星臨天上秋。雲渡絳河暝色合。月升碧樹露華浮。緱山笙鶴今寥落。湖海徒期汗漫遊。

咏園中梅花

同

十年笛裏負芳辰。且喜栽梅作主人。臘雪深山藏寶玉。春風勺水起枯鱗。枝腰磬折輒臨石。花氣冰清肯受塵。不羨江南千樹色。小園已覺歲華新。

寄湖女信

同

一別岐陽歲月空。可憐稅駕在江東。青山路阻歎衰鳳。赤石天寒悲斷鴻。萬里樓臺人似玉。孤城風

雨鬢如蓬。吳門握手知何日。對酒聽君歌郢中。

和滕鳳陽

鳳陽余兄少時表號

同

歸鴻度嶺碧雲斜。西望美人天一涯。海驛暮寒潮拍岸。京城春早雨催花。金羸遺訓傳韋氏。玉樹清風入謝家。知爾寸陰能自惜。東山不敢醉煙霞。

同諸客今泉氏宅賞花得西字

同

樽前日日醉如泥。棠棣歌成留客題。竹里雲來雙鶴舞。桃源畫靜一雞啼。滿城樹色春何處。夾路花香人不迷。共惜年華流水早。夕陽已在畫欄西。

【今泉氏名某。赤石士族。有潔癖。家無婦女。清寂如寺觀。好學愛酒。自號長醉居士。其弟即蛻岩集中稱日昇師者。自幼失明。而博涉強記。最能詩詞。此篇起句云云。因標錄之】

夏日江村

田助鶴樓

山雲遙度水西東。茅屋斜連竹樹中。桑柘漸深高岸隱。荻蒲猶短小橋通。漁人網罟三竿日。估客舟船五兩風。江上晝長波浪靜。群鷗來馴白頭翁。

八島懷古二首

桂義樹 彩岩

海門風浪怒難平。此地曾屯十萬兵。金鏑頻飛魚鼈窟。樓船空保鳳凰城。宋帝遺臣迷北極。周王君子悉南征。不識英魂何處所。月明波上夜吹笙。

其二

同

宮車一去帝王州。大海風雲寄冕旒。井底有緣還玉璽。水濱誰復問膠舟。舞姬紈扇隨潮下。飛將彤弓學月流。那識寒烟衰草外。幾人曾倚望鄉樓。

用銀臺唱和韻寄赤石梁蛻巖

湖元泰 栢山

江城秋雨晚霏微。坐感交遊多易違。昔友知爲思舊賦。故山未振遂初衣。銀臺風月人猶在。赤石烟波夢欲飛。不獨蓴鱸鄉味好。君聞唱和定懷歸。

【余近得常藩源義公時。後樂園雅會詩稿。讀之首唱即義公。當時常藩號爲多士。就其中。安澹泊。宅用晦。二人名聲最顯。而余未見其二集。散見諸選者。無有佳章。因不收選】

春臺望 物茂卿

携手風煙百尺臺。關中極目鬱蔥哉。八州綺錯雄都列。萬艘萍浮大海來。染翰春雲多點綴。啣杯落日且徘徊。登高作賦才非易。共指芙蓉雪色開。

春日懷次公

同

黯淡中原一病夫。登樓落日滿平蕪。滄溟春湧濤聲大。菡萏晴搖雪色孤。五斗時能愈我渴。千秋未必須人扶。祇緣寂寞悲同調。苦憶周南縣孝孺。

【結句一時遊戲。固非常格。但初聯雄偉。後聯突兀。此翁本色。以故選錄耳。】

和大潮禪師見訪

同

衡門樹影動衣襟。開士何來忽此尋。眞賞遙從方外得。冥搜偏向定中深。玄珠映戶窺無色。白壁投人叩有音。欲使名山相應和。爲君且憂少文琴。

贈川上人

藤煥圖 東璧

四月薰風祇樹林。法筵揮麈雨花深。給孤園敞開山色。般若臺高對海音。寧厭生徒尋紫氣。已看長者布黃金。虎溪倘許攢眉客。一徑時聞古佛心。

山崎道中

縣孝孺 次公

西宮東去問山崎。日出春雲滿帝畿。河上人家楊柳合。昆陽池水倉黃飛。風塵萬里身將老。弧矢百年心事違。平野蒼蒼鴻雁落。鞍頭回首轉思歸。

東都得弄璋報

同

尺素遙憑海鴈投。報言生子似阿侯。詩書待汝家將世。宗祀有人身始休。既協熊羆良夜夢。莫貽豚犬異時憂。朝來自咲癡何甚。事事新爲父母謀。

寧樂懷古

太宰純

南土茫茫古帝城。三條九陌自縱橫。籍田麥秀農人度。馳道蓬生賈客行。細柳低垂常惹恨。閑花歷亂竟無情。千年陳迹唯蘭若。日暮呦呦野鹿鳴。

【桓武帝。遷都於今平安城。而後寧樂廢為州治。然三條九陌至今猶存舊名。今時作者賦寧樂。動作黍離亡國之音。不啻失詩禮。殊害名義。如此篇頗佳矣。】

下館丹侯見枉徂徠先生山房謹賦一律奉呈

同

五馬聯翩過里閭。干旄枉顧臥龍廬。下賢不挾冠裳貴。乘興寧嫌供帳疎。調合新詩吟斷處。宴開雅樂奏來初。情深何用煩投轄。隨意淹留長者車。

上西臺侯侯時拜參政

平玄中 金華

旬服由來教化殊。河南政事擢江都。漢家制度參丞相。周室典章屬司徒。雨露千秋王者跡。風雲一代大臣圖。幾時侯邸開東閣。能使蓬蒿老腐儒。

題島歸德水亭

同

吏隱茅堂擁大川。白雲如水水連天。雷過嶽色陰陽逼。日落江聲風雨懸。二代文章金馬下。十年踪跡海鷗邊。送迎自玩人間世。還使杖頭堪掛錢。

鎌倉懷古

服元喬 子選

相中弔古此盤旋。霸主樓臺建久年。雄略不終三世幕。遠圖唯有八州船。馬空窟裡留寒影。鶴去岡頭入晚烟。行到琵琶橋上望。依然海嶽媚春天。

【子選鎌倉懷古七首皆佳。連讀之。益見其巧妙。今以其繁。錄其二云。】

舟下鹿洲江濶不見渚涯

同

解纜長江下總州。漫天刀禰向東流。客槎星犯蒼龍宿。仙閣雲浮白鹿洲。地拆直觀滄海日。水平疑泛大湖舟。飄飄為欲償心賞。乘去風帆自不休。

登吉祥閣

同

吉祥層閣倚蒼穹。宮殿爭高此地雄。似叩天闈朝北極。應觀世界住虛空。彩雲近傍諸陵出。玉樹迥連御道通。一自飛來稱鷺嶺。長懸日月照山東。

奉調東叡大王

同

龍駕從來降帝鄉。白毫回照滿東方。日邊色送青雲近。台嶽天臨滄海長。鹿苑兼開脩竹綠。鴈池新捧瑞蓮香。儼然坐現金銀閣。不向西乾假梵王。

送友人遊官長崎

同

萬里樓船迥不迷。到時波穩夕陽低。九州節制新開府。千古司存舊鎮西。自有越裳來翡翠。何勞遼海走鯨鯢。幕中參佐推王掾。書檄須君手筆題。

奉和松前公青山別莊作

同

青山勝事近如何。官暇風流一醉歌。都尉篇中辭總妙。步兵厨裏酒應多。林花待襲長裾落。野鳥鳴迎岸幘過。我有薜蘿衣未斂。重遊肯許倚巖阿。

白賁墅

同

郊雲深處靜簾前。細雨霏霏春可憐。已老松杉看改色。新栽竹樹更生烟。家貧不羨山陰墅。酒薄難招林下賢。頭白事閑幽意足。悔同塵俗誤芳年。

聞莊子謙登芙蓉不勝企望短述以寄

服維恭

崢嶸維嶽綵雲邊。攀折芙蓉捧手懸。不啻登臨堪小魯。更知呼吸近通天。人間長仰三峯雪。海上回看九點烟。不是漢皇封禪日。名山且自勒銘旋。

雪中登吉祥閣

高維馨

吉祥珠閣迥崔嵬。倚檻高臨雨雪開。大嶽新浮銀世界。諸陵爭出玉樓臺。林標春奪瑤花落。塔勢寒迎白鴈來。縱失赤城霞彩色。千巖積素映天台。

行徑七里濱

同

東南大海接雲開。流沫侵沙日夜迴。濤勢蹴天飛似馬。潮聲動地殷如雷。驪龍窟抱明珠出。仙女壇懸紫氣來。七里灘頭饒釣叟。千秋誰問子陵臺。

僧房守歲

同

空門霜雪照莓苔。守歲還登古梵臺。日月燈含春色動。菩提樹拂夜雲開。聞經試問蓮華漏。許酒先傳栢葉杯。總說人間如夢幻。諸天惜臘此徘徊。

御命陪二藤公泛舟隅田川

鳴鳳卿

星文曉轉鳳凰樓。錦纜牙樁尋古游。賞眺應同天上坐。乾坤寧似鏡中浮。一時詩賦鄒枚筆。千載風流李郭舟。愷樂陪君魚在藻。隨波好更問瀛洲。

水閣避暑

岡孝先

園地避暑客憑欄。朱李甘瓜白玉盤。人自南皮能作賦。樽應北海盡交歡。荷間月照銀河動。蘋末風來畫閣寒。歌闋采菱新樂府。更操綠水曲中彈。

宿山寺

元維寧

上方夜色正徘徊。飛塔月登沙界來。山擁深林清磬響。天懸兜率佛燈開。香烟遠定驪龍窟。貝葉翻經白馬臺。坐久徧知不染境。誰言心地竟難灰。

和答默公病中見寄

木實聞

蕭條丈室鎖高秋。病起維摩談益優。颯沓梵音振法座。婆娑月影滿閻浮。誰知青桂山中趣。翻思白蓮社裡游。聞說匡廬饒酒戒。將因貪飲散窮愁。

登芙蓉

莊允益

天邊鳥道駕晴虹。近接氤氳玉女宮。大麓風雲餘羽獵。中峯氣象屬鴻濛。神仙暗度三山路。日月先朝五嶽雄。呼吸更知通帝座。到來唯是在層穹。

其二

帝居何處瑞氛來。風雨全收闔闔開。神女霓裳翻齒齒。秦皇使節訪蓬萊。仙雲爭動連駒窟。龍氣雙懸擁劍臺。異代誰論封禪事。空餘遺草長卿才。

雪夜宴太田侯第

石正猗

甲第寒高夜色開。紛紛玉屑滿樓臺。披裘皆是群仙侶。授簡從來上客才。銀燭更闌垂鳳蠟。金樽興發勸螺盃。驂騑門外繫瓊樹。乘醉何妨踏雪回。

夏日同平子和宴懷仙樓

同

長夏園林蒼翠開。千里新樹映樓臺。芙蓉雪色當牕落。滄海濤聲傍檻來。留客頻移青玉簞。懷仙且酌紫霞杯。綺筵向晚雄風起。誰是披襟作賦才。

梅雨中得叡山善光上人書及詩賦此代簡謝答

田好銑 子澤

衡門伏枕鎖蒿萊。獨坐懷人風雨來。渤海雲低藏白日。茅簷樹濕落黃梅。秋鴻憑信他時約。萍水關心別後哀。忽訝滿堂霞彩起。知君詞賦自天台。

夏日同諸上人泛舟楊柳橋下

同

聊試江頭河朔期。重携禪侶棹漣漪。二衣不染紅塵色。一葦遙乘碧海涯。人世波瀾傷落魄。官途危險奈相思。離情猶駐垂楊影。厭見橋邊前日枝。

酬田子瓊至日同東溪南宇二大夫宴滕子齊席上見懷

源敏樹

山河氣暖待春來。佳節登臨雲滿臺。樽酒忘家迎季孟。主賓誇伎盡鄒枚。含黃將動風前柳。積素相疑雪裡梅。我亦天涯一回首。獨悲歲月鬢華催。

詠鑿鏡鏡

秋儀 玉山

鑿鏡銀雲鏡裡清。三餘事業待君成。奪將蝦目五行下。讀破蠅頭萬卷輕。映雪孫臏同的爨。看花韓苑已分明。還疑太乙青藜照。天祿當年劉更生。

哭南子和

田憲章

知爾曾遊海上山。暫將杯酒落人間。青囊日月空高枕。丹竈烟霞難駐顏。化鶴終從華表逝。騎龍何更葛陂還。愁來欲挂延陵劍。風雨長松不可攀。

鎌倉懷古

田憲章

陰風萬里動沙場。日色蕭蕭海霧黃。飲馬窟寒狐兔宿。鬪鷄原晚草萊荒。千秋戰氣空城雨。九世兵威古壘霜。一望凄然過不得。停車獨自嘆興亡。

其二

同

憶昔姦臣弄國威。翠華南狩遁京畿。六軍喋血衣冠散。諸將輿尸計畧違。傳籙誰乘黃屋出。蒙塵偏似白登圍。安知皇運終廻轉。重使神州揚帝暉。

送子羽還藩

井通熙 子叔

春來病起動離顏。祖帳東門擁節還。客裏綈袍交不淺。樽前彩筆老逾閑。岳蓮雲湧金河路。嶺樹霞蒸玉笥山。雄劍即今誰所贈。到時風雨滿燕關。

臨地竹

山根清

脩竹團圓遠作林。踈篁密篠鬱陰陰。碧波龍動葛陂影。爽籟鳳吟嶰谷音。千畝雲從池上起。萬竿色向水中深。梁賓在昔爭裁賦。更憶風流帝子心。

題大隱軒

同

煙霞小宇郭東隅。水石卜幽三徑紆。傲世獨能淹歲月。避名何必住江湖。醉中春色花開落。夢裡春風蝶有無。君自仙人誰不信。白雲珠樹似蓬壺。

寓麴坊值星夕有作

僧原資

萬井青梧葉未飄。秦城暮色七萸彫。金莖露下仙人掌。玉渚秋懸織女橋。天上星辰多契濶。世間時序易蕭條。客心悽斷高樓夜。月落誰家吹紫簫。

中秋合虛亭

同

江城白露下蒹葭。烟水茫茫蕩月華。夜色樓臺諸佛座。秋風簫鼓萬人家。涼來世界渾如水。翳去虛空不見花。火宅蕭條殘暑盡。何論門外有三車。

四月朔舟中坐雨

僧元皓

處處櫻桃久落花。春風吹雪滿袈裟。天涯朱夏蓬牕雨。海上青山漁父家。知與何人題別意。寧堪獨自負韶華。此行非爲匡廬隱。回首還同漢使槎。

擬長安春望

字鼎

二月春風幾萬家。登臨轉足見年華。鶯聲晴滿章臺柳。霞彩時迷上苑花。山遶漢宮佳氣近。樹連秦塞暖烟斜。翠樓珠閣笙歌暮。遊子誰思故國賒。

擬上黃鶴樓

同

一從飛閣起磯頭。詞客登臨幾壯遊。鸚鵡洲荒名更出。仙人駕去跡猶留。白雲自見千年色。玉笛誰思五月愁。世事悠悠逐江水。空令感慨滿長流。

奉寄物先生

五首錄一。別有小引。

同

才華新照日東東。經學兼傳見國工。治世音從門下盛。大玉風借筆端雄。時名難著潛夫論。朝議堪裁白虎通。海內少年多俊傑。不言西蜀有文翁。

登清水寺大悲閣

武欽絲

香閣崢嶸洛水東。烟霞不與世間同。諸天日落山山紫。下界秋深樹樹紅。拂檻珠林含瀑水。映雲瑞塔湧虛空。道心似入清涼國。襟冷上方昏黑風。

卜居

茅茨小築羽溪邊。綠樹重陰繞檻連。不獨幽棲通市井。由來靜者便松泉。新題常使青山答。閑適何妨白日眠。更喜雙親無恙在。栽花煮茗樂餘年。

奉賀右大辨菅公進參議

服天游

十載合香漢省郎。遷喬此日有輝光。御題新出金甌裡。寓直舊陪錦帳傍。怡遇補天懸日月。具瞻贊化理陰陽。清門元自神明貴。遺愛松林足棟梁。

遊三井寺

同

園城古刹枕江流。遊客閑探處處幽。玉甃仍留三井潔。華鐘曾自九淵浮。威靈永鎮新羅廟。弘誓高標薩埵樓。更見止觀靜明境。孤輪影落太湖秋。

送木文炳遊江州

同

湖勢渺茫琵琶開。舊都風物亦雄哉。遙追遷史浮湘興。肯讓木虛賦海才。彷彿君山天女廟。岿巖鷺嶺梵王臺。洲頭聞說多鴻鴈。到日尺素一寄來。

函嶺

伊藤緒

群山萬壑擁高巔。紫翠陰陰撲面連。鳥道杳冥雲外路。神工剗鑿洞中天。關門樹合通真氣。湖海峰迴倒玉蓮。十載重經函谷險。白頭誰記棄繻年。

望海

同

芝浦帆檣向晚連。東南形象入樽前。丹霞日湧扶桑樹。碧水雲開渤海天。萬里搏搖鵬際動。三山真氣蜃樓懸。醉來欲擬玄虛賦。短髮乾坤轉惘然。

冬日海棠

同

仙質不爭桃李場。幽姿應有後時傷。微紅纔拆前宵雨。脆豔何勝寒曉霜。銀燭照來誰拒睡。珠簾低下獨含粧。可憐冷落窮冬日。孤負春風弄晚芳。

答子顯

同

芙蓉露冷武昌秋。佳節懷人賦遠遊。同舍弟兄驚聚散。中原書劍任淹留。開簾邸第連雲起。把酒星河捲地流。最是西山來爽氣。遙知拄笏倚牀頭。

晚秋答弟君錦

同

露滿梧桐月滿城。官情矧復故園情。菊花仍負陶元亮。楓詠誰傳崔信明。客散殘燈沈夜色。夢回孤枕送秋聲。籃輿到處逢迎在。莫道青袍誤此生。

丙戌春余六十初度

清綬君履

隱淪歲月鹿川隈。羞值鄉親祝壽來。幾卷蠹書忘老至。一樽濁酒喜春回。秦門纔有種瓜術。趙國會無說劍才。但見東風添樂事。鴨頭綠拍釣魚臺。

秋夜偶作

春政紹

籬下寒蛩聲未稀。孤閨覺冷老夫衣。燈殘坐側從兒睡。雨斷欄前見雁飛。千里山河秋瑟瑟。一天星月夜輝輝。此身未謝人間事。蕉鹿夢中爭是非。

紅梅

小栗元愷 子佐

郢樹花明淑氣融。羅浮水骨醉春風。枝橫碧漢霞凝彩。影落清江水漾紅。桃李成蹊香豈比。珊瑚出海色纔同。朱欄錦幌須淹賞。但恐人吹入笛中。

擬贈道士

同

羽客高蹤大華陽。還丹長秘葛洪方。明星夜拱金壇靜。花木春深碧洞香。天外瑤簫吹引鳳。山中白石叱成羊。有時冠佩乘雲去。應逐諸仙謁玉皇。

同諸子登後瀨山

山在若狹

同

海上名山駕巨鼈。懸梯重疊躡空高。五雲南指京畿路。千里北通越徼濤。古壘當年誰躍馬。青樽此日共持螯。相逢不是尋常客。總把烟霞入彩毫。

失鶴

田公望 望之

一夜仙禽思故林。翻飛萬里白雲深。軒車空掛衛公籠。宵漢遙憐齊使心。月落緱山迷素影。風高華表送瑤音。明朝知在三珠樹。赤水茫茫不可尋。

有所思

瀧長愷 彌八

關塞天長道路難。含愁不見倚欄干。深知一日三秋恨。遙想單衣九月寒。曲裡餘情寫別鶴。鏡中孤影悲離鸞。夜來自有金徽夢。腸斷紗牕落月殘。

夏日遊山寺

松秀雲

紅塵不到梵王家。山屐乘涼薜蘿斜。竹裡懸泉澗石髮。松間落照映葵花。瑤琴彈罷雲窺戶。玉麈談餘僧獻茶。悔向世塗衝炎熱。十年蹤跡負烟霞。

和百非上人席上

同

一別招提歲月賒。重來衰白惜容華。何圖詩思逢人發。無奈醉狂隨日加。夜寒石鼎茶烟斷。坐久紗牕月影斜。乘興若過虎溪路。肯尋松菊到陶家。

十四夜鈴津二公及泰默二尊者辱臨席上得六魚

千鼎臣

貧家草具設筵初。酒態非關禮節疎。徑窄莓苔侵履跡。庭蕪蟋蟀逼階除。玄談偏熟高僧坐。白屋歡迎長者車。縱負中秋三五月。莫教此夜賞心虛。

秋懷二首

千諸成

白屋清秋晝自閑。從容養拙圖書間。愁心暮聽雲中鴈。爽氣朝浮雨後山。寥落交遊今日事。追懷侍從舊時班。感恩豈有梁鴻嘆。不用五噫歌漢關。

其二

園林搖落慘斜陽。懷舊悠然坐半床。身上浮名任呼馬。塵中浪跡總亡羊。池邊紅落蓮房露。牆外黃催橋樹霜。涕淚非關峴山碣。悲秋亦欲濕衣裳。

同諸子遊鈴公南莊

井知亮

探勝城東古寺傍。相携涉水又登岡。交歡今日俱須盡。哀樂中年動易傷。萬樹晴烟催返照。一樽秋色醉重陽。極知落帽參軍後。也有風流吾黨狂。

酬三洲觀如上人見寄

木貞貫

聞君卓錫倚山岑。霜下閒房落葉深。幾處寒泉添漏水。諸天明月照禪心。西關氣色秋看盡。東海風雲晝欲陰。踪跡隨緣無住著。春來芳草恐難尋。

級川驛重留別君脩

湯元禎之祥

憐君寵送醉江關。萬里西征作賦還。馬首天寒滄海日。樽前雪滿玉函山。風塵懷瑾功名薄。睥睨論交世路艱。共說立言應百代。酣歌不必慘離顏。

答赤松大業見寄懷

同

千里鴻音雨雪關。開緘忽映碧琅玕。唯憐南國佳人贈。慙作關西夫子看。海嶽大橫濤色合。赤城霞起夕陽寒。待君更泛山陰棹。握手春風十日歡。

訪箕山人

野公臺子賤

白雲縹緲鎖岩巖。望去天涯夢裡遙。路向巖阿看鹿豕。林連谷口問漁樵。久知原憲貧非病。也說田生賤更驕。今日美人殊不遠。往來携手報瓊瑤。

智乘院集賦呈諸君

同

相邀杯酒此開筵。滿座嘉賓一代賢。望去芙蓉懸白雪。聽來山水入朱絃。千秋事業推君輩。百歲風塵老自憐。書劍重逢從役日。中原彥會得周旋。

送松山太夫塚越君歸藩

高羽翼之

旌旆翩翩意氣殊。揮鞭直指北溟隅。封疆別屬齊公子。跋涉偏勞許大夫。鳥海春雲懸白雪。象江秋月照明珠。登高更識耽詞賦。好使彩毫傳此都。

侍遊三山山有徐福祠

安于慶吉父

萬里神山路不難。飛揚直指綵雲端。人間空報安期舄。海畔猶存徐福壇。丹洞千秋關日月。蒼崖幾處擁琅玕。共陪鸞輅蓬萊上。何用長風問羽翰。

春日同諸君上東叡山

僧圓乘了玄

台嶺花深百鳥鳴。氤氳佳氣接春城。山王祠上江帆出。天女壇前鏡水晴。高殿雲開金榜色。諸陵風送玉珂聲。同遊若促輿公在。都下應傳作賦名。

遊寺

僧宜牧

古寺鐘聲度翠微。階庭栢葉亂斜暉。岩中說偈花爲雨。定裡忘機月照衣。巢鳥閑窺雙樹入。香烟細結五雲飛。上方遙出藤蘿外。杖策探奇信宿歸。

日本詩選卷之六終

日本詩選卷之七

平安

江邨綬君錫著

姪清勳公績
受業永田忠原俊平
同校

七言律下

賦得籠中孤鴛鴦

伊藤長堅 蘭岨

一入深籠不耐愁。秦池漢苑到無由。玉堂春靜庭花落。金屋秋闌夜漏幽。鏡裏孤鸞嘆獨舞。梁頭雙

燕羨同遊。遙思當日月明夜。兩兩影浮蘆荻洲。

【蘭岨少時詞章最儻。紀藩筮仕後。專事訓詁。廢棄吟哦。此篇得之八居題咏中。】

聞鴈

松波光興 士發

紅蓼白蘋秋色分。蕭蕭鴻鴈忽相聞。飛辭邊月山山雪。鳴度南天字字雲。上苑帛書思漢武。洞庭清瑟

想湘君。蹉跎自笑官遊晚。來往風塵共作群。

【士發東涯高弟。三十年前。余卜其隣。日夜友善。自爲吏職。遂致胡越。此篇得之篋笥。愴然感舊。因錄之云。】

赤間關懷古

石川正恒 麟洲

一從龍駕失天衢。十萬貔貅撼海隅。環珮雲迷潮水澗。旌旗林靜夕陽孤。漁樵荒塚辨臣主。風雨冤魂疑有無。回首長安終不見。空臨波際問皇都。

秋居漫詠

田中履道

秋色闌珊露變霜。龍鍾仍試舊丹床。朝修禽戲敲殘齒。夕檢龍方洗病腸。楫水屐山行或止。哦花醉月閑猶忙。百年能事一無有。自笑散人遠帝鄉。

雨中過木津堤

柳美啓 士明

淺草平沙十里程。長堤三月雨中行。兩邊蒼鬢烟霞老。一片青蓑身世輕。山罩層雲黛色斷。川浮細浪羅紋清。冥濛眼底饒幽趣。不必芳園步快晴。

晚下菟江

同

扁舟搖裔下長流。兩畔煙波落日愁。孤鷺片雲鐘外去。危橋柔艫鏡中浮。揮毫知有江山助。輟棹欲同魚鳥遊。無奈楫師貪利涉。不乘風月暫時留。

抄秋與伯卿上如意山

芥煥 彦章

共覓仙蹤踏紫氛。攀緣一徑薜蘿分。洞煙斜散中峯雨。瀑布遙懸半嶺雲。宛轉二川圍帝里。霏微雙闕按星文。彩毫同弄登高賦。莫道偏憐麋鹿群。

哭大通禪師

同

金風一夜作天遊。共見城頭紫氣流。西海慈雲懸幾歲。東山白日照三秋。渡孟絕影鷗空去。飛錫無聲鶴却愁。妙偈長留傳弟子。龍華遍散帝王州。

同賦早春登江樓

那波師曾 魯堂

南國春從江上來。登臨百尺畫樓開。梅花遠近波間雪。鶴羽高低空裏埃。霜鬢他年終不改。鄉心一日更相催。獨憐風意醜顏外。能使塵襟題快哉。

暮秋與橋柳二兄詣赤山祠

渡守時 南平

相携此日果前期。霜後風光隨處宜。原野穰穰千頃稻。偃松落落百年枝。行宮古道無人拂。御祖深林秋欲移。塵裏偷閑愁短景。幽懷叵奈暮雲低。

鴛鴦

皆川愿 伯恭

翠鬣紅毛帶晚暉。排符蹙浪傍苔磯。晴江常映芙蓉見。煙岸時牽菱藻飛。分影同棲金殿瓦。銜花並宿玉人機。珠閨更有芳心巧。繡出多情上舞衣。

賦得宿雨能消御路塵

同

別館春遊上苑東。秦山閣道跨遙空。晴雲自傍鸞旂外。宿雨初收輦路中。玉露新含芳草綠。輕塵細壓落花紅。爲知明日風光好。歌吹欲迎長樂宮。

擬唐人主家應制作

清 絢 君錦

主家山館灞川隈。御輦春遊麗日開。彩鷁逢迎烏鵲渚。朱旗繚繞鳳皇臺。花間採石移珠履。竹裏分泉泛玉盃。聖藻新裁雲五色。微臣深愧柏梁才。

奉送中將藤公使筑紫

同

長安久領羽林兵。奉使星槎萬里行。海上新開龍虎節。雲中廻見鳳凰城。祠官鐘鼓清秋響。神祖旌旗白日明。大禮今逢修曠典。多歡博望策勳名。

其二

同

應神陵寢壯金題。更向香宮路不迷。豈是銅標蠻部僻。多知青翰鄂君齊。琉球大小新荒服。督府軍民舊鎮西。回首長安休道遠。五雲偏自日邊低。

和禾升卿登天台山 三首錄一

同

人間到處感滄桑。叡岳巍然古道場。菅相威靈驚霹靂。武皇封祀仰金湯。霞城遠控晴湖色。鏡柱高懸白日光。小魯當年觀爾志。諸天回首更飛揚。

粟津懷古

同

信州兵馬氣凌雲。霸業忽消湖水濱。徒有忠臣能致死。從來驕主豈垂勳。東風遺恨王孫草。夜月幽魂娘子軍。父老猶談雕不逝。喬松隱隱遠孤墳。

崑崙奴

同

畫圖省識本聞名。蠻舶携來孰不驚。百尺竿頭占雨立。千尋海底採珠行。烏衣此日迎新塔。子墨當年作客卿。安若許公稱夙惠。空傳彩筆獨縱橫。

江樓 越前客 中作

同

晴景遲遲春欲空。江樓把酒思無窮。花飛不爲微風起。山靜還憐淡靄籠。家鴨將雛汀草上。隣鷄鼓翼竹園中。幽觀洵美誰相與。唯有帆檣日日通。

同賦早春登江樓

片 猷 孝秩

孤客年年不得歸。度江梅柳又春輝。美人南國愁中草。高士西山貧後薇。書劍天涯惟涕淚。鶯花城外自芳菲。暮鴻送盡煙波遠。獨倚樓頭歌式微。

二月十六日乘舟過三頭向本莊遊崇禪寺松林

鳥山宗成 宇內

樓船繫纜向平原。曲徑何辭步履煩。探勝幸逢無雨日。吟行先問有花村。山河遠近坐來色。詞賦縱橫醉裏論。既倒芳樽同藉草。松聲不似市中喧。

中秋六國亭觀月

同

高亭啣月出松標。多少騷人此見招。六國蒼茫來綺席。孤輪皎潔傍青霄。波濤秋湧清輝碎。蘆荻風生素影飄。琴酒欲成終夜宴。浮雲忽向曉天饒。

琵琶湖泛月

同

湖光如練夜奇哉。鮫室龍宮彷彿開。遠浪無涯千里目。長流不盡萬年哀。金風聲斷穿雲笛。銀桂香飄邀月杯。却訝追隨仙侶去。廣寒高處更徘徊。

送田鼎一歸金澤

同

朔風吹雪曉霏霏。游子此時辭帝畿。無那新知頻告別。生憎舊侶易相違。行裝常共啼鳥起。去馬遙隨乾鵲歸。到日親聞奉卮酒。慈顏有喜映班衣。

葛子琴宅詠殘海棠花

田章鳴門

眼看風雨善傷春。偏愛猩紅未作塵。撩亂才餘消醉露。衰殘已有竊香人。丹紗睡足嬌無力。羅襪粧寒坐愴神。惆悵青陽景難駐。繁華幾日就君親。

九日寄片北海先生

同

佳辰病肺鶻編裘。彭澤黃花入酒不。詩賦懶裁空落帽。茱萸欲插幾搔頭。陰晴難定登高意。醒醉都拚滿眼愁。玆日恨無陪從興。風流辜負白衣秋。

秋日郊行

孔文雄 世傑

散步杖藜秋雨餘。蕭條烟露滿荒墟。孤村落日砧聲急。九月微霜木葉疎。錢盡誰家應買酒。途窮何者欲回車。黃花半發東籬下。知是柴桑處士居。

客中偶作

同

多病伯鸞誰又尋。五噫歌罷興沈沈。孤鴻聲斷城中雨。雙杵夜寒霜下砧。怡悅白雲翻作夢。往來黃耳轉傷心。灞陵舊是知無主。門逕塵埋幾寸深。

寄沼文進

同

颯爾西風吹據梧。回頭秋色滿平蕪。層樓水繞三津澗。宿雨晴來六甲孤。病渴馬卿誰是似。揮毫宋玉豈今無。悲哉近日將催興。賦就期君傾我壺。

浪華懷古

龍公美 草廬

地比金陵古帝州。鬱葱佳氣未全收。堯仁曾許三年貢。禹鑿猶餘一水流。鴻鴈渚邊風色老。蒹葭洲上夕陽愁。春來唯有梅花發。人唱王郎舊日謳。

同岡文韶遊鹿苑寺

同

來尋鹿苑古禪關。王舍城西寶樹間。春後散花爲雨下。午時鳴磬入風閑。諸天日射黃金閣。初地雲隣翠蓋山。羞我未通清淨理。長因塵事鬢毛斑。

都門早秋

同

日落都門煙霧收。 銀河一帶與雲流。 雨餘明月寒初動。 城上清風聲自愁。 玉杵擣殘千里夢。 紫簫吹起九重秋。 誰知孤客天涯意。 不是潘郎已白頭。

酌孔世傑

同

秋暮風烟落木時。 孤鴻天外報相思。 一寒深感綈袍贈。 千里久懷湖海期。 駒岳壯遊終夜夢。 鳳城離別幾年悲。 何當浣水重南下。 共醉君家金屈卮。

得藤子樹詩及書卻寄

同

一別東西消息稀。 豈圖鴻雁繫書歸。 關山夜度愁人夢。 風露秋寒遊子衣。 世上白駒驚空過。 天涯青眼恨相違。 遙知張翰鄉思切。 近日江湖鱸正肥。

登東福寺閣示丹叔禪師

合離麗王

妙雲高閣帝鄉邊。 一望恆沙欲盡前。 拂檻山風生寶樹。 過牕江雨散金蓮。 名藍自古三千衆。 福地于今五百年。 極是津梁如有力。 彩虹飛度直通天。

北海先生致仕作此奉寄

葛張子琴

解印春風歸去來。 衡門一半柳陰開。 琴書久爲官游廢。 几席頓無公案堆。 稽古力因車馬見。 遂初衣用芰荷裁。 欲看今歲黃花好。 預就籬邊手自栽。

哭菅甘谷

同

絳紗帳外淚紛紛。 落日絃歌不復聞。 蘿薜衣存春稍冷。 芝蘭室廢夜猶薰。 關西曾播三鱣譽。 冀北空餘萬馬群。 一卷遺經孰傳得。 千秋幸未喪斯文。

奉賀宰相菅公及侍從公上丁講經

僧顯常 蕉中

北闕秋雲五色高。 經筵此日侍臣勞。 聖恩一代開麟德。 華胄千年見鳳毛。 玉殿傳杯承宸眷。 清朝補袞屬詞曹。 揆天不忝康哉咏。 相繼風流有彩毫。

秋日西出七條

同

洛城西出步田園。 物色蕭條且避喧。 松樹林巒圍練若。 檉花籬落擁荒村。 暮雲天遠丹波道。 秋竹烟寒朱雀門。 千里邦畿千古思。 鳥飛鐘動向黃昏。

登樓寄懷諸昆仲

僧淨壽 終南

霜落溪林楓葉丹。 天空沙塞鴈聲寒。 賦成今日登樓地。 歌感當年行路難。 原野蕭條凝暮色。 風雲慘澹阻交歡。 倚欄更想同袍子。 此意何時携手看。

秋日上東叡山

僧元明 悟心

鷺嶺秋風送鴈行。 峻嶒鳳闕傍朝陽。 玉毫遙照瑠璃殿。 金榜高懸玳瑁梁。 天女池邊霜葉下。 梵王臺上雨花香。 此中別是仙遊地。 佛日昭明萬古長。

客中新歲

同

東都城闕鬱崔嵬。日出金門曙色開。紫陌遊絲縈劍佩。青春淑氣滿樓臺。騷人夢入池塘草。驛使書傳隴上梅。回首年年鄉國遠。愁看華髮客中催。

月夜月伏樓小集

僧敬雄 金龍

瓊樓安在五雲隈。繞郭千峯入檻來。良夜清樽迎月醜。中秋綺席向人開。金波偏湧蒼龍谷。練影高懸白馬臺。祇苑兼餘招隱趣。叢叢桂樹醉中栽。

寄題日出侯望海樓

服元雄 仲英

海上新開日出光。城樓高擁對扶桑。坐來登眺山河固。占得封疆歲月長。萬里潮生連睥睨。九州天盡入蒼茫。鯨波不起西溟靜。正好絃歌醉玉觴。

金井侯有伉儷之感詩以奉慰

同

三秋金屋夢難成。翠幄愁窺孤月傾。幾年黍稷同奉祀。一朝琴瑟寂無聲。階庭猶駐芝蘭色。配匹空傳秦晉名。莫向高唐催作賦。楚天搖落不堪情。

春日宴某侯墨水莊

同

清江流水繞橫塘。宴賞疑遊金谷莊。北渚烟侵芳草暖。東園花對綺筵香。捲簾柳絮春如雪。勸客醪酒滿觴。別有池亭通畫舸。醉歌更入採菱長。

登樓

劉維翰 龍門

華樓百尺碧池隈。東嶺雲霞繞梵臺。蓬鬢蕭條孤劍老。蘭樽潦倒短歌哀。秋風空動鱸魚興。暮雨何堪鴻鴈來。搖落千年餘楚色。登臨徒倚賦悲哉。

關原 二首錄一

松崎維時 君修

長城役久兆亡秦。挾主兼存指鹿臣。自有四方僕我后。何論六尺託非人。離心枉暴中原骨。一怒終清萬古塵。寇望雲霓皆鳥竄。周家天地屬維新。

送赤松國鸞還赤穗

同

朱門春滿驕驪裘。萬里歸藩亦壯遊。即見鄒陽爲上客。還如張翰倚扁舟。孤松夜送高砂雨。明月秋臨赤石流。賦就應憐鄉土美。不須多暇倦登樓。

歲初得侯澤浪華之信喜賦

紀德民 平洲

客夢三年瓊浦隈。歸心日倚望鄉臺。江南淑氣堪相憶。海國風烟尙未回。新歲忽逢孤鴈信。故人遙寄一枝梅。何當握手都門下。共醉胡姬春酒杯。

秋夜懷大眉子茂余時客湖東

南宮岳 大湫

湖中景勝白雲秋。方屬悲哉憶舊遊。到處幾人還倒屣。望時令客懶登樓。雙鴻不繫相思字。片月空窺各地愁。對酒今宵憐嵇阮。未知林下接風流。

洞津芝原子篤致書書中說秋來再邀余因賦此答寄

同

猶憶論詩對日斜。別來幽趣在誰家。熊山曉送雲間色。鯨島晴揚海上霞。數卷圖書君事業。一園灌溉我生涯。如今不恨相逢晚。預訂歡期及菊花。

秋晚郊行

湖岳

步離城市出風塵。到處縱觀不問津。孤杖扶衰龍未化。行厨分食鳥相馴。黃花經雨田園古。錦樹曝陽山壑新。欲向川流消酒渴。水清似待濯纓人。

登阪越圓通閣

赤松鴻

紺殿高開赤水東。躋攀一望倚龍宮。無邊花雨諸天外。不盡松濤萬壑中。觀世元悲迷幻境。憑欄更覺住虛空。山光直接海潮色。下界齊浮落日紅。

酬劉文翼見寄兒勸之作

同

門衰祚薄失要津。猶喜兒年堪負薪。翰墨豈期交長者。琴書僅免屬他人。蕭蕭白髮兼心短。寂寂青山避世真。獨有親知情不淺。回頭時復歎沉淪。

訪避喧亭

赤松勸 大業

清風落日郡城西。幽徑尋君路不迷。忽見棲鳥驚客起。何須凡鳥向門題。避喧亭有山光映。對酒身如竹裏携。交態俱期浮世外。厚情唯與古人齊。

三島驛贈朝鮮國南秋月

梁田龜 象水

棠棣蘭舟千里通。潮平無復石尤風。紫烟朝度函關上。白雪春飄仙館中。觀海原知難爲水。論天何用共爭雄。使臣自有桑蓬志。遂使聲名滿日東。

暮春遊玉川

岡思潜

平川曠野愛寬閑。百里回頭無近山。細石清流光似玉。激湍旋復響如環。樵人落日乘桴下。浣女新晴抱布還。不是浮遊采真侶。那能此處洗塵顏。

送人遊函關

副士定 保卿

峻嶒函嶺擁重關。幽討憐君遠一攀。投宿民家懸翠壁。迸巖仙液駐丹顏。夜瞻百頃湖邊月。朝對雙生天畔山。賦就知裁白雲色。歸時持贈駭人間。

酬蘭臺先生抄秋登東叡大悲閣見懷之作

近藤篤

天台飛閣倚巔峴。白雪芙蓉千古看。碧殿晴搖雲五色。赤城霞起日三竿。帝闈元氣通呼吸。仙闕秋風問羽翰。聞說登高能作賦。側身東望欲從難。

滕君一從日光廟使賦別

井潜 仲龍

城門曉色送驂駢。此去天邊向翠微。地下龍蛇開壯麗。山懸日月有光輝。古文先問周王鼓。戎服猶藏漢祖衣。載筆君今隨廟使。應知篆冊讀人稀。

三日井子章宅宴會同賦花下尋盟

同

主人園在碧江隈。好勸嘉賓曲水盃。佳節尋盟逢酒熟。春風修禊及花開。聚時俱犯群星座。分得誰多一石才。瓠落平生憂才乏。何堪大白罰吾來。

嗟峨懷古

同

數里尋幽出帝鄉。吟行先弔古山莊。王孫不返靡燕老。騷客空餘蘭芷香。亭古雨聲添慘澹。林昏松韻鎖荒涼。百家名咏知何處。但有閑雲生壁牆。

仲龍氏嗟峨懷古五首福原懷古五首工整婉暢各到佳境以減簡故割愛錄一首云

鉛山即事

祇園尙濂師援

茅屋窮山百事貧。蟲聲秋冷枕頭親。一溪暗水愁邊雨。半壁殘燈夢裡人。樗散形骸空白首。羊腸岐路總紅塵。明時未試鉛刀割。賴與老農欲卜隣。

同賦金谷故園得春字

度會末雅

河陽芳樹粲成隣。云是繁華昔占春。墜妓樓空縈澗水。明妃曲罷靜梁塵。更無錦障臨行路。豈有珊瑚驚坐賓。一自同歸歎白首。悽然風物濕入巾。

分題賦司馬相如

高彝君秉

有鳳求鳳鳳亦求。臨邛更典鸞鸞裘。遠山轉艷當墟態。四壁偏寒滌器秋。賦奏凌雲疑異代。官成使

蜀擅風流。茂陵莫道君恩薄。還問遺文帝者愁。

登東都慈眼山寄鎮公

僧萬龜文川

秋風吹雨入珠林。窈窕烟霞鎖翠岑。天隔鄉關遙夢寐。月懸滄海照衣襟。十年爲寄浮雲跡。千里難逢流水心。屈指曾遊總陳迹。逢君此日感殊深。

丹波道中

江邨秉愚亭

野水東流夕日西。煙山嵐嶂碧高低。王孫草色連天遠。帝女桑條與屋齊。柳絮池塘穿浪鴨。菜花籬落浴沙鷄。恰逢村店醅醱熟。兩袖春風路欲迷。

若狹客中作

同

重山峻嶺限西東。城市相連海霧中。濕氣晨寒多是雨。潮聲夜吼乍生風。只憐春蟹雙螯紫。未見桃花一朵紅。客舍蕭條何所聽。浦雲深處有歸鴻。

武南山宅看花

同

別築茅亭小苑中。春闌芳樹繞簾櫳。千枝露滴今朝雨。一片香飛昨夜風。人世開唇難數數。花時取醉莫忽忽。賞心俱惜黃昏促。更剔蘭燈照粉紅。

嗟峨懷古

柚木太玄

殘雨荒亭物外求。嗟峨陳跡正悠悠。琴聲何在柴門夕。草色猶悲野逕秋。無復小倉迎鳳駕。空臨大堰

想龍舟。漢家一自離宮廢。多少禪林領古邱。

寄題三原妙正寺

同

孤塔高標實地邊。披圖靈境眼中連。城頭烟樹東西市。海畔雲山遠近天。霞映鷺翎秋雨散。風生鯨背暮潮旋。乘槎自訝前宵夢。吟想相關如是緣。

【三原城。憑山臨海。閭閻夾城。有東市西市之稱。鷺島鯨島。並峙海面。詩中所以云云。】

秋晴

端隆 文仲

天氣乍晴秋正涼。江山樹色敞斜陽。長虹一半成橋勢。遠水平鋪入鏡光。適意巖阿唯鳥跡。投身世路各羊腸。旗亭小酌雖添興。慙愧村村農事忙。

九日同諸君上黑龍山 山在越前一

同

佳節唯應作客愁。翻從好友酌山樓。半開菊見前宵雨。已秀禾知闔國秋。新故情濃堪盡醉。往來途熟約重遊。小詩吟溢無由謝。慙愧杯盤晚未收。

泥塑美人

源之熙 君績

芙蓉亦愧出泥姿。京樣梳粧山樣眉。錦袖如雲難入夢。蘭湯沃雪怕銷肌。送情宛似窺宋玉。含怨還應等息嬌。行露爲愁羅襪澆。裙簪不動立多時。

秋思

巖垣彦明 亮卿

蘭蕙凋傷獨自知。愁來鬢髮亂如絲。春風恩斷同心結。秋露盟寒連理枝。孰說平陽歌舞富。徒憐長信歲年移。深宮夜夜難爲睡。倚檻幾吟執扇詩。

遊圓通山

同

瀟洒禪關傍竹林。琅玕陰入暮烟深。門前空谷傳天籟。樓外鳴泉和梵音。栢樹元無秋色染。麻衣何有世塵侵。休公買得名山勝。長使碧雲扶脚吟。

感秋

伊藤榮吉

人聲寂寂月西流。樹影沈沈萬象收。草際陰蛩如訴恨。牀前薄酒好忘憂。梧桐一葉金風外。鴻鴈幾群銀漢頭。淒夜頻催搖落感。今年何似去年秋。

高津春望

岡元鳳 公翼

古都形勝入新年。浪速繁華氣象全。江海晴分雙港雨。閭閻望合萬家烟。畫樓柳色青何處。沙岸梅花白幾邊。富庶於今推大邑。何須人擬黍離篇。

平安寓舍答葛子琴見寄

同

一樽行樂與痾違。伏枕幽居徒掩扉。暮雨城邊花寂寂。春烟巷口柳依依。綈袍曾記同遊是。書劍何堪獨往非。幾度相思傳尺素。遙憐芳草上漁磯。

早春源子澤西遊辱臨草堂

僧慈周 六如

嘗報春漸向洛師。 覺音不負隔年期。 交遊寥落青雲遠。 世事艱難白髮知。 望月重論懷我夜。 攀梅應認贈君枝。 開襟頓覺無餘恨。 也恐參差到別時。

同日席上分韻得十一尤

同

江城分袂忽三秋。 不料春筵繼勝遊。 雨後雲烟山似笑。 花間鶯咏鳥相酬。 由來簪紱非君好。 他日蘿衣從我求。 此計茫茫如隔世。 殘樽邀月更登樓。

至日

菅晨曜 甘谷

初陽應律入良辰。 舉目江南雲物新。 文史三冬慙白首。 風光一日憶青春。 稍知操瑟終違好。 無那敝裘見厭貧。 十載交遊寥落盡。 梅花開早寄誰人。

奉寄宇士新先生

飯田美允 玄野

鴈叫汀洲秋氣悲。 白雲流水遠相思。 終年閉戶蓬蒿遍。 兩地論文心事知。 門下康成慙異代。 關西孔子許當時。 共憐樛散供多病。 總爲風塵不可隨。

同友人海寺觀花

友淵宜卿

雨洗江天綠欲流。 花開海寺愜春遊。 園非桃李皆群秀。 路到蓬萊第幾州。 萬里潮聲懸殿遠。 雙林晴影湧臺浮。 野芳休問王孫草。 山色遙牽仙客舟。

玉江橋春望贈子琴

賴惟寬 千秋

玉橋乘霽好從容。 麗日和風淑景濃。 侯邸古松濤陣陣。 市樓春柳翠重重。 雲邊塔影天王寺。 海上嵐光

佛母峯。 莫道村郊青耐踏。 何人此去可移筇。

佛母峯即摩耶山

賴惟彊

得弟萬書却寄

肯道天涯若比隣。 異鄉春異故鄉春。 傳書海驛雲間鴈。 求句池頭夢裏人。 遊子羈心蓬易亂。 老親華髮雪應新。 梅花欲折幽情切。 踈影暗香月一輪。

淀江夜泊

大江資衡 玄圃

漠漠秋光澱水涯。 汀烟隱見野人家。 翻車咿軋追波轉。 漁艇飄飄鼓棹賒。 橋上烏啼楊柳樹。 岸邊霜滿荻蘆花。 鐘聲到處推牕望。 雄德山頭曉月斜。

九日

齊必簡 大禮

長安歸客繫行舟。 綠酒黃花澗水流。 臺上風凌青紗帽。 簾前人醉紫貂裘。 城邊鴻鴈三山晚。 江畔雲霞千里秋。 莫道陶家已乘興。 由來此地使人愁。

還俗尼

平信好

春光空度化城傍。 脫却袈裟歸故鄉。 玉面還粧新粉黛。 紅羅再著舊衣裳。 迎來行雨巫山夢。 拂盡散花天上香。 借問人間兼佛界。 絃歌孰與梵音長。

七夕過第三橋

石川貞 太一

露井梧桐已報秋。家家乞巧爲登樓。正疑烏鵲橋邊水。瀉向鳳凰城外流。河畔白沙清弄玉。山頭皓月曲如鈎。他時若就君平問。應識即今干斗牛。

春日感懷

幡文華

城頭踪跡混紅塵。無賴鬢華鏡裏新。狂蝶不知身是夢。嬌鶯何厭我原貧。香風欄外飛花晚。細雨池邊芳草春。藜杖今年猶未試。青山應笑負遊人。

湖中四時晚景春 四首選二

僧凍滴

沙明水碧大湖濱。釣罷吟行何處人。烟鎖垂楊黃鳥暮。波漂綠葦白鷗春。高低山帶晴嵐出。遠近帆懸落照新。如此韶光誰不賞。優遊况復隱淪身。

同冬

同

江上高亭夕照斜。遙看鴻鴈落平沙。扣鐘幽嶽關雲寺。曝網荒村近水家。渡口寒風人立馬。橋邊烟浪客停槎。回頭北望猶堪畫。石鹿山林雪著花。

暮春即事

僧惠問

三月海風白子城。朝來引雨灑僧房。香烟一炷書牕繞。烟柳萬條檻外長。忽有笛聲飄客夢。豈無詞章賦池塘。青春勝事坐消盡。空見落花滿石牀。

春日遊海濱

源義人

城南風物弄春光。且對輕鷗又舉觴。渡口烟關洲上暗。鳥邊雲罩遠巒長。新林紅蕖連青藻。大海波浪浸夕陽。借問扁舟垂釣者。濯纓此處久相忘。

高岸寺避暑

山政禮 子慎

登臨秋近雨花壇。馬首迎來暑已殘。樓枕犀川開爽塢。樹深鹿野隱高盤。白毫光動諸天暮。金鐸聲生萬壑寒。幽事陪尋玄度興。滿襟風月罄君歡。

中秋遊筑夫洲 五首錄一

菅元容

筑夫神島巒峻嶒。十二欄干客此凭。玉宇寒生秋寂莫。銀河雲盡夜清澄。月懸鸞鏡臨金地。松化龍鱗捧寶燈。徒倚忽忘人世趣。放歌長嘯興堪乘。

戲咏鯉魚膾

藤共建 子樹

有魚揮刃凜凝霜。三十六鱗飛且揚。肉落玉盤鮮錦繡。卵隨犀筋滑黃梁。醇醪一斗斟堪灌。賓客四筵邀此嘗。縱是龍門登不得。却教滋味潤枯腸。

哭松崎子允

功君章

卜居海上早懸車。芳草青青二徑斜。知爲鄉心勞夢寐。奈携老病學丹砂。百年功業歸長夜。一世才名伴落花。冥魄中原何莫思。山陰自有主人家。

送飛子寶之丹後

櫻井良幹

自愛名山入子臺。又尋方外到蓬萊。橋隨鳥鵲天中落。燈逐魚龍海上來。只道丹邱元不遠。何知白髮暗相催。玉函他日持歸去。莫向人間容易開。

九日

杉信生 子適

書劍飄零歎遠遊。登高此日倍離憂。幾家綠酒龍山飲。何處黃花栗里秋。江上形容空老病。城中風雨自鄉愁。誰知異客思親切。起向天涯回白頭。

早春郊行

柳原敬之

三春行樂莫蹉跎。老後光陰夢裡過。相喜鄰童來誘引。奚嫌野老醉婆娑。馬蹄殘雪梅邊盡。牛巷晴烟柳處多。逢着農人時問路。嚶嚶黃鳥在山阿。

九日寄懷錦里先生

前田翹 君舉

憶昨龍山御李遊。清歡回首事悠悠。西風颯颯鴻聲晚。寒雨蕭蕭樹色秋。別後誰家頻下榻。相思此地獨登樓。樽前還恨逢佳節。雲水蒼茫隔帝州。

螢

下川貴慶

青蒲細柳水鄉秋。熠燿宵行小雨收。散似斑斑星彩亂。聚如點點露華浮。牕前月暗來先見。岸上烟深逐又流。好是涼風吹不滅。徘徊故傍讀書樓。

金華山

源義質 子敬

縹緲蓬壺碧海傍。乾坤東盡接扶桑。仙臺長映金銀樹。天柱高懸日月光。紫府千年人化鶴。丹邱五色石成羊。只今誰識安期輩。此處猶傳大藥方。

遊溫泉寺

在伊勢菟野山中

南川維遷 文璞

深樹含煙彩翠濃。參差樓閣與雲重。千人坐穩溪邊石。萬仞攀高屋後峯。藥草滿林香駐客。長松跨壑影如龍。徘徊猶欲尋佳境。橋上遙看落日春。

登高

山維熊 秋水

雨晴山色滿高樓。縹渺長江入檻流。落木飛鴻天外下。黃花白髮客中愁。孤城暮笛吹明月。萬里寒衣授素秋。薄宦風塵歸不得。何時解組命扁舟。

和柚仲素

福世謙 益夫

芳郊細雨靜纖埃。駘蕩物光千里催。北闕晴雲擎日出。南山積翠接天來。紅花綠柳春相競。畫閣朱樓晚自開。聞道漢家重詞賦。憐君未減馬卿才。

壽北海江都先生五十一

河子龍 伯潛

謝庭玉樹五雲開。何必南山引壽盃。重席曾傳次仲業。百函今見穆之才。詩篇豈爲文書廢。吏術還將經史裁。闕閔定知協服政。榷枘原自棟梁材。

伯潛幼時。已以神童稱。

長而才藻益縟。但其在京時。余以爲吏職。廢棄藝業。後來余辭。

藩職。再親筆硯。則子龍已爲吏職。移住浪華。前後參差。不得交熟。以故筐笥所藏。唯此一篇。殊可憾耳。

夏日櫻社朝望

內山之明 栗齋

日射江心送釣船。孤亭斜在網洲前。耕牛隔柳過烟岸。巢鷺出林飛水田。列嶽風回開宿霧。層城樹密接涼天。此時若使丹青寫。倚檻同遊亦共傳。

還鄉飲中公宅奉諸公

萱成章

刀環此夕一啣盃。人去星移感轉催。聞說學仙生羽翰。可憐牽役老鷺駝。燈前寥雨談猶熟。曲裏高山懷更開。肯藉舊栖叢桂色。相逢忽漫賦歸來。

病起

神山正孝

百憂釀病世情慵。獨坐青氈秋思濃。半夜寒燈含四壁。幾家清杵響前峯。玉壺將碎歌中驥。霜劍空藏匣裏龍。強起晴牕親案牘。自憐幽興託孤筇。

同諸子遊西孟清中濱莊

岡豹 君章

鞅掌常違社裏遊。名園此日暫相留。駒山蒼翠供過客。猫水潺湲好泛舟。圍墅林花春歷亂。隔村野竹晚清幽。烟霞醉飽飛揚甚。擬以形骸附一郵。

河港即事

北山彰 元章

黃昏穩坐石磯頭。垂釣無如此地幽。海暗漁舫迷泊渚。天晴鴈字掛津樓。孤鐘近接雙林響。片月遙分二水浮。縱是明朝經物色。輕篋何擬子陵流。

冬野望

藤仲導 環夫

枇杷花發郡城東。極目躊躇一醉中。野渡舟橫從水澗。石溪橋斷恨途窮。遠山晴色鴻邊雪。短笛寒聲牛背風。十里郊原人去盡。參差麥隴夕陽紅。

寄隄正平

草加親賢 公輔

淀氏橋邊藩邸傍。客居宛在水中央。琴書樓寓停雲思。樽酒筵歌伐木章。涼入薜蘿忘赫暑。舟維洲渚賞秋光。三叉月白聞羣鶴。吏隱幽情與夜長。

呈君錦先生

明石景文 龜藏

回首鳳城所思多。樓頭幾度費吟哦。南天明月空長好。北渚清風今若何。玄草經年非尙白。紅塵雙鬢或應皤。縱君聖世朱其轂。無意鄉園問釣簑。

挹翠軒即事

荒木喬 子遷

西莊樹樹露香輕。心事殊宜秋色清。虛室自甘墟里隱。新詩那索世間名。牕明風日搖柯影。人靜庭除見鳥情。漫擬焚魚辭學士。碧山終不負斯生。

再遊平野

荒木堅 子剛

翠烟深處再爲賓。幽趣依然絕世塵。青草既兼黃菊老。丹楓更與白雲新。蟾蜍明滅簷前雨。邱壑討尋畫裏人。留滯今逢開口笑。應須閑適養斯身。

舟遊墨江

尾藤肇

佳境繫舟蘆荻邊。岸頭移步思飄然。樹深何識天非晚。潮去疑看海作田。帆隔茅渚春色浦。城臨浪速夕陽川。勝情好是酬平日。况有落花代綺筵。

初秋書懷

同

遠遊仗劍欲何依。荏苒流年感落暉。夏木千章青未改。秋雲一片白先飛。功名海內初心背。親友樽前舊酌違。即有清琴誰共鼓。晚風吹入敞貂裘。

京師客中上巳

客舍在鴨川濱

小山儀伯鳳

麗人並倚玉欄邊。紫陌春光塵作烟。楊柳風吹遮落日。絃歌聲湧度前川。蘭亭跡遠重三節。鳳闕雲輕尺五天。豈羨青樓能醉客。吾今自有杖頭錢。

幽居

井廣正雲卿

山郭蕭條深掩門。身閑境靜樂田園。幽花折得猶含露。嘉木移來耐託根。圖籍篋瓢能養拙。雲烟泉石好忘喧。草堂日暮無人到。井上梧桐月一痕。

秋夜弘源禪院奉和君錦先生

田安壽雨龍

雨後西山趣更幽。青松影冷寺門頭。半峯日色含秋景。幾處鐘聲出暮樓。霜下莎蹊蛩韻斷。月明桂樹露華浮。豈圖今夜禪房裏。銷盡多年雲樹愁。

送石君潛赴東都

芥元澄子泉

衡門有客拂蓬蒿。離別草堂勸濁醪。高臥終非壯士志。遠遊莫厭宦途勞。芙蓉雲映千年雪。滄海天低八月濤。此去東都君問訊。護園遺業今誰豪。

寄蘇門先生

僧宗勗

清狂復見晉時賢。鸞嘯由來日下傳。不向朱門求紱冕。獨將青眼對芸編。隱深却臥塵埃裏。心淨常遊湖海邊。閉戶唯餘方外客。談玄兼又愛逃禪。

雨新卷同諸子賦得侵韻

僧環空

開士卜居鏡水陰。風流詞客此追尋。談論兼說三乘妙。諷咏還探二酉深。夜冷林間浮玉露。月明地上布黃金。憑欄未盡清宵興。已見銀河南北沈。

賀八卜居

賀象伯魏

茅屋掃塵容膝初。江山何必問樵漁。高情不用三閭卜。隱趣應諧五柳居。一逕春風移竹樹。半牕斜日照琴書。幽棲縱使嫌薰灼。自滿門前長者車。

春日同諸子泛舟琵琶湖

香山彰

惜春共泛大湖中。湖上烟光奪畫工。蝶舞偏廻堤草綠。鶯吟更媚岸花紅。魚罾閑晒沙頭日。酒旆頻飄柳外風。借問詩心何處落。叡山雲盡插蒼空。

庚寅秋九月十六日蘇門先生小祥忌舊社同賦秋夜感懷

永田忠原

獨夜蕭條茅屋幽。依稀風色去年秋。嘯亭音絕人何在。遺艸校來淚未收。燈下寒蛩孤榻影。簷前明月五更籌。友朋縱有尋盟會。搖落轉添宋玉愁。

泛舟桑海贈君謹兄

石作貞

釣竿相伴放扁舟。廻棹逍遙任去留。蘆荻風寒先命酒。江湖機罷好隨鷗。漁歌遙聽孤村暮。詩興時開萬壑秋。爲是高人憐客厚。陶然暫慰望鄉愁。

癸巳三月同賦東山賞花奉壽北海江郁先生六十

三首錄一

荒木田興正

芳菲三月雨餘天。並倚高樓挹彩烟。千樹天桃輝酒席。一群嬌鳥媚詩筵。跡同安石棲遲日。齡擬文通初仕年。莫道東山行樂地。坐中濟濟漢時賢。

春盡

井孝德 太室

西郊十里弄斜暉。曳杖幽人獨自歸。詩就殊堪憐澹蕩。興來誰與踏芳菲。天邊鴻雁飛將盡。池上楊花落復稀。日暮長歌求去路。徘徊欲訪北山薇。

哭武梅龍先生

阪通 文策

一夜奎星乍沒光。詞林隕色鎖淒涼。當年授簡頻裁賦。今日遺編正斷腸。堂上彩衣空入夢。階前玉樹尙餘芳。九原杳渺知何處。長向青山弔白楊。

萱君君譽書堂集得醪字

木弘恭 世肅

嘉招邸第及吾曹。中有驪駒爲客操。鄉路霜飛人賦別。雅筵醉去夢堪勞。秋光餘菊看佳色。春信約梅弄彩毫。洵美休言非我土。殷懃此會足醇醪。

贈川青洲

山田敬之

屏跡幸無俗累牽。松聲相伴几頭眠。三杯薄酒誰知趣。一局殘碁何似仙。叢露虫吟牆壁外。烟波月掛海風前。近來詩社殊寥落。郢調除非有汝憐。

送人遊須磨

片岡承行

送君遙想攝陽天。到處風光媚客船。山接赤城欹峭壁。海連淡島渺雲烟。尋花蕭寺移遲日。讀碣莎堤感往年。爲是江南多勝事。奚囊自滿遠遊篇。

寄京師故人

鄭宏

憶昔相携桂水濤。鷗盟幾日復相尋。春郊並馬求花塢。暖岸垂綸坐柳陰。南海孤雲千里夢。西山明月兩鄉心。報君不是無鴻信。爲寄時時白雪音。

九日過飲子祥

時余將還鄉

竹川政辰 馬陵

搖落千林促旅裝。開樽此日暫相留。黃花白髮憐佳節。南鴈西風對素秋。薄宦君同陶令趣。孤吟我抱越人愁。論交二十餘年事。鷄黍胡爲負再遊。

九月十三夜遙懷藍水先生

島田則裕

節後寥天宿霧開。望前明月照高臺。星稀韻氣千家滿。雲靜清風萬里來。聞雁南樓情不淺。憶人東海意悠哉。今宵安得壺公術。縮地同含濁酒杯。

秋蝶

田維禎 士祥

曉霜夕露欲何依。來去應憐節序違。金翅有情聊對舞。玉鬚無力故低飛。菊花枝上魂偏冷。楓樹林頭影自微。忍憶郊原春遍日。追紅問綠弄芳菲。

十月友人宅看菊

服元濟 美冲

滿籬黃菊野亭傍。三逕依然不就荒。獨後衆芳疑綴錦。猶留秋色欲凌霜。幽叢拂檻風偏冷。亂蕊侵盃影亦香。請看晚來別添趣。枝枝齊伴月明光。

穀日

山 英 士成

江南穀日卜新晴。坐見韶光草際生。風暖竹籟鶯語滑。泥乾柳巷馬蹄輕。彫龍已老揮毫色。捫蝨猶餘披褐情。更有村翁來往熟。相迎共欲語春耕。

長安春望

同

烟霞不改帝王州。更見上林春色浮。三輔河山皆壯麗。五陵裘馬故豪遊。東郊日出龍隨駕。北闕天低鳳繞樓。自是繁華堪此地。玉簫金管起城頭。

九日懷洛陽舊社

松山猷 子植

去歲登高洛水潯。歸來復倚越城陰。變遷人事愁何極。流轉年華感更深。今日杯樽無共醉。舊時遭遇有知音。離群正負諸彥會。寂莫西風落帽心。

寄滕子篤

時在東都

吹田定孝 繼志

孤飛南鴈背芳辰。一別音容入夢頻。江左交遊誰岳湛。天涯故舊自雷陳。紅花掩映銀臺路。白鳥翔飛墨水流。客裏光陰君須惜。歸來好及故園春。

送公庸遊楮嶽

一曰立山

佐伯樸 季暉

並立芙蓉城郭東。高臨北海勢逾雄。千秋晴動峯頭雪。六月寒生絕壁風。空谷蹊通魑魅窟。青天雲暗羽人宮。羨君探得名山秘。彩筆縱橫不可窮。

中山道中

在飛驒州

朱 義 君宜

洞壑崎嶇驛路分。中山七里碧氤氳。地通危棧橫蒼樹。天逼懸崖帶白雲。江底鼉鼉時起浪。林間麋鹿自成群。藤蘿石上三更月。夜夜猿啼不可聞。

哭中村生

久保信行 君利

病來應感遠遊非。千里鄉園竟負歸。携手三春人入夢。招魂一日淚沾衣。何思蒲柳先秋落。遂使山河與世違。之子風流空往事。可堪痛哭向書幃。

九日同諸子上旗山望海

宇都潭 士龍

旗山突兀倚清秋。佳節登臨萬象浮。島嶼遙連三備出。波濤遠擁四州流。黃金日射崖邊菊。彩鷁晴飛畫裏舟。借問龍山高會興。何如蜃氣結成樓。

浪華客中九日

永井貞卿 孝幹

登高何處浪華臺。楓樹蕭蕭暮色來。已恨青山望裏斷。况逢黃菊客中開。蒹葭秋冷三津水。風雨時傾九日杯。遙念天涯諸弟隔。幾人同採茱萸回。

藤門懷古

岡壽卿 元齡

藤門日夕步長堤。麥浪疊風綠欲迷。海路淺深隨晦朔。漁人厲揭自東西。新梢今見投鞭樹。荒畝猶餘戰馬蹄。將遇村夫問陳迹。渡頭唯有水禽啼。

月夜送人

島津義張

一倚江樓送汝行。暮烟斂盡水波平。笛中寒動關山色。雲外夜悲鴻雁聲。霜落楓林連十里。風淒驛路繞孤城。莫愁離索音書少。各自天涯共月明。

崎陽舟中作

原武雅

銀漢仙槎指七襄。忽驚海路出扶桑。群巒倒影搖秋浪。衆壑浮花媚夕陽。豫岫遙隨輕棹出。防城猶帶彩霞長。行藏誰料人間世。更向溟濛天一方。

秋興

源逸 伯民

江天白露滿蒹葭。步履秋林獨嘆嗟。處處寒砧催落木。聲聲旅雁雜悲笳。故園頻憶鱸魚膾。滄海虛留仙客槎。蓬鬢轉憐垂老淚。鷓冠何日臥巖阿。

同諸子陪北海先生遊嵯峨

源義之

此日風流各自誇。琴樽似泛白雲槎。仙山高映瑠璃水。佛寺晴薰錦繡花。苔岸橋橫能度月。松林館古尚栖霞。還疑勝地留吾輩。歸路濛濛雨色遮。

夙發逢阪訪京師故人

平義綱 紀宗

蓐食振衣發野鴈。蒼茫曉色斷雲天。長河將沒鐘聲落。旭日漸昇霞彩鮮。古道時時餘鹿跡。幽溪處處有入烟。孟冬已看霜花白。殊覺寒威勝去年。

寄滕子山

早苗三寧

少微長映故人廬。大國儒才任卷舒。烏帽尋常耽翰墨。羊裘歲月隱樵漁。曲中山水誰能和。名下文章士不虛。自是神交千里路。擬將呂駕訪幽居。

神泉苑

勝彦龍 子昇

先王舊苑一蕭然。 滌沱滄池碧際天。 維昔煙霞迎鳳輦。 至今勝跡號神泉。 乘軒白鳥衛封日。 行雨青龍湯早年。 千載親看靈沼樂。 芻蕘晚自此中旋。

寄懷清君錦先生

千里韶光眺望分。 東風十載思紛紛。 鳳凰城裏曾爲客。 孔雀樓頭一遇君。 名動中原傳大業。 身臣前越事斯文。 春來幸有侯芭去。 作賦遙堪問子雲。

題加藤清正廟

阪熙惟熙

祠廟陰陰松栢中。 群山擁護倚秋空。 揮鞭忽出擒王畧。 飛捷頻傳破虜功。 俎豆百年嚴伏臘。 衣冠當日想英雄。 即今陵谷浮雲合。 猶見旌旗翻朔風。

晚秋對月有感

倉溫伯玉

寒林蕭瑟白雲秋。 乘興獨登江上樓。 風急金天楓葉下。 月明銀漢露華浮。 笛中楊柳添鄉思。 杯裏葡萄緩客愁。 吟罷三更人不見。 霜飛十里荻花洲。

冬至

大菅圭

相携佳節此含杯。 遊目倚欄湖水隈。 塢外梅花堪試翰。 山頭雲物擬登臺。 日行北陸添宮線。 節動東風起管灰。 澤國何須鄒衍律。 烟波萬頃一陽催。

客中秋懷

蓋九齡伯壽

高天慘澹氣蕭森。 腰下劍鳴霜自深。 夢後秋風寒巷笛。 愁邊落木古城砧。 關山千里登樓賦。 夜月三更伏枕吟。 欲向鄉國問消息。 征鴻空入暮雲流。

松島泛舟

村蒙

共傳名勝海天隅。 不啻江山對畫圖。 九貢黃金開聖瑞。 千秋明月出龍駒。 客星東掛嚴灘近。 雲氣西來御島殊。 自古遊人爭題咏。 停舟把酒向蓬壺。

上八栗寺最高頂

長國華春父

五劍峯高紫氣中。 千年樹色鬱蒼蒼。 捫蘿身逐麤巖跡。 攀石態應猿狖同。 緬邈阿山天際落。 森茫播海眼中空。 坐來長嘯長松下。 吹起蓬萊萬里風。

訪葛子琴數日留宿

小倉深藏若虛

此去扁舟不可尋。 十年踪跡共浮沈。 獨憐騷客思歸切。 猶感主人恩遇深。 飛閣御風詩自聖。 小園施藥杏成林。 浪華洲上雁如至。 爲報江東日暮心。

擬送人從軍

梅幸高北漢

天兵十萬發長安。 多少山川行路難。 共說馬卿能作檄。 誰知韓信未登壇。 旌旗日暗胡塵合。 鼓角風高漢月寒。 期汝何時還獻凱。 鳳凰城裏續交歡。

呈南郭先生

申東作

東出美人芝水隈。流芳幾載此徘徊。君今鳳閣徵求士。我豈龍門御李才。遠海青山當檻出。擁關紫氣入廳來。爲能不惜中原色。春風把酒醉登臺。

江北道中

青木欽曾 孝夫

晨光忽促發相關。籃輦忽帶月還。路遠西風紅樹裏。湖分秋色翠烟間。蘆汀日暖禽堪睡。茅店酒香人解顏。溪壑縈迴爭迎送。不知何處舊家山。

秋日同諸君登白華大悲閣

滕軌 世式

隨緣探勝此登臨。縹緲晴風映夕陰。澗靜飛泉懸素練。秋深落葉布黃金。慈雲長擁諸天座。覺路相通七寶林。却笑城中絃管盛。不如山水有清音。

【世式作此詩。年甫十二。余選此集。不錄童子之詩。以後來造詣地位不可預卜也。但若此篇頗能成章。自當與選。因不拘例云。】

奉謝北海先生過訪

僧中誠 思三

幽棲二月覺寒微。恰好高人來叩扉。林外雨收紅杏發。欄前晚靜彩霞飛。松風澗水堪供話。野蕪山蕘且緩歸。最是郊村春色遍。吟筇到處鬪芳菲。

訪曉應尊者

尊者住淨名寺

僧法嶺

飛錫行雲隨旅魂。野橋西去已黃昏。寒松雪落山間寺。翠竹煙浮江上村。初月影中僧閉室。晚鐘聲裡

鳥窺垣。淨名遺跡元難訪。一夜繩床相共論。

三日湖上

僧了超

城東三日大湖濶。一葉扁舟與自深。解袂何人懷洛水。流觴吾輩擬山陰。清波濯錦桃花岸。新雨綴珠楊柳林。行有武陵原上趣。探芳莫問夕陽沈。

中秋對月得庚韻

僧理空 龍臺

城頭明月滿輪清。乘興登樓庾亮情。星漢影移懸玉闕。露華光冷滴金莖。梧桐秋老風前葉。鴻雁夜深雲外聲。詩筆揚揚堪笑傲。休言萬里羨蓬瀛。

春詞

日野氏

獨自乘春登翠樓。坐看雙燕畫梁回。江頭細雨籠垂柳。陌上輕風促落梅。幾處尋芳蝴蝶苑。何人揮筆鳳凰臺。金陵二月猶餘雪。遙想平安桃李開。

送伊藤士善歷岐岨赴東都

清勳 公績

東遊知爾愴離群。行過關原峽路分。客夢猶寒千嶂雪。馬蹄長躡半天雲。落花啼鳥愁春暮。古木巉巖易夕曛。酒覺旗亭一回首。鄉情詩思兩紛紛。

冬日郊行

同

北吹蕭蕭寒色披。煙雲點綴景參差。數聲啼鳥斜陽外。一葉輕航野水湄。霜樹猶開石崇障。雪山遙畫馬

良眉。我生多病勞詩思。喜見前村翻酒旗。

日本詩選卷之七終

日本詩選卷之八

五言絕句

野寺

孤村流水傍。曲徑入僧房。脩竹重陰合。清幽到夕陽。

岐岨道中

遠合千山水。長流數郡中。貪看奇絕景。忘却客途窮。

秋夕

孤村前夜雨。林末起秋聲。山市人歸去。寒砧處處鳴。

平安 江邨 綬君 錫著

姪 清勳 公 績

受業 永田 忠原 俊平 同校

石川丈山

那波方道圓

笠原龍鱗 著

倦夜

漏水沈猶滴。鐘聲斷又聽。東牕未生白。枕上一燈青。

同

關山月

青海孤雲盡。天山片月寒。高樓人不寐。半夜望長安。

柳川三省

月下聞砧

寒杼丁東響。搗殘月在天。只聞來枕上。不識自何邊。

伊藤長胤

山中

不知山中趣。且作山中人。只看白雲色。終日映烏巾。

澤維顯

自浪華至尼崎途中作

沿江三十里。徑細委蛇行。夾路皆茅葦。風吹作雨聲。

伊藤元基

晚步

歸鳥沙村外。炊煙野樹間。行人人影動。回首月離山。

鳥山輔門

【一二江南暮景如畫。輔門住伏見。後移浪華。熟眼認得。非虛綴也。三四赤壁影子亦佳。】

茅店殘月

雞鳴霜滿屋。殘月皓無光。輪側茅茨外。猶留半面粧。

室直清

採蓮曲

十五採蓮女。羞人不出花。青荷如小扇。試折一枝遮。

源 璵 白石

其二

打起鴛鴦兒。莫教棲綠池。三年江上別。又及採蓮時。

同

歲寒林

鬱鬱長松樹。蕭蕭脩竹林。結茅松竹下。深識歲寒心。

同

海棠岸

紅英層層結。青枝嫋嫋垂。不須長袖舞。一任好風吹。

同

題斲琴圖

流水人俱去。人間此曲悲。瑤琴無所惜。既遇一人知。

同

歲暮寄宮麟洲

君道勿多愁。多愁使人老。如何無愁人。紅顏亦難保。

祇園瑜 南海

送寶渚子歸江北二首

我在江南住。君向江北過。江南與江北。春風何處多。

同

其二

同

美人相見時。無酒又無花。花開酒亦熟。美人不在家。

長安道

雨歇南山色。春風楊柳新。高車多喜氣。無限藉恩人。

寄京洛故人

一別音書斷。相思秦地秋。欲將雙淚寄。江水不西流。

詠籠中鶯

一日別煙霞。絲籠今作家。好音如在野。不戀舊林花。

詠千日紅

紅團千日色。何處得寧馨。一醉中山酒。秋風吹不醒。

古意

君上望鄉臺。妾上望夫山。相望不相見。天寒一鳥還。

姊妹詞

阿姊鏡如煙。阿妹鏡如水。阿妹問阿姊。鏡鏡不相似。

春盡送人

送君芳艸色。併欲送春歸。一別千山路。楊花到處飛。

雨森東 芳洲

肥元成 允仲

梁田邦美 蛭岩

同

同

同

田助 鶴樓

失釵怨

攀取臨池花。玉釵墮在水。水深不可求。簪花立水溪。

夜雨

寒雨打蕉葉。愁人奈夜何。滴滴思鄉淚。孰與雨點多。

賜閒亭雜咏

原詩二十首。今錄其二。

無日不看山。有時復臨水。一閒孰使然。畢竟是恩賜。

其二

人老遊難老。樓高臥自高。欲歸歸不得。落日照蓬蒿。

北山寶幢寺看楓

孤磬寒山夕。寺深秋樹叢。停車人不見。霜葉爲誰紅。

其二

霜露連山氣。楓林暮色開。更憐添返照。還映一庭苔。

長安道

躍馬長安道。春風向冶遊。五陵花落盡。公子不知愁。

東都四時歌夏

僧法霖

桂義樹

湖元泰 栢山

同

堀正超

平支中

服子遷

同

不覺人間熱。泛舟避暑杯。餘酣何所見。江口大潮來。

雪後即興

同

柴門一夜雪。轉愛沒入蹊。不似城中色。朝來踏作泥。

題畫

同

峻嶺臨江海。逍遙北固濱。相看情自遠。知是晉時人。

過山伯麟舊居

平玄中

山花如有待。野鳥自相呼。長笛鄰人恨。猶餘舊酒壚。

折楊柳

高維馨

垂楊復垂柳。參差青江口。攀折送君行。春風吹滿手。

題畫

同

翩翩雙燕子。頰頰弄春暉。斜入垂楊去。翻銜落絮飛。

其二

同

閉門何處去。但見芭蕉樹。薄暮恐人攀。片月來相護。

鎌倉懷古

同

骨肉三朝盡。司晨有牝雞。荒涼荆棘裏。空見舊時棲。

絕句

松尙綱 子錦

臘雪二三尺。門前不可掃。纔被春風吹。江上盡青草。

詠史

源義治 京國

大梁有豪傑。白首抱關門。腰下吳鉤劍。不負公子恩。

蘆湖

柳里恭 公美

雲散蘆湖夕。風煙忘旅愁。誰知高嶽上。更望洞庭秋。

馬入舟中

同

川原秋氣高。風物興無極。唯欲舟行遲。飄飄去不息。

曉鶯

山根清 子濯

黃鳥鳴何處。曉牕簾戶隔。起求夢裡聲。月落梅花白。

大堤曲

瀧長愷 彌八

可憐娼家女。齊歌金縷衣。聽取詞中語。須惜少年時。

艷曲二首

水業 元

金扇小牡丹。兩面兩蝴蝶。各自東西飛。翩翩不可摺。

其二

同

君心如紅雲 妾意若白石 白石長繚繚 紅雲不待夕

秋儀 玉山

五絲逢五日 一醉不思鄉 但使玉壺繫 何須續命長

同

老馬一朝鳴 願入燕王市 枯骨直千金 何況心未死

同

弄玉秦王女 吹簫引鳳凰 仙遊良可樂 地上奈秦王

同

裊裊山中雲 英英繞茅舍 童子采松花 飯鶴南窻下

僧原資 萬菴

雪盡春將暮 人登湖畔臺 群花無次第 映水一時開

同

六月諏訪郡 凄寒不待風 芙蓉千里雪 片影在湖中

僧元皓 大潮

南海秋風起 北山夜雨來 聲聲心緒亂 不但望鄉臺

詠秋海棠

宇鼎 士新

海棠秋睡熟 含露倚籬根 曉風吹不覺 初日滿前園

同

蒲桃將荔枝 各自誇南北 東海餌如花 翻輕造化力

宇鑒 士朗

江行 岸垂楊柳樹 飛絮已成萍 征人去不住

同

獨立柴門久 前峯掛斜照 松風嶺上來 疑是先生嘯

藪弘篤 慎菴

古匣藏名劍 已嫌三尺長 鏽衣如自晦 誰復說秋霜

星野 龍

漁村二首 早潮迎舟去 暮潮送舟歸 大兒斂漁網 小兒脫蓑衣

同

其二 昨來看曝網 今來見下筌 稚子未知漁 嬉戲已刺船

秦正 富